

Nrpakxmrlz Kx Yr Mak Natq Ngr Nzaplxtqngr Mz Nrpakxmrlz Kx Yr Mak

Mak kc tqryr Nrpakxmrlz lc nide mrlx Mxri kc Jerusalem. ☆ Kzdg kz drtqde Jon Mak. ☆ Nide kave kr Banabas, ☆ x mz nzvzpxkr Pol mz Banabas kc ayrnrngr, nzvzng badr. ☆ Mz nibrde Pol trbrtiu drtwrde Mak, murde rlaszle nidr. Kxmule-esz', a' nzwz mou badr Banabas. ☆ X mz nibr kzdung mzli sc tqmnc-zpwxtrpebz mz Pol. ☆ Kzdung leplz, mz drtwrdr nzrpilr kx Mak nide kzte Pita, murde mzli kc pnz buk kc tzrpibz *Nrpakxmrlz kx Yr Pita*. Mwx Pita okatrle Mak nzlxngiti-krde Jiszs ☆ x pibzle da kcng kqļu bade, tqyroleng mz buk lc. Mwx ni-kzde **obla** kc tzmale-lvi mrkc Getsemzni. ☆

Mwx Mak yrle buk lc mz mzlir yiz 50—70 AD mz nibr nzrmcngr mz Jiszs. X mz nibrde ncblo ngr vea ne Rom sc tzodatipehr Mangr-nzangiongr Yawe mrkc Jerusalem, mz yiz 70 AD. Kzdung leplz nzrpilr kx Nrpakxmrlz lc nzyr kai. A' kzdung nzrpilr trtingr. Yrle buk lc mzli kc tzmnc-ngrdr Rom badr Pita. Mzli lc Pita sc tqngipe lrtzlvz, x ycpe pipz nzbz-krde. X opx angidr kx yrbzle mz leplz kxtrngiulrJiu,

☆ : Aposol 12:12 ☆ : Aposol 12:25 ☆ : Kolosia 4:10 ☆ :
Aposol 12:25; 13:5 ☆ : Aposol 13:13; 15:37-39 ☆ : Kolosia
4:10; Filimon 23; 2 Timoti 4:11 ☆ : 1 Pita 5:13 ☆ : Mak
14:51-52

murde yokaetipxle nqmq kr lr Jiu x nzyr-krde natq ngr Nzryrngrkxtr Kc Kai nzpipzng. X yrkzle kzdung nzalvztrngr mz nzaetq-ngrbz drtq kxnzrlxngiting x nzbzngr murde nzrlxngitingr ☆ kc naokatrle lr Rom kxnzrlxngiting mz nztu-amqngi-krdr mz mzlr nzxpu-krdrng.

Nrpakxmrlz kcng pwx nzbletipx-lxblrng mz kxmu nzaelwapx-krmlr Jiszs bagu. Murde Matiu okatrle nigu nzkriz-krgr kx Jiszs nide Mevalu x King. Mz buk sc Luk, Jiszs nide Mrlx Leplz. X mz buk sc Jon nide Mrlx Gct. Mz buk sc Mak, Jiszs nide Kxnzawz ne Gct kc tqwztrpz mz leplz, mz nzamrlz-krde nrkrdrdqdr mz zyagox x mz nzbz-krde nidr mz kros mz nzxpe-krde alwx ngrdrng. Mak tryrleu nqvi lr Jiszs, murde trtakitrdeu kxnzawz kxavzo-lzbq.

Mrkng Mz Buk Lc

Kraes wztitrpzle mz Gct x leplz nedeng mz nzrlrpx-lzbq-krde.

Jiszs alvztrle leplz nedeng kx narlrpx-lzbq-kzng mz nzwztr-krbzlr mz leplz. [8:34-37; 10:43-45]

Mak rlwapele da kxnzmatqng kxnzkctipxng nzpnu-esz'-nrade-rpwxmz (19) mz nzaelwapx-krde kx Jiszs ni-kzde Gct.

Nzryapwpxkr Jon Kxawrkxtr

Matiu 3:1-12; Luk 3:1-18; Jon 1:19-28

¹ Krlc nzyzutrkr Nrpa ngr Jiszs Kxnzmcpx, Mrlx Gct. A' mzli kc tryzutr-ngrka nzwz-krde, Jon Kxawrkxtr vz-kaip mz nzyapwx-krbzle mz leplz.

☆ : 8:34-38; 13:9-13

2-3 Asaea, profet kc bqnc, yrole da kx pibz Gct mz mrlxde. Ycmnetr-ngrde Jon Kxawrkxtr mz nzrpi-krde kx,

“Krlc menrpa nenge. Sa na-atwzlr-ngrne nartwayz-kaipz bam, murde naokatrle leplz nengeng mz nzoliqti-krdr nzvz-krbzme. ☆ Natq kzdq ncblo kx natqde etu mz nzryapwx-krbzle mz leplz lzke. Natq lcde rpile kx, ‘Oliqtiamu nabzmu mz nzvz-krm Kxetu Gct. Atubqtibzmu lrpzki kx nangi nyzde na-apule nzoliqtikr leplz kzdq lrpzki kx navzkim king.’ ” ☆

4 Zbz mz nzatutr-krde Nzryrngrkxtr lc, Jon Kxawrkxtr tupxm lzke mrkc Provins kc Judiz. X yapwxtipxbzle nrpa lcde seleng, “Tekqtramu nqm̄q nr drtwrmu kxtrka. X rlr-lzbq-ngrmamu mz nzawrkxtr-krbo nimu mz nzaelwapx-krmu nzvzkr drtwrmu mz alwx ngrmu, murde Gct naipqle nimu.”

5 Leplz kxkqlu zlwz mrkc Jerusalem x mz provins kc Judiz, vz zvz nzvzpx-krmlr mz nzlaltq-krbzlr mz Jon. Nzplxtitpxbzlr alwx ngrdrng, x sc tqawrkxtrpeleng mz LueJodzn.

6 Jon vz-nqblqnepwzle nqm̄q kr ncblo kx tr-rngibau, da kc tzwai profet kcng bqnc. Pxine-ngrpwzle lrpz kx nzwzngr mz nrpnr kamel. X amqngitr-ngrde lrpxi rde nrkalo kx nzwzpx-ngrm mz bekzu. X dakxnzng nade ngi txpwz dalr lzke, krlcng kionabr x hane.

7 X Jon sc tqyapwxtipxbzle kx, “Kzdq la ncblo kc sa navzm mz nibrnge, namyaszlze ninge.

X trtakitrpwc'u nzwztr-ngrbz bade, kxmule-esz' nzryokaepxng nqvi lr sadol ngr nanycde.

⁸ Awrkxtrtxpwo nimu mz lue, a' sa na-awrkxtrle nimu mz Mqngrkxtr.”

Mz Nzwrkxtrngr X Nzatalzngr Jiszs

Matiu 3:13—4:11; Luk 3:21-22; 4:1-13

⁹ Mzli lcde, Jiszs vzkimle mztea Naszret mrkc Gzlili Provins. Vzm mz Jon x sc tqawrkxtrpe Jon nide mz LueJodzn.

¹⁰ Mzli kcpwz Jiszs tqvzdz-ngrmle mz lue kc, mcle Heven nzlvxpx x Mqngrkxtr vzom bade, apule nran.

¹¹ X natq Gct vzom Heven, rpile kx, “Nim Mrlxng Kxnmrlzti. X abrtzlvz-zlwzx nim.” ✨
*

¹² X mzli kcpwz Mqngrkxtr sc tqngi-batrpebzle nzwztr-krde lzke.

¹³ X mnctipxmle mrkc z bq nzpnu-pwx, tqtamiti Setzn nide mz nzatao-krde nide mz alwx, a' trtao-pnzu. Kxmule-esz' animol kxnztrkating nzmncng badr, a' enjrl neng Gct nzaclve-angidrlr nide.

Jiszs Yapwxtipxle Nrpakxmrlz X Kqlele Ncblo Nedeng Kcng Ayrnrngr

Matiu 4:12-22; Luk 4:14-15; 5:1-11

¹⁴ Mz nibr King Herot Antipas nzadwatr-krde Jon Kxawrkxtr mz presin, Jiszs kc tqvzpe mz

✨ **1:11** Nou 22:2; Sam 2:7; Asaea 42:1 * **1:11** Krlzku kx ngi Gct Trte kc tqycmneom Heven murde rpile kx Jiszs nide mrlxde. Delc mz ngalrde lcng 10-11, mcku leplz kcng tq, mz Gct kc esz'txu, tzrplibz *Tqtrbz*. Mc kz Matiu 28:18-20; Aposol 1:8; 2:38, x 8:16 x natq kxnztopwzng elr.

Gzlili Provins mz nzyapwxtipx-krde nrpa ngr Gct.

¹⁵ Rpile kx, “Tekqtramu nqm̄q nr drtwrmu x rlxngititramu mz Nrpakxmrlz lc. Murde mzli ka Gct sc tqvectrple leplz bade, mz nzm̄nclz-krbzlr bade mz nzn̄gini-krde King rdr.”

¹⁶ Kzdq zbz Jiszs kx vzneđe kc mz nrlar Dxbu Gzlili, sc tqrmctipele kc ncblo kxnm̄wang nzling, Saemon nidr ncd̄r mzleđe Ađru. Tzmwangen̄g mz br scđr.

¹⁷ Zbz rpibz Jiszs badr kx, “Vz-nq̄blqm̄amu ninge, murde na-alvztrpo bamu nzrtangrn̄gr leplz, kx nangi nengeng.”

¹⁸ X mzli kcpwz nzrlasztx-pnzlr nzvz-krđr x sc tzvz-nq̄blq̄pelr Jiszs.

¹⁹ Zbz Jiszs vznebz kxpipz mz nrlar dxbu kc x sc tqrmctipe-kzle kzdq mou mzle-lzbq̄ nzling, Jemes x Jon. Trtedr dr̄tq̄đe Sebedi. Tzmn-clzm̄q̄ng mz nabz bot scđr, tznḡqtitr̄lr br scđrng.

²⁰ X mzli kcpwz sc tq̄k̄lepe-kzn̄g Jiszs nidr mz nzvz-nq̄blq̄-krđr nide. X nzrlasztxđr trtedr Sebedi mz nabz bot kc badr ncblo kcng tzawzlr̄ng, x sc tzvz-nq̄blq̄pe-kzlr nide.

Jiszs Maszlrpx-ngrđe Kzdq Drka'

Luk 4:31-37

²¹ Zbz Jiszs badr ncblo nedeng n̄zpw̄xng sc tzvz̄peng mz taon Kzpn̄izm mrkc Dxbu Gzlili. Kx nzkr̄lzbzlr kc Kzpn̄izm, sc tzvz̄tr̄peng mz mangr-nzkr̄ka'n̄gr nyzdr lr Jiu mz nzalvztr-krđe leplz mz Satde, kc tq̄ngi Sabat nyzdr.

²² Leplz amrlx nzktitxpx-zlwzlr nzalvztr-krde. Murde trapuleu kxnzakrlz kcng tzalvztrng mz Loukxtr, a' ycmnemile zmatq angidr.

²³ Zbz kzdq kc ncblo kx mncpx-ngrm drka' sc tqdwatrpbez mz mangr-nzkrka'ngr. Sc tqnetx-pxpe mz natqde kxwzpx.

²⁴ Rpipele kx, "Vrr! Vzpe Jiszs kc Naszret! Vz, dwasz nigr! Vz-ngrme nzodati-krm nigr! Krlzx ncblo kznike tqnginim! Nim Ncblo Kxtr kc tqatwzlr-ngrm Gct!"

²⁵ Ycmne-plztitxtr Jiszs drka' kc. Rpihle kx, "Mnc-lrpi! Dwapxm mz ncblo la!"

²⁶ X drka' kc arnrctixde ncblo kc, netxpx, x sc tqprszpxpele nide.

²⁷ Dzbe leplz kcng nzktitxpx-pnzlr x sc tzveatine-etrepelr mz nzrpi-krdr kx, "Eke! ? Nike tqpile? ?Krlc nzalvztrngr kxmrna? Rngisc zmatq mz nzrka-krbzle natq mz drka' kcng, x nzlxngitibzlr natqde!"

²⁸ Zbz nrpa ngr da lcng tqaleti Jiszs sc tqvztx-anipepwz mz Gzlili Provins tqlvzo.

Jiszs Amrlzle Kxnzyagoxng Nzqqlung

Matiu 8:14-17; Luk 4:38-41

²⁹ Mzli kc tqyrkrxpx-ngrpwz nzkrka'-krdr, Jiszs badr Jemes, Jon, Saemon x Adu, ncblo kcng tzvz-nqblq-kailr nide nzrlasztxdr mangr-nzkrka'ngr kc. X sc tzdwatrpeng mz ma nyz Saemon ncdr Adu.

³⁰ Kzdo Saemon kc tqngi olvz sc tqmnz me mnz-ngrde murde yagox x drtqde pqpym. Mzli kc Jiszs tqkrlzpe-ngrbzle mrkc, lr nabz ma kc sc tzpipebzlr bade olvz lc tqyagox.

³¹ Jiszs vzbz bade, otibzle mqde x sc tqokatr-pele nzatulz-krmlele. Zyagox kc yrkrtpx pnz, zbz sc tqoliqtipebzle dakxnzng nadr.

³² Mzli kc nepi tqtaope-ngrde, x Sabat kc tqyrkrpxpe-kzpz, lr Kzpznmzm nzvzmitimlr mz Jiszs kztedrng kxnzyagoxng x kxnmncpx-ngrmqng drka'.

³³ Lr mztea kxnzkqlung nzyrlwrtrpznz yz mz ma kc tqmncpx-ngrm Jiszs.

³⁴ X amrlztibzleng leplz kxkqlu mz nzyagox-krdrng amrlx. X maszlrpx-kzpzleng drka' mz leplz kxkqlu. A' tr-rlr-ngrpwzleu mz drka' lcdeng nzymne-krdr, murde nzkrzlzlr kx nide Mevalu kc tqmcpx Gct.

*Jiszs Ryapwx Nrpakxmrlz Mrkc Gzlili Provins
Luk 4:42-44*

³⁵ Mzli kc nrlc tqbqbe-ngrde, mzli boibe x nrlc kc tqbrlawpxpe, Jiszs dwalzm x rlasztxde ma kc, vzpx mz nrlarde kx yz mz taon kc me tu-nabungr, x sc tqkrka'pe.

³⁶ Mzli kc tzdwalz-ngrmlr, Saemon nidr badr kztedeng trnzmcpelru Jiszs. X sc tzvznepeng mz nzrtabrti-krdr nide.

³⁷ Mzli kc tzrmcti-ngrdr nide sc tzrpipebzlr kx, "Leplz kcng tzrtabrtilr nim!"

³⁸ A' ayzlu-ngrbz Jiszs natqdr kx, "Kxmule-esz', a' navzki-kzx du mztea kzbleng mz nzryapwpx-kz-krbong badr Nrpakxmrlz. Murde delc tqngi nou nzvzo-krmc mz nrlc ka."

³⁹ Zbz sc tzolvxtipe-kzlrng mztea amrlx mz Gzlili Provins. X sc tqyapwxtipxpez Jiszs Nrpakxmrlz mz leplz mz mangr-nzkrka'ngr nyzdrng, x tqrmaszlrpx-kz-ngrbz drka' kxkqlu badr.

*Jiszs Amrlzle Kzdz Ncblo Kx Ycngr Lepz
Matiu 8:1-4; Luk 5:12-16*

⁴⁰ Kzdz zbq kzdz ncblo kx ycngr lepz vzm x rwetxobz zpr mz Jiszs. X sc tqyrnitrpebz bade mz nzrpi-krde kx, “Kx tqsuti drtwrm le, krlzx kx nzmu krlzq zamrlzngr ninge!”

⁴¹ Jiszs yctx pnz mz drtwrde mrlx kc. Kxmule-esz' mz Lou sc Mosis batrpzle trntakit-krdeu nide mz nzprtrngr mz nzangiongr, a' maletx-trpzle nide. Sc tqrpipebzle kx, “Mrlzm bange. Namrlzq.”

⁴² X mzli kcpwz lepz kc dwasztx-pnzle ncblo kc, x nrkrdrtdqde mrlztx pnz.

⁴³⁻⁴⁴ Zbz Jiszs rkabz natq, rpibzle bade kx, “Vzpe! X da lc, bzkq ena ncblo kx napi-nebanle. A' vz-kaipz mz pris, x pibz bade napwxlitibzle nim, kx namcpzle kx mrlzpeq. Zbz sa napipxbzle mz leplz, murde namnc-lxblr-mouamu badr. X kabz mz Gct blz kx nangi dalr zamrlzngr nim, da kc tqwai nzpikr Lou sc Mosis le, x nakrlzngr leplz amrlx le kx tubqpeq mz Loukxtr.” ☆

⁴⁵ A' mrlx kc pitxnede da lc mrkcng kqlu tqvzk-ile. X rblxbz mz Jiszs nzvztr-krde mz mztea lcng murde dzbe leplz kx nzyrlwrng mrkc nzkqlu-aning. Delc tqmncpe-ngmle rlru, a' kxmule-esz' lr mztea kang kqlu sc tzvzmqng ye bade.

2

*Jiszs Ipqpyle Alwx Ngr Kzdz Ncblo X Amrlzle
Nrkrdrtdqde*

Matiu 9:1-8; Luk 5:17-26

☆ **1:43-44** Livae 14:1-32

¹ Mz nibr kzdung zby, Jiszs sc tqyzlupe mou Kzpnizm. A' leplz kxnzkqlu nzxlr lr kx sc tqmnc mrkc. *

²⁻³ Zbz sc tzyrkrpebzng mz ma kc tqmnc-ngrde. Nznulvzlr ma kc x nzyrlwrtrpz kcng yz. Mzli kc Jiszs tqyapwxtipx-ngrbzle Nrpakxmrlz badr, ncblo nzpwxng nzvzmqng, nzglqmlr kc ncblo kx nrkrdrtdqde bz. Nzglqtimlr nqni.

⁴ A' rblxtx nzglqtr-krbzlrle mz Jiszs murde leplz kqlu zlwz mrkc. X sc tzglqlz-alzupelr mz nibr ma kc, x nzlvlzlr mrkc tqmnc-zbzlbz Jiszs. Zbz sc tzavoopebzlr ncblo kc mz nqni mnrde.

⁵ Kx krlztrpz Jiszs nzbrtikr drtwrdr nide mz nzamrlz-krde kztedr, sc tqrpipebzle mz ncblo kc tqyagox kx, "Mrlxnge, alwx ngrmqng ipqpx-pebo."

⁶ Kzdung lr Jiu kcng tzalvztrng mz Loukxtr kcng tzwxbung mrkc, sc tzrpipe lr mz drtwrdr kx,

⁷ "Rlr! Mrlx lc tqpivxitile Gct. Murde Gct txpwz kx krlzle nzipqpxngr alwx!"

⁸ Mzli lcdepwz mz nzokatrkr Mqngrkxtr, Jiszs krlzitrpebzle mz mqngrde da kx yc mz nabzdr. X sc tqrpipebzle badr kx, "Bzkq nzao-krmu drtwrmu da kxmule lc.

⁹ Nzmu narpibo mz ncblo kxyagox lc kx, 'Ipqpxbo alwx ngrm,' rblx nzrmcngr. A' nzmu narpibo bade kx, 'Tulz, oti nqni pnrm, x vzpe,' opx angidr nzrmcngr.

¹⁰ Mz nzmu-krde lcde, na-amrlzbo nrkrdrtdqde mz nzaelwapx-krnge kx ninge, Mrlx Lepz,

* **2:1** Mz nibr Jiszs nzabzo-krde nzryapwpx-krde sc tqapusr-pe-ngrde Kzpnizm mztea nyzde kxmrna trngipeu Naszret.

rngisc-kznge zmatq ngr nzippqpxngr alwx mrka mz nrlc." X sc tqrpipbezle mz ncblo kc nrkr-drtqde tqbz kx,

¹¹ "Mrlxnge, tulz, oti nqni pnrm x vzpe mrnyzm!"

¹² X ncblo kc sc tqtulzpem mz mztr amrlx ngrdr, otile nqni mnrde x sc tqvzpe. Leplz amrlx nzktitxpx-atwrnr-ngrdr nide, x nzglqpxlr Gct mz nzrpi-krdr kx, "Rlr! Trgalr da kx mcku kxmule ka."

Jiszs Kqlele Matiu

Matiu 9:9-13; Luk 5:27-32

¹³ Jiszs yzlu mou mz nabz drta' Dxbu Gzlili. Zbo ngr leplz nzyrkrmqng bade x sc tqabzopele nzalvztr-krde nidr.

¹⁴ Mzli kc tqvzne-ngrde mz nabz drta' kc, mcle kc ncblo drtqde Livae. X kzdq kz drtqde Matiu. Ncblo lc nide mrlx Alfizs, x sc tqwxbu mz ofis nyzde kc tzxpekitr takes. Rpibz Jiszs bade kx, "Vz-nqblqm ninge." Livae tutxlm, axtxbzle da amrlx, x sc tqvz-nqblqpele Jiszs.

¹⁵ Mz nibrde, Jiszs sc tzmupeng badr ncblo nedeng mz ma nyz Livae. Zbz kzdung ncblo kx nzatakqting takes x kzdu-moung leplz kx nqmq krdr trka mz nzobqkr leplz nzmu-lxblr-kzng badr. Murde leplz kxnmulr lcng nzkqlung nzvz-nqblq-kzlr nide.

¹⁶ Mzli kc tzmc-ngrbzlr Farzsi x krkeng tza-lvztrng mz Lou sc Mosis da lc, drtwrdr trm-rlzpeu. Murde mz drtwrdr trtakitrdeu ncblo kxmrlz nzngini-krde kzte ncblo kxnztrkang. X

sc tzveapebzn̄g mz ncblo nedeng kx, “?Nike Jiszs tzm̄u-lxbl̄r-ngrdr badr leplz kxn̄zm̄ulr lcng?” †

¹⁷ Xlrpebz Jiszs natqdr x sc tqrp̄ipebzle badr kx, “Leplz kx trn̄zyagoxung trn̄zsutiū drtwrdr dckta. A' kxn̄zyagoxng la tzsuti drtwrdr dckta. Trvz-ngrpwc'u n̄zrkqlengr leplz kx n̄zrpilr n̄ztubqng. A' vz-ngrmc n̄zrkqlengr kxn̄zaleng alwx, murde naesablq̄tilr alwx n̄grdrng.”

Ncblo Neng Jiszs Trnzaxtx-ngrpwzlr̄u Dakxn̄zn̄g

Matiu 9:14-17; Luk 5:33-39

¹⁸ Mz nqm̄q kr lr Jiu n̄zaxtx-ngrbz dakxn̄zn̄g zbq li mz wiki kxes̄z' mz n̄zkrka'-krdr. Kzdq zbq oblamzn̄g Jon Kxawrkxtr x kr nedrng Farzsi kcng n̄zaxtx-ngrbzlr̄u dakxn̄zn̄g. X kzdung leplz n̄zvzm̄qng mz Jiszs, x sc tzveapebzn̄g kx, “?Nike ncblo nem̄qng trnzaxtx-ngr-kzpzlr̄u dakxn̄zn̄g?”

¹⁹⁻²⁰ Jiszs rpibzle kx, “Apux ncblo kxn̄ayrlz. Mz nqm̄q lcpwz trtakitrdeu leplz n̄zaxtx-krdr dakxn̄zn̄g mz mzli r n̄zabrtzn̄gr mz n̄zylznḡr, trtakitr-kzdeu ncblo nengeng n̄zaxtx-krdr dakxn̄zn̄g mzli ka mz n̄zmnc-aepztr-krbzlr̄u mz Gct. Murde n̄zabrtz-ngrdr ninge lc tqm̄ncbepo badr. A' mz nibrde, mzli kc nakatpx-ngrmc badr, sc tqtakitr-atede n̄zaxtx-krdr dakxn̄zn̄g mz n̄zkrka'-krdr.

²¹ Nzycm̄ne-ebzpxn̄gr lcng li n̄zaelwapx-ngrdr nqm̄q krnge kxm̄rna. Murde trpn̄zn̄gr ncblo kx rkxsilvztr dzlvq lrpz kxm̄rna mz n̄zakqlvztr-krde me bxnge mz lrpz kxblzlongr. Nzmu

† **2:16** Mz n̄zmu-lxbl̄rkr Jiszs badr ncblo lcng tztrkang, drtwrdr tresz'tiu badr mz alwx n̄grdr. A' rp̄ile na-aelwapx-ngrbzle nivz lr Gct badr.

nawailele, dzlvq lrpz kc tqmrna sc tqbxplixpem mz lrpz kcma tqblzlongr, x sc tqbxplix-zlwzpe myaszpxle mzli kc kai tqbxpli-ngrde.

²² X trpnz-kzng ncblo kx narbzltr dakxznng kxmrna mz ncblei kx nzbzlutrpengr dakxznng. Murde ncblei kxmule lcde ngcplxtxtr kai mz nzmrnabekr dakxznng, x da lcng li sc tza-trkatipeng. A' dakxznng kxmrna nabzlutrpwz mz ncblei kxmrna." ‡

Jiszs Nide Kxetu R Sabat

Matiu 12:1-8; Luk 6:1-5

²³ Mz kzdq z bq ngr nzangiongr, z bq lc nzrpibz Sabat, Jiszs badr ncblo nedeng nzo-zlilr lrpzki kx vztr mz kzdung lclr wit. Ncblo nedeng, sc tzcqpqxpemqng nra wit mz nc ngrdr. §

²⁴ Zbz kzdung Farzsi sc tzrpipebzlr bade kx, "Mc ena da kc tzalelr! ?Nike tzipqbrlr-ngrdr Lou sc Mosis mz nzwz-krdr mz Sabat?"

²⁵ A' mz nzaelwapxkr Jiszs kx takitrde nzoka-trngr ncblo mz Sabat, sc tqayzlupe-ngrbzle natqdr, rpibzle kx, "Krlz-angidr-kzamu da kc tqale melrmqmu King Devet kc tqamatqamu, mzli kc tzbrtale-ngrdr badr ncblo nedeng. ☆

²⁶ Nzvztrng mz ma nyz Gct mzli kc Abiata tqngini-ngrde Nardr Pris. X Nardr Pris lc kabzle mz Devet bret kc tqngi blz, kxmule-esz' rpwa'ngr

‡ **2:22** Nqm q keng tqmrna tqprmitrp Jiszs bletpx-zlwzngr mz nqm q keng pnz. X rblxbz mz kxnzetu r lr Jiu nzesz'tikr drtwrdr badr, murde rblxbz mz leplz keng tzabrtzlvzpelr nqm q keng pnz nztekqr-krdr nqm q krdr mz nztwz-krdr nqm q kxmrna. § **2:23** Lou sc Mosis rlrpx-ngrde nzcqpqpxngr wit nyz ncblo kzble, a' bz kq nzlakilzm noude. [Lou Kcpwz 23:25] ☆ **2:25** 1 Samwel 21:1-6

Loukxtr scgu. Murde bret kxtr nangqpwz pris. A' Devet ngqde bret lcde x ka-kzpzle mz dzbede nede. X nakrlzamu kx mz nzobqkr Gct, Devet trpnzng r da kx avz-rbrle. Murde Lou sc Gct rlr-ngrmle bagu nzokatrng r leplz. ☆

²⁷ Murde Gct wz-ngrde Sabat mz nzokatr-krde leplz. A' trwz-ngrdeu leplz mz nzvz-nqblq-krdr lou ngr Sabat.

²⁸ Delc ninge Mrlx Leplz, tqngininge Kxetu r Sabat. X tqrngiscnge zmatq mz nzpnzkr drtwrnge da kx takitrde nzalengr mz Sabat."

3

Jiszs Amrlzle Kzdz Ncblo Mz Sabat

Matiu 12:9-14; Luk 6:6-11

¹ Mz kzdq mou Sabat, mz nzvztrkr Jiszs mz kzdq mangr-nzkrka'ngr, rmctile kc ncblo kx mqde bz.

² Kzdu kcng Farzsi tzyrlwr-kzng mrkc nztangrtrpzng da kx vz-rbrti Jiszs. Sc tzauczti-angidrpelr mz nzmc-krdr nzmu na-amrlzle doa kxyagox mz Sabat. Murde mz drtwrdr nzamrlzng r doa kxnzyagoxng ngi nzwzng r.

³ Sc tqrpipebz Jiszs mz mrlx kc mqde tqbz kx, "Vzpxm x tu mrlc."

⁴ Zbz sc tqrpipebz Jiszs mz leplz kcng kx, "? Nike rlrpxng r Loukxtr scgu nzalengr mz Sabat? ?Nzokatrng r leplz o nzatrkatng r? ?Nzarlapxng r nzlukr ncblo o nzrlr-ngrbz nzbz-krde? Murde krlz-angidramu kx Loukxtr scgu rlrpx-ngmle bagu nzalengr da kxmrlzti mz Sabat." A'

☆ 2:26 Livae 24:9

leplz kcng nzmnc-lrpi-txpwzng murde nzkrlzlr kx mrkc tqvzki nardr vz-rbr.

⁵ Jiszs obq-ngale-ngrde nidr amrlx ngrdr. X drtwrde ngya x talvzo-ngrde nzrsaprlr-krdr natqdeng. X sc tqrpipebzle mz ncblo kc kx, "Atwztqpx mqm." X atwztqtxpxle mqde, x mrlztx pnz mou.

⁶ Zbz Farzsi kcng nzrlasztldr mangr-nzkrka'ngr. X sc tzvz-anipeng mz nzymne-etr-krdr badr ncblo neng King Herot Antipas, mz nzrpi-krdr kxnamu nznibq-krdr Jiszs.

Zbo Ngr Leplz Kxetuting Nzvz-nqblqlr Jiszs

⁷ Jiszs badr ncblo nedeng nzabrkapx-lzbqmqng mz mztea, x sc tzvzpeng Dxbu Gzlili. A' kzdq zbo ngr leplz kxetuting ngr Gzlili Provins sc tzvz-nqblqpelr nidr.

⁸ X leplz kzbleng nzyrkr-kzpqng mz Jiszs mzli kc tzxlrti-ngrdr rrx kcng tqaletileng. Nzvzkiplr taon kxetu Jerusalem, x mz mztea ngr Judiz Provins amrlx, krlzlezle me nzmncngr lr Edom kcng trngiulrJiu. Nzvz-kzpqng kcng mz nrlar LueJodzn kc tqyctxo. X nzvz-kzpqng kcng Taea x Saedon, taon kxetuting nyz lr mrkzbleng, mrkc Prla Meditrenia.

⁹⁻¹⁰ Leplz kxnzyagoxng amrlx sc tzapetr-lzbqbnzng mz zbo ngr leplz kcng mz nzbxtkrkzlr nide. Murde nzrpilr na-amrlz-kzpzle nidr da kc tqwai nzamrlzpe-krde leplz kxkqlu. Zbz rpibzle mz ncblo nedeng kx naoliqtibzlr dq bot kx nadwatr-ngrmle dxbu mz nzalvztr-krde nidr. Murde ma tzolikilvztilr nide mz nzalvztr-krde.

¹¹ X mzli kznikeng drka' kxnmncpx mz leplz nzmcpbzlr nide, sc tztaopebzng bade, tzrpipeir mz nznepx-krdr kx, "Nim mrlx Gct!"

¹² A' Jiszs rngidrlvztx-ngrbzle badr kx bzkq nzpinebzlr da lc mz leplz.

*Jiszs Mcpxle Aposol Nzpnu-esz'-nrade-li (12)
Matiu 10:1-4; Luk 6:12-16*

¹³ Zbz Jiszs vztxlz-ngrde kc newz x sc tqaveatipele krkcng tqsutl drtwrde, sc tzyrkrpe-bzng bade.

¹⁴ Mcpxle ncblo nzpnu-esz'-nrade-li (12) kx nanginidr ncblo nedeng kxnmzatxpxbzng, kx na-avztrleng. Murde, mz nibrde na-atwzlrpx-ngrdeng mz nzyapwxtipx-krdr Nrpakxmrlz.

¹⁵ X narngiscng zmatq mz nzrmazlrpx-krbzlr drka' mz leplz mz drtqde.

¹⁶⁻¹⁹ Krkcng nzpnu-esz'-nrade-li (12) tqm-cpxleng nidr seleng:

Saemon, kc tqyrlq-kzpz Jiszs drtqde Pita,

Jemes nidr mz mzlede

Jon kcng tznginidr mrlx Sebedi, x Jiszs kabzle

badr drtqdr *Boanrjis*, drtwr ngrde *mrlxng*

bzlrmei, murde nardr mrbc,

Atru (mzle Saemon Pita),

Filip,

Batolomiu (mrlx Tolmai, kc kzdq drtqde Natznel),

Matiu (kc kzdq drtqde Livae),

Tomas,

Jemes kc tqngi mrlx Alfizs,

Tadizs (kc tzipi-kzpz Judzs, mrlx Jemes),

Saemon kc tqprtr ena mz dzbede kc tzipilr
 namaszlrtpx-ngrdr gzpman ngr Rom mz
 nzmnc-krdr Israel, x
Judzis Iskariot, kc tqamwabzle Jiszs mz enqmi
 rdeng.

?Zmatq Ngr Jiszs Vzpxm Mz Gct O Mz Setzn?
Matiu 12:22-32; Luk 11:14-23; 12:10

²⁰ Zbz Jiszs yzlu mou bzq mrkc mztea
 Kzpzni²⁰m. X kzdq zbo ngr leplz kxetuting
 nzyrlwr-ngalelvz-moulr nidr badr ncblo nedeng.
 Sc tqrb²⁰lxtxpe nzmu-krdr kxpi²⁰pz mz nzokatr-krdr
 leplz lcng.

²¹ Mzli kc lr ma nyz Jiszs tqxlr-ngrdr da lcng,
 sc t²¹zrkalz²¹pemqng mz nzoti-krdr nide. Murde
 n²¹zrpilr leplz kx ngqngupe-ngrde nzwz-kato-krde.

²² X mzli lcpwz kzdung kx²²nzalvztrng mz Lou
 sc Mosis kx nzvz²²kimlr Jerusalem sc t²²zripelr kx,
 “Mrlx la mncpx-ngrm Beelsebol, kxetu r ma ngr
 wq, nide kc tqac²²lvele drka' amrlx, x sc tqrkabz
 bade zmatq mz nzmaszlrpx-krde drka' mz leplz.”
 *

²³ Zbz Jiszs sc tq²³rpipebzle kx nayrkrmqng
 bade. X sc tq²³ryapwxpebz badr mz n²³zycmne-
 ebzpxngr lcde sele. Rpibzle kx, “Trtingr! Murde
 Setzn rblx nzmapulrpx-krde drka' kztedeng mz
 nabz leplz!

²⁴ Murde kandre kx akipx-lz²⁴bq mz dzbede
 sc tzota-etrpeng, e mzli kxpi²⁴pzne trnatu-
 amqngiung.

* **3:22** Mz natq lr Grik drtq Beelsebol drtwr ngrde *kxetu r ma ngr wq*, kc tqngi kzdq kz drtq Setzn.

25 Mz nqmq lcpwz doa lr ma kxes' kx nzamnc-dali-lzbqng, nzatrkatilzbqng.

26 X mou, nzmu Setzn badr kztedeng naotablrlr mz nidr esz'-krdr x nzaki-lzbqng, e zmatq ngrde mz nzacive-krde leplz sc tqmanepe x tqyrkrpx-pebz.

27 Mz nzmu-krde lcde, Setzn apule ncblo kx xplr zlww. A' napebqtx kai, x ncblo kc tqdwatratebz ma nyzde mz nztwz-krde dztudeng. Da kc tqwai nzarlapx-ngrbz leplz mz mqde.

28-30 "Rpianu kx nabzng mncpx-ngrm drka'. A' da angidr' lc napibo bamu. Gct krlzle nzipqpx-krde alwx x nzipxivitingr amrlx. A' mz nzipi-krmu lc zmatq rnge vzpxm mz drka', pivxitiamu Mqngrkxtr kc tqngi nou angidr' zmatq lc. X trpnzng nzipqkr Gct leplz kx pivxitile Mqngrkxtr, murde atao-lzbq mz alwx kx yctx alo." †

*Kx Ngi Angidr' Lxede Jiszs X Mzledeng
Matiu 12:46-50; Luk 9:19-21*

31 Zbz lxedede Jiszs x mzledeng nzkr'z'z'lr ma kc tqmnc-ngrde. A' rblx nziprtr-krbz'lr brma, murde zbo ngr leplz kcng tzmncng mrkc. Nzatzl'rtr-ngrbzng nrpa bade kx navzpx-kaip badr.

† **3:28-30** Gct krlzle nzipqtx-krpwzle leplz kcng tzplzpxbz'lr alwx ngrdrng bade. A' doa kx pivxitile Mqngrkxtr pxtpx-ngrde nide. Mz nzmu-krde lcde, rblx doa lc nzyckr drtwrde alwx ngrdeng, murde Mqngrkxtr dekc tqokatrle leplz mz nzmc-krdr alwx ngrdrng. Doa kx pivxitile Mqngrkxtr trpnzng nzmckrde alwx ngrdeng mz nzplzpx-krbz'leleng mz Gct. X trpnzng nzipqkr Gct nide.

³² Kzdu leplz mz zbo ngr leplz kcng tzwxbu-ngalelvzlr Jiszs, nzrpibzlr bade kx, "Lxem x mzlemqng sc tztutrpqng yz, nzrpilr namclr nim."

³³ X sc tqrpibezle kx, "'A' nekeng tqngi angidr lxenge x mzleengeng?"

³⁴ Obqtxbz mz kxnrlnxngiting kcng tzwxbu-ngalelvzlr nide, x sc tqrpibezle badr kx, "Doa kxzapulr nimu lang tqngi lxenge x mzleengeng!"

³⁵ Murde krkc tqvz-nqblqle me pnz drtwr Gct, nide la mzleeng x inwenge x lxenge angidrng."

4

Drct' Pwx Kx Bletipx

Matiu 13:1-9; Luk 8:4-8

¹ Mz nibrde, Jiszs dwapx ma kc x sc tqvzope mz nabz drta' ngr Dxbu Gzlili. Zbz zbo ngr leplz kcng kxzetunepxlr kc, sc tzyrlwr-ngalelvzpelr nide. X sc tqdwaope mou mz bot, mz nzalvztrkrde nidr kcng tzyrlwrpxbzng mepz.

² Yapwxtibzle badr kzdung nzymne-ebzpxngr mz nzalvztrkrde nidr da kxkqlu. X mz zbq lcde Jiszs yapwxtibzle badr nzymne-ebzpxngr lcde seleng.

³ "Lalztqmamu bange! Kzdg mzli kzdq kc ncblo oliqtile drtc' ngr nrlanc nyzde. Zbz sc tqarlxpele nra wit nyzdeng, murde rpile nayrkqlvzle mz drtc' mz nibrde.

⁴ A' mzli kc tqarlx-ngrdeleng, kzdung tationg mz lrpzki kx drtc' ngrde mqngi, x nzngqtilzmqng utc.

⁵⁻⁶ X kzdung nztaong mz drtc' kxmelx, murde ycom mz rplz. Nzlvcpulz-animqng, a' nzglrting

x nzmztx-ani-moung mz nepi, murde dzbrdr trvzou la.

⁷ X kzdung mou nztationg mz drtc' ngr ncn-grbz. Krlcng nzlvcpumilzm lxbi x nzyrlvilvzo lxbi nidr x trnzpa-pnzung.

⁸ X kzdung nztao mz drtc' kxmrlz. Krlcng nzyrlvzlmqng x nzpang. Kzdung nradr pipz, kzdung nradr kqlu, x kzdung nradr kqlutx zlwz.

⁹ Doa kx yrplapx, na-abzle nztwz-krde drtwr ngr natq lc.”

*Drtc' Pwx Kx Bletipx Ngi Nqmq Kr Leplz
Matiu 13:10-23; Luk 8:9-15*

¹⁰ Mz nibrde mzli kc Jiszs tqmnc-ngrde esz'-krde, aposol badr kzdung kz leplz nedeng, sc tzrpipebzlr bade kx nayapwx-dalitipxbzle badr nike tqngi drtwr ngr nzymne-ebzpxngr lc.

¹¹ Sc tqrpipebz Jiszs kx, “Ayrbq-angidrbo bamu nqmq kr Gct kc tqyc-kapq mzli kc mz nzngini-krde King r leplz nedeng. Murde doa kx lxngitile Gct, Gct sa na-aetunepxbzle nzrkrlez-krde da angidr x sa na-axplrbzle nzrlxngiti-krde. A' mz leplz kcng tzpxpx-ngrdr nzxlr-krdr da angidr, napipxbo badr mz nzymne-ebzpxngr.

¹² Nidr leplz kcng tqycmnetrngr profet Asaea mz nzrpipxkr Gct kx,

‘Kxmule-esz' nzobqng, a' trnzkrlezlru da angidr. X kxmule-esz' nzlaltqng, a' nardr tryrplatrpwzu. Mz nzmu-krde lcde, rblxbz badr nzyzlu-krmlr bange mz nzatubqti-krnge nabzdr.’” ✧

13 Kctipx Jiszs trnzkrlz-krdru nzymne-ebzpxngr lc, sc tqrpipebzle badr kx, “? Tryrplatitru narmu nzymne-ebzpxngr lc? Nzmu kx tqmule lcde, sa narblxbz bamu nztwz-krmu drtwr ngr nzymne-ebzpxngr amrlx.

14 Drtwr ngr nzymne-ebzpxngr kc nide sele: Nra wit kcng tqarlx ncblo ngi natq Gct.

15 Drtc' pwx ngi nqm q kr leplz. Lrpzki lc drtc' ngrde tqmqngi, drtwr ngrde leplz kcng nardr tqmqngi mz nzxlz-krdr natq Gct. Murde mzli kznikeng nzxlz-ngrdr nrpa ngr Gct, Setzn vzm x katxpxbzle badr.

16-17 Drtc' kc tqmelx drtwr ngrde leplz kcng nabzdr tqngrgo. Kxmule-esz' nzxlzlr natq Gct x nzabrtzlvzlr nztwz-krdrle, a' natq Gct trpnzngz dzbrde x trvzou la mz nabzdr. Nzrlxngiti-krdr mrbcnepwz, murde rblx nzlolz-amqngi-krdrle mzli kc tqprtztngz nzkxpungz x nzatalzngz kcng tzvzpxmqngz mz nzrlxngitingz.

18-19 Drtc' ngr nibr ncngrbz drtwr ngrde leplz kcng drtwrdr tresz'tiu. Kxmule-esz' nzxlzlr natq Gct, a' trbrtiu drtwrdr. Murde nzaoti-zlwzkr drtwrdr dalr nrle kxkqlu nzapulr lxbi kcng tqyrlvilvzolz nabzdr, x trpnzngz nardr.

20 Drtc' kxmrlz drtwr ngrde leplz kcng nabzdr tzoliqtilr nzlxngiti-krdr natq Gct. Murde nztwzlr x nzlxngitilr natqde, x nra nzrlxngiti-krdr yc-zvzbz, mz nzvectr-krmlr leplz mz nzmnc-nqblq-krdr Gct. Kzdung mzli leplz kcng nzvectrplr nzpipzneng, kzdung mzli nzkqlung, x kzdung mzli nzkqlutx-zlwzng.”

Gct Suti Drtwrde Nrpakxmrlz Natalvzpxle

*Lepłz Amrlx**Luk 8:16-18*

²¹ Mz nzaelwapxkr Jiszs kx Nrpakxmrlz na-apule zyłzr, rpibzle kx, “Lam trnztekatru sc tzałalvzope topla. X trnzawxbulzpwzu mz nabz da. A' lam nzadolzpwz wq, murde leplz namctr zyłzr mz nzdwatr-krmlr brma.

²² Mz nqmłq lcpwz, kxmule-esz' Nrpakxmrlz trkrlzkapzle leplz amrlx, a' sa naopxbz badr kalr. Murde mzli lc, sa nayrplatitr nardr x naaelwapx-ngrbzle da kx yc-kapqbepz badr.

²³ Doa kx yrplapx, na-abzle nztwz-krde drtwr ngr natq lc.”

²⁴ Rpi-mopwz Jiszs badr kx, “Na-aoti angidr drtwrmu natq Gct kc tqxlramu murde natwz-kzamu mz nzmnc-krmu. Mz nqmłq kcpwz tqrka-ngrnamu, sa na-ayzłubz Gct bamu. A' nzrka-krde myaszłzle kxmu nzrka-krmu.

²⁵ Murde doa kx twzle natq Gct mz nzmnc-krde, sa natwz-moule nzyrplapxngr mz kzdung kz natq Gct. A' doa kx trtwzleu natq Gct mz nzmnc-krde, trnatwz-mouleu nzyrplapxngr. Kxmule-esz' nzrkrlzngr kx topwzne ycbz bade, a' sa nakatpx-kzpz Gct bade.”

Nzycmne-ebzpxngr Nznginikr Gct King

²⁶ Jiszs pi-mopwzle kzdq nzycmne-ebzpxngr. Rpibzle kx, “Nzwzkr Gct mz nzvectr-krmle leplz bade mz nzngini-krde King rdr apule ncblo kx pe rtq wit mz nrlanc nyzde.

²⁷ Mz nibrde sc tqaletipele kzdung kz nzwzngr. Mwi angidr mz nrłckxbq x traotipeu drtwrde

rtq wit kcng tqpetile. Nzlvcpulzmqng x nze-tulzmqng, a' ncblo kc tqpe, trkrizleu kxmu nzyrlvzlvz-krmlr.

²⁸ Murde drtc' esz'-krde kc tqwztr mz nzyrlvzlvz-krmlr x nzpa-krdr. Da ayrnrngr kx yrlqzbzle nzpa-bclz-krdr, x mz nibrde nztengzlvzkr nrpq nradr. Zbz nradr kcng tztutrpebzng.

²⁹ X mzli kc tzbrpengr nradr, kx ngi nyz nrlanc lc otilc toki scde, sc tqlakitilzpemleng, murde mzli r nzrkqngr nradr kaputrpem."

*Nzycmne-ebzpxngr Rtq Nc Seri
Matu 13:31-35; Luk 13:18-19*

³⁰ Zbz sc tqrpipebz Jiszs kx, "Nzkqlukr leplz kcng namnczlvzng mz Gct kalr mz nznngini-krde King rdr apule nike? Nzycmne-ebzpxngr kznike takitrde nayokaetipx-ngrbole?"

³¹ Apule rtq nc seri kx peti ncblo mz drtc'. Kxmule-esz' topwz zlvz,

³² a' mz nibr kzdung mzli etulzm x sc tqngipe kzdq nounc kxetu. *X utc kxkqlung nzmncng mz zmyo ngrde.*" ✧

³³⁻³⁴ Jiszs yapwxtibzle nzycmne-ebzpxngr kxkqlu kxmule lcng mz nzalvztr-krde leplz mz nrpa ngr Gct. Alvztrle zbo ngr leplz mz nzycmne-ebzpxngr txpwz, murde da kx takitrde nzyrplatitr-krbz nradr kxpipz nzalvztr-krde delc. A' mz nibrde, mzli kc namncpe-ngrdr esz'-krdr badr ncblo nedeng, sc tqyapwxtipebzlvzng drtwr ngr nzycmne-ebzpxngr lcng badr.

✧ **4:32** Sam 104:12; Esikel 17:23; 31:6; Daniel 4:12

Jiszs Aole Nrwx Mz Kzdz Nenq Kxetu

Matiu 8:23-27; Luk 8:22-25

³⁵ Mz zbzq lcpwz mzli kc tqvzopengr nepi, Jiszs rpibzle mz ncblo nedeng kx, "Na-alilvckiopeku mz nrlar dxbu kc."

³⁶ Zbz sc tzrlaszpelr zbo ngr leplz kcng x sc tzprtze-kzpzng mz bot kxetu kc tqwxbuope-ngrm Jiszs, x sc tzalilvcopeng. X kzdung kz leplz nzvo-nqblqopebzlr nidr mz bot kcng tzdwa-kzng mrkc.

³⁷ Zbz sc tzpwrkilvcpe-ngrdr kzdq nenq kxetu. Ebio kxnzetuting prtzm x nzvztiobzng mz nabz bot kc. X sc tzmulr naboopeng.

³⁸ A' mzli lc Jiszs sc tqmwi mz mrtwz' kxrm, glz mz pilo. Nzvzbzng bade sc tzameopelr. Nzrpibzlr kx, "Kxakrlz, okatr nigu! Nabzpeku!"

³⁹ Jiszs tulzm x lclvtxde nenq x ebio, rpibzle kx, "Esakiamu! Mnc-lrpiamu!" X mzli kcpwz nrwx kc tqvope. ✧

⁴⁰ Zbz sc tqrpibezle mz ncblo nedeng kx, "?Memule tqmwzlr-zlwz-ngrnamu? ?Trlxngitikalamu ninge?"

⁴¹ A' nzmwxlr-zlwzbeng, sc tzerpi-etrepelr kx, "Eke! ?Ncblo kznika? Nenq x ebio nzvz-nqblqlr natqde."

5

Jiszs Maszlrpx-ngrde Drka' Kx Xplr Mz Kzdz Ncblo

Matiu 8:28-34; Luk 8:26-39

¹ Jiszs badr ncblo nedeng nzkaputrpzng mz nrlar Dxbu Gzlili mz nrlarnrlc kc tqycngr taon kcng

✧ 4:39 Sam 65:7; 89:9; 107:29

nzpnu-esz', mrkc tzmncngr leplz kcng trngiulr-
Jiu. X kzdq taon lcdeng dekc tqngi Gergesa. *

² Mzli kcpwz Jiszs tqpoo-ngrmle mz bot, vzm
bade kc ncblo kx mncpx-ngrm drka'.

³⁻⁴ Dekc tqmncpx-ngrmle mz butqbr kx
nzryrtzmqpx-ngrm namz ngr leplz. Apule ncblo
kxayo, xplr-esz'ngrtx x rblx nzamnc-moungr
nide x nzatolvangr. Nzwrde kqlupe kx nzpe-
ngrbz mqde x nanycde mz nqvi x sen, a' zvz
tqnikitileng x sa tqvz.

⁵ Zvz, ngrlx x nrckxbq, nzvzne-krde mz butqbr
x mz nra, tqkabo x tqtakrti-lzbq mz rplz.

⁶ Kx mcpxmlle kc Jiszs rlru, sc tqngrlrpebz,
rweobz zpr bade mz nzangio-krdele.

⁷⁻⁸ Rpibz Jiszs mz drka' kc kx, "Drka', prszpx
mrlx la!" Sc tqnepe, tqrpipele kx, "Vrr! Jiszs,
Mrlx Gct kc tqmyalz-esz'ngr! ?Nike tqotime?
Esalzngz mz drtq Gct kx bzkq ayrplapxq nrkr-
drtqngel!"

⁹ Jiszs veabz kx, "?Drtqm neke?" Rpibzle kx,
"Drtqngel Siu Kqlu, murde kqlu-zlwzkr."

¹⁰ X sc tqyrnititr-zvzbzle mz Jiszs kx bzkq
atwzlr-ngrde nidr mz nrlarnrlc kzble.

¹¹ X mnc-aepztrpz mrkc kzdq nrtrq r poi kxetu
sc tzmung mz nra.

¹² X drka' kcng nzyrnititr-mopwzlr mz Jiszs kx,
"Atwzlr-ngrbz nigr mz nrtrq r poi kc, murde
namncpx-alzupgr badr."

¹³ Zbz sc tqrlrpe-ngrbz Jiszs nzvz-krdr. Drka'
kcng nzprsrpxlr mrlx kc x nzdwatr-alzung mz
poi kcng. X nrtrq r poi kc, poi ngrde siu-li (2,000),

* **5:1** Mz kzdung nzryrngr kcng pnz, taon lc nzrpibz Gadara o
Gerasa.

tzngrlropeng mz nqngitrlqli, nztaong mz nabz dxbu kc, x nzboong amrlx.

14 Zbz ncblo kcng tzaclveng, nzngrlring sc tzpinepelr nrpa ngrde mz mztea x nabz nrlanc kcng. X leplz kxnzkqlung sc tzyrkrpebzng mz nzmc-krdr da kc tqprt看.

15 Nzvzmqng mz Jiszs x nzmcpelr ncblo kc tzprszpx drka' siu kqlu, wxbu-lrpipe, drtwrde opxpe, x pxipe. Kx nzmc leplz kxnzkqlule, sc tzmwxlrpe-ngrdr zmatq ngr Jiszs.

16 Leplz kcng nzrmc-kaing da amrlx kcng tqprt看 nzpinebzlr mz kzdung kz leplz be ngr Jiszs ncdrr ncblo kc, x drka' x poi kcng.

17 Zbz leplz kcng nzyrnitrpzlr mz Jiszs kx navzpe.

18 Mzli kc Jiszs naprtzpe-ngrde mz bot, ncblo kc tqamrlzle vzm bade sc tqyrnititrpzbzle mz Jiszs kx navzng badr.

19 A' tr-rlrtx-ngrpwzu Jiszs. Rpi-alzupwzle bade kx, "Yzlubz mz lr mrnyzm x pibz badr da kxmrlz kc tqalebz Gct bam mz nzokatr-krde nim."

20 Zbz mrlx kc rkalzm x sc tqayotipele nrlarnrlc kc mz taon kcng nzpnu-esz'. Tqyapwxtinepele da kxmrlz kcng tqalebz Jiszs bade. X leplz amrlx kcng tzxlrbzlr nzyapwx-krde nzketitpxplr zmatq ngr Jiszs.

Inyx Kzdq Kxetu R Mangr-nzkrka'ngr X Olvz Kc Tqmaletrpzle Lrpz Sc Jiszs

Matiu 9:18-26; Luk 8:40-56

21 Jiszs badr ncblo nedeng nzalilvckio-moulr nrlar dxbu kc x zbo ngr leplz sc tzyrlwr-ngalelvzpe-moulr nide mz nabz drta'.

22-23 Zbz kzdq ncblo drtqde Jaerzs sc tqkapu-
trpem. Nide kzdq kxetu r mangr-nzkrka'ngr.
Rtctxo-lzbq-ngrbz mz nanyc Jiszs x sc tqyrnititr-
pebzle kx, "Inyxnge yagox x sc nabzpe. Vzm bagr
x maletprz nrkrdrdqde x sa namnc zpwx mou."

24 Zbz Jiszs sc tzvzpeng ncdr. Nzmnpcxmqng
mz mzlr leplz kxkqlu, kxnzrdrlvzti-lzbqng mz
nzvz-krdr.

25 Zbz kzdq olvz kx tresakiu nzrpx-krde temz
prtr-kzpz mz zbo ngr leplz kcng. Nzrpx-alo-
krde lc temz, twztipelele yiz nzpnu-esz'-nrade-li
(12). ☆

26 Nzabzpebz dckta kxnzkqlung nzamrlz-
krbzlr nzetqkr drtqde, x trau scdeng yrkrtepe
mz nzxpeti-krde nidr x lue kxpiz kxkqlu. Tzrpilr
nzamrlzngr drtqde, a' trpnzngr. X sc tqetunepx
zlwz.

27-28 Olvz lc xlrle nrpa ngr nzamrlzkr Jiszs
kxnzyagoxng. Sc tqrpipe drtwrde kx, "Nzmu
namaletxtrpo ye lrpzde, drtqnge kc tqmrlzpe."
Sc tqrbinginetrpebz mz zbo ngr leplz kcng mz
nibr Jiszs, x sc tqmaletrpebzle lrpzde.

29 X mzli kcpwz mepyr ngr drtqde sc tqmin-
grtrpe x tqxngipebzle kx drtqde mrlzpe.

30 X sc tqxngipe-kzpz Jiszs kx zmatq vzpx-
pem kcng mz drtqde x amrlzpele kzdq leplz.
Lxlvrkimle mq x mzte kc tqvecpe mz nabz
zbo ngr leplz kcng x sc tqveapebz kx, "?Neke
tqmaletrple lrpznge?"

31 Ncblo nedeng nzayzlu-ngrbzlr natqde kx,
"Rlr! ?Trmcwq zbo ngr leplz kang tqmnpcx-
ngrme? ?Memule tqveati-ngrn kx maletprzle

nim?"

³² A' Jiszs mzte sc tqvec zvz, murde namc-zpwxle leplz kc tqbxtrpzle lrpzde.

³³ Olvz kc kx krlztrpele mz drtqde nzmrlzpekrde, sc tqnrncnexpzebz mz zmwxlr. Kxmuleesz' mwxlr a' atuobz zpr mz Jiszs mz nzangio-krdele, x sc tqpipebzle da angidr kc tqveatile.

³⁴ Rpibz Jiszs kx, "Inyxnge. Nzlxngiti-krm ninge amrlzpele nim. Vzpe x bzkq da kx pnzpe drtwrm, nzmrlz-alo-krm lape." †

³⁵ Mzli kc tqycmne-ngrbe Jiszs, kzdung ncblo kxnzatwzlr-ngrmqng mz ma nyz Jaerzs sc tzka-putrpemqng. Nzrpibzlr mz Jaerzs kx, "Kxetu, inyxm bzpe. Bzkq akxputipeq kxakrlz la."

³⁶ A' rpibz Jiszs bade kx, "Kxmule-esz', bzkq drtwrm talvzo, a' lxngiti ninge."

³⁷ X trpnzngr mou leplz kx rlr-ngrbzle nzvz-krdr badr, a' ngi txpwz Pita, Jemes, x mzlede Jon.

³⁸ Kx nzkrlybzlr kc ma nyz Jaerzs, sc tzxlrpelr nzyrni-katokr leplz kcng amrlx mrkc.

³⁹ Nzdwatrpzng x sc tqrpipebzle kx, "Bzkq yrni-katopeamu. Doa lc trbzu, a' mwine ye!"

⁴⁰ A' nzyrpalelvzlr nide. Mz nzmukrde lcde, avztxpxleng yz amrlx ngrdr. X sc tzvztrpeng badr trte x lxe doa kc mrkc tqyrbqng nide.

⁴¹ Zbz malebzle mqde, sc tqrpipebzle kx, "Tzlitz, koum!" drtwr ngrde "Doa olvz lc, tulzm!"

† 5:34 Mwxlr-ti-lzbq zlvz mz nike na-alebz Jiszs badr zbo ngr leplz kcng bade. Murde nzyagox-krde batrpe-kzpzle trnztakitr-krdeu nide mz nzprtrngr mz nzangiong; x batr-kzpzle doa kcng nabxtrpzlr nide, trnztakitr-kz-krdr mz nzprtrngr mz nzangiong mz nzvz-nqblq-krde Lou sc Mosis. Mc Livae 15:19-30.

⁴² X mzli kcpwz doa olvz kc tulzm x sc tqvznepe. Kx nzmc lxedede x trtedede da lc nzktitx-pxlr. (Yiz ngr doa olvz lc nzpnu-esz'-nrade-li.)

⁴³ A' rngidrtxtr-ngrbz Jiszs badr kx bzkq nzlenedr nrpa ngr da kc. X rpi-kzpzle kx, "Kabzmu du dakxnzng namu doa la."

6

Jiszs Nzpxpxngr Lr Mztea Nyzde Naszret Matiu 13:53-58; Luk 4:16-30

¹ Jiszs rkalzm mrkc, sc tzvzpeng badr ncblo nedeng mz mztea nyzde Naszret.

² Kx krlzbzle kc Sabat, Jiszs sc tqvztrpe mz mangr-nzkrka'ngr nyzdr, mz nzalvztr-krde leplz nzqqlung kx nzlalztqng. X nzktipxlr nzalvztr-krdeng. Zbz drtwrdr lctrpz bade murde mz nzobq-krdr nide ncblo txne a' alvztrle nidr apule kxrngisc zmatq. Sc tzveatipe-moulr nide mz nzrpi-etr-krdr kx, "?Myx me twzkimle nzalvztrngr lc? ?Nzyrplapxkr nar kznika tqycbz bade? ?Myx kxmu nzale-krde rkx kcng tqxl-rkung?"

³ ?Trnipleu mrlx ncblo kc tqrlrmzti da kx wz-ngrdeng, mrlx Mxri? ?X trngiu mzledeng Jemes, Joses, Jud, x Saemon? ?X trngiu inwedeng lcng tqmncu badr mrka? Mrlx lc trngiu ncblo kxmatq." Zbz sc tzpxpxpe-ngdrdr nide x nzalvztr-krdeng, x trnzlxngiti-kzlru nide.

⁴ Zbz sc tqrpipebz Jiszs badr kx, "Kxmule-esz' lr mztea amrlx nzamatqlr profet, a' lr mztea nyzde,

x kxnginideng, x lr ma nyzdeng trnzamrluelru nide.” ☆

⁵ X mz trnzlxngiti-krdru lc nide, rblxbz bade nzale-krde da kxmatq mrlcde, a' ngi txp wz nzbxtrkr mqde kxnzyagoxng kxnzpipzneng x nzmrlzng.

⁶ Jiszs kctitxpx-zlwzle trnzlxngiti-krdru nide.

Jiszs Atwzlrpx-ngrde Aposol Nedeng Mz Nzlep-xkrdr Nrpakxmrlz

Matiu 10:5-15; Luk 9:1-6

Mz nibrde Jiszs sc tqvzpe mz kzdung kz mztea mrlcde mz nzalvztr-krde.

⁷ Zbz sc tqkqlepele ncblo nedeng kcnng nzpnu-esz'-nrade-li (12). Mz nzmnc-lz-krbzlr bade, sc tqrkapebz badr zmatq ngr nzmazlrpx-krdr drka'. Mrlz, sc tqatwzlrpxpe-ngrdeng nzli-lxblrng mz mztea kxes'.

⁸ Rpibzle badr bzkq da kx natwzlr, da kx apule dakxnzng, bxli, x trau. A' nangi txp wz nctoko scdr,

⁹ x sadol ngr nanycdr. A' bzkq nzrtwzng lrpz krali.

¹⁰ X rpi-kzpzle badr kx, “Mztea kznike nzabrt-zlvzlr nzmnc-krmu badr, ma kznike nzrlr-ngrbz namnc-ngrnamu, mncamu ma lcde esz', navz mzli kx rlasz-ngrnamu mztea lcde.” *

¹¹ Nzmu lr mztea kx trnzamnc-zpwxlr nimu x trnzalaltq-kzpwzung bamu, rlaszamu mztea la.

☆ **6:4** Jon 4:44 * **6:10** Mz ngalrde 10, rpibz Jiszs badr kx bzkq nzayrkrpxlr ma ngr mztea mz nzmwi-krdr, da kc tzwai ncblo kxnzrlxng da. A' namwi-ngrdr ma naesz'txu, murde namatq x namrlue angidr mz drtwr lr mztea nidr. X sa narkabzng badr dakxnzng, lrpz, x trau kx navzpxm mz nzwztr-krbzlr badr.

X rtc-ngrbzm rplz nakrlz-ngrdrle kx nqmq krdr trka mz nzapu-krdr kxnmnc-mrbrng, x sa n-ayrplapx Gct nidr.

¹² Zbz ncblo neng Jiszs sc tzvzpeng mz mztea kxkqlu, mz nzpine-krbzlr mz leplz nztekqtr-krdr nqmq nr drtwrdr mz alwx ngrdrng.

¹³ X nzmazsrlrpxng drka' kxznkqlu mz leplz, x nzamrlz-kzng kxnzyagoxng mz nzaelu-krdr nidr mz tolo.

*Nzrnibqngr Jon Kxawrkxtr
Matiu 14:1-12; Luk 9:7-9*

¹⁴ Mz mzli lcng, nrpa ngr Jiszs x da kx aletileng xlrtri kz King Herot Antipas, kc tqaclvele Provins kc Gzlili, murde leplz ngr mrkang kqlu sc tzymnetr-ngrdr Jiszs. Kzdung nidr nzrpilr kx, "Mwx ncblo lc, Jon Kxawrkxtr elc, tulzpe-mop mz nzbzng. Dekc tqale-ngrde rxx kcng tqmatq-esz'ngr."

¹⁵ Mz drtwr kzdung leplz Jiszs nide Profet Elaeja kc tqaleti rxx kxkqlu mzli kc bqnc. X kzdung leplz nzrpilr kx nide profet kxmna kx apule profet kcng bqnc tzrngiscng zmatq.

¹⁶ Kx xlr kz Herot nrpa ngr Jiszs, sc tqrpipele kx, "Jon Kxawrkxtr kc tqpibo mz ncblo ngr vea nengeng nalakipx-krbzlr narde, lupe mou."

¹⁷⁻²⁰ Nzbzkr Jon kxmule sele. Herot twzle olvz r mzlede Filip. X Filip lc sc tqlobe kx tqyrlzti Herot kc olvz rde. Drtq olvz lc Herodizs. A' Jon pivzvbzle mz Herot kx ngi-alwxbz mz Gct nzyrlzti-krde olvz r mzlede. Natq lc ngyangr drtwr Herodizs x rpile nanibq-ngrde Jon. Zbz Herot atwzlr-ngrde ncblo ngr vea nedeng, nzlolvzlr

Jon x na-adwatrlr mz presin. A' rblx nznibqkr Herodizs le, murde Herot mrlue mz drtwrde Jon x krlzle kx nide ncblo kxmrlz x tr, dekc tqamnc-zpwx-ngrdele. Suti drtwrde nzvz-krbz Jon bade mz nzlalztq-krbzle mz nzryapwx-krde, kxmule-esz' narde tryrplatrpwzu mz natqdeng amrlx.

²¹ A' kzdq zbq mrkc tqpnz drtwr Herodizs mz nznibq-krde Jon sc natutrpe. Mz zbq kc tqkaputr-ngrm nzrmcngr mz Herot, alebzle kc nzmungr badr ncblo kxnmzatq nedeng x kxnzeturng mz provins nyzde.

²²⁻²³ Mzli lc tzyrlwr-ngrdr, nzabrtzlvzlr inyx Herodizs mz nzela-krbzle badr mz nzelangr kx batrpzle ncblo nzrkcmnzngn nide. Sc tqrpipbez King Herot mz doa olvz kc kx, "Nike suti drtwrm, rlxtim bange mzli ka, x sa nakabo bam. Nike narlxtime bange esalz-ngrne kx sa nakabo bam, kxmule-esz' kzdq nctq drtc' ka tqaclvex o dztungeng kxkqlu!"

²⁴ Zbz doa olvz kc sc tqvzpebz mz lxede, rpibzle kx, "?Nike narlxtime mz King?" Rpibz lxede kx, "Rlxtime nar Jon Kxawrkxtr."

²⁵ Doa olvz kc ngrlrbz mz King, rpibzle kx, "Suti drtwrnge nalakipxbzme nar Jon Kxawrkxtr x katim dis bange mzli ka, mz nzklz-krng kx bz-angidrpe."

²⁶ King Herot trsutiu drtwrde nznibq-krde Jon. Drtwrde vztx, a' yacalqpe. Murde esalz lukurnngr nzm trnakapwzleu nike suti drtwr doa olvz kc, ngi da kx myangr drtqde mz mzlr kxnzetu kcng.

²⁷ X sc tqatwzlrpe-ngrde kc ncblo ngr vea mz presin kx nalakipxbzle nar Jon. Ncblo ngr vea lc

vz mz presin, sc tqlakipxpebzle narde.

²⁸ Zbz sc tqtwztipemle dis, tqkapebzle mz doa olvz kc. X tqtwzpebzle mz lxedede.

²⁹ Kx nzxlr oblamzng Jon nznribqngr nide, sc tzotipelr namz ngrde tzyrtzmqpelr mz gq kx nzwztrngr mz butqbr mz nra.

Jiszs Apuleng Ncblo Siu-nzlvqn (5,000)

Matiu 14:13-21; Luk 9:10-17; Jon 6:1-14

³⁰ Ncblo neng Jiszs nzyzlumqng bade mz nibr nzwz-krdr mz nzalvz-krdr x nzamrlzti-krdr kxnzyagoxng, x sc tzpipebzlr bade da amrlx kcng tzalelrng x tzalvztr-ngrdrng.

³¹ Zbz sc tqrpipebz Jiszs badr kx, "Narlasztx-kaiku ena zbo ngr leplz kang, navzku me yc-nrwxngr x na-amatxku." Pibzle da lc murde trtxpengr scdr mzli kx namu-ngrdr x na-amatilir. A' leplz kxnzkqlung sc nzyrkrmqng mz Jiszs, tzvzmqng kcng x tzyzlung kcng.

³² Zbz sc tzprtzpeng mz bot x tzalilvcopeng mz kzdq nrlc kx trngiu mztea murde namncng elr.

³³ A' leplz nzkqlung nzmclr nzrkalz-krmlr x nzglxlr nidr. Zbz leplz lcng, nidr badr leplz ngr mztea kxkqlu ngr nrlarnrlc lcde, sc tzvzkipebzlr mepz, x nzmnc-kaing mrkc na-alilvckitr.

³⁴ Zbz mzli kc Jiszs tqvztrpe-ngrbzle mepz, sc tqmcepele zbo ngr leplz kcng tzyrlwrng tzaenzlilr nide. X sc tqyctx-zlwzpengr drtwrde nidr. Murde rblx nzokatr-lzbq-krdr mz nzkrlyz-krbzlr Gct, a' nzapulr sip kcng trpnzngr kxaclevele nidr. Mz nzmukrde lcde, kxmule-esz' Jiszs badr ncblo

nedeng nzrpilr na-amang, a' alvztr-ngrde leplz lcng da kqlu. ☆

³⁵ A' mzli kcpe mz milzpq ncblo nedeng sc tzipipebzlr bade kx, "Nrlc ycpe pipz nzbq-krde, a' trpnzngr me narmctingr leplz lcng dakxnzng.

³⁶ Atwzlrpengr nidr mz mztea x mz nrlanc kcng tzyctineng mrlang, murde naxpeng nadr dakxnzng."

³⁷ A' ayzlu-ngrbz Jiszs natqdr kx, "Nimu kx narkabz nadr dakxnzng." Nzrpibzlr bade kx, "Rblx nzvz-krgr nzxpe-krgr dakxnzng kx natak-itrde leplz lcng murde trau kqlu ela naxpengr."

³⁸ Rpibz Jiszs badr kx, "Vzamu x mcamu kx yrlqamu dakxnzng tqivr." Nzmtxdr x sc tzipipebzlr bade kx, "Yctxpqng bagr bret nzlvqn x nc kxsupe li."

³⁹⁻⁴⁰ Zbz Jiszs sc tqrpipebzle badr kx na-awxbuong leplz mz nabr mz dzbedeng kx krlzbzle trtqki-esz' (100) x nzpnu-nzlvqn (50).

⁴¹ Mz nibr nzwxbuo-krdr, Jiszs kalzmlc bret kcng nzlvqn x nc kcng li, x obqlz mz bongavz mz nzkrka'ngr, x sc tqawipebz mz Gct. Zbz lopxitile bret, x sc tqkapebzle mz ncblo nedeng, tzakipebzlr mz leplz kcng. Zbz aki-kzpzle nc kcng li mz leplz amrlx.

⁴² X nzmung x nelzdr krlctxtrpz.

⁴³ Mz nibr nzmu-krdr, ncblo nedeng nznulvzolr toplu nzpnu-esz'-nrade-li mz nctq bret x nc kcng tqyctxo.

⁴⁴ X mz nzrlwxngr ncblo txpwz krlzbzle siu-nzlvqn (5,000), a' trnzrlwxtrpwzu olvz x doa

☆ **6:34** Matiu 9:36; Jon 4:34-38

kxntztopwzng.

Jiszs Vzneom Mz Lue Ngr Dxbu Gzlili

Matiu 14:22-33; Jon 6:15-21

⁴⁵ Mzli lcde, Jiszs pibzle mz ncblo nedeng kx naprtzng mz bot x na-alilvckio-kailr mz nr-lar dxbu kc tqycngr mztea Betsaeda, mzli kc tqatwzlr-ngrde leplz kcngr mrnyzdr.

⁴⁶ Mz nibrde, sc tqvzdzpe mz newz mz nzkrka'ngr.

⁴⁷ Mz nina, ncblo nedeng sc tzmncrtpqng mz bot mz zpzu r Dxbu Gzlili, x Jiszs sc tqmncbe esz'-krde mepz.

⁴⁸ Zbz kzdq nenq kxetu sc tqwqpe x sc tza-vzopelr nqni ngr bot scdr, x tzyapeng. Mz nibr nzkrka'kr Jiszs, mzli kc tqkya'pengr kio, sc tqmcpxbzle nzyalvzkr ncblo nedeng nenq lc, x sc tqvzpebz badr mz lue. X mz nzvz-krbzle lc rpile namyape-ngrde nidr.

⁴⁹⁻⁵⁰ A' mzli kc tzmc-ngrbzlr nzvzne-krmle mz lue, sc tzmwxlrpeng x tzneplapeng murde nzrpilr kx nzrmcpeng drka'. A' mzli kcpwz Jiszs sc tqycmnepebz badr. Rpibzle kx, "Ninge lc ye! Bzkq mwxlramu!"

⁵¹ Zbz sc tqprtpebz mz bot, x nenq kc tqamaope. X nzktitxpx-pnzlr nide.

⁵² Murde trnzkrlyti-angidrkalr nzrngisc-krde zmatq amrlx, kxmule-esz' nzmctipelr rkx kc tqalele mz nzapu-krde zbo ngr leplz. Nabzdr mqngibe nztwz-krdr drtwr ngr rkx lcngr tqaletileng.

Jiszs Amrlzle Kxnzyagoxng Mrkc Ganeszret

Matiu 14:34-36

⁵³ Zbz sc tzalilvckio-moulr mz nrlar dxbu kc, sc tzkaputrpebzng mz nrlarnrlc kc tqycngr mztea Ganeszret, x sc tzadwatrpebzlr bot scdr mz nctq drta'.

⁵⁴ Mzli kc tzpoope-ngrmlr mz bot kc, leplz ngr mrkc nzglxtx-pnzlr Jiszs.

⁵⁵ X nzpine-anibzlr nrpa ngrde mz lr mztea amrlx ngr nrlarnrlc lcde. X drlvekeng vzkile, kxnzyagoxng nzglqtibzlr nqni bade.

⁵⁶ X drlvekeng vzkile, mz mztea, mz taon, o nrlanc, leplz nzrglqtimqng kztedrng kxnzyagoxng me nzyrlwrpx-lxblrngr. X nzyrnitirpzlr bade kx narlr-ngrbzle mz kztedrng nzbxttrtx-krpwzlr nctq lrpz scde. X leplz kxnzyagoxng kcng tzbxtprzlr lrpzde nzmrlzng amrlx.

7

Nqm̄q Ngr Gct Myaszpxle Nqm̄q Kr Melrm̄q-gung

Matiu 15:1-9

¹⁻⁴ Nakrlzamu kx nigr lr Jiu rngiscgr kzdung nqm̄q kxyc pnz mzli kc bqnc. Kxnzalvztrng kxnzetung mz Lou sc Mosis nzyrlqlr nqm̄q lcng mz nzbatr-krbzlr mz leplz nzvz-nqblq-krdr Lou sc Mosis mz nzvz-nqblq-krdr nzalvztr-krdr. A' trpiu Lou sc Mosis kx leplz na-alelr da lcng. Murde nqm̄q lcng nzyrlqnetrpezlr leplz. A' Farzsi nzalvztr-ngrdr kx ncblo kx trvz-nqblqleu nqm̄q kr melrm̄qgrng, trvz-nqblq-kzleu Lou sc Gct. Kzdq nqm̄q kr melrm̄qgrng lcng rpile kx leplz naycpq-kailr mqdr mz lue, x sc tzmu-ateng. Mz nqm̄q lcpwz, mzli kc tzyzlu-ngrmlr me nzyrlwrpx-lxblrngr leplz kxkqlu, naycpq-kailr

mądr o nakipong, x sc tżmu-ateng. Nzalvztr-
nğrdř kx navz-nąbląkr nąmq kr melrmągrng
lcng murde natubąbzkr mz nzobąkr Gct. X
nzklung mz nigr nzvz-nąbląlr nąmq kqluti-
moung mz nzrycpą-krđř da kx nżmutiong: kap,
belue, baol, x tebol.

Kzdą zbą kzdung Farzsi x kxnzalvztrng mz Lou
sc Mosis nzvżkimlr mrkc Jerusalem mz nżrmcti-
lzbą-krđř badř Jiszsi. Ncblo lcng nżkrlzlr kx ncblo
neng Jiszsi trnzvz-nąbląlr nąmq kr lr Jiu mz
nzrycpą-kaingř mq x ncblo kc tqmu ate.

⁵ Zbz nzveabzng bade kx, “?Memule ncblo
nemąng tżrnzlvzo-nğrdř nąmq krgung?”

⁶ Jiszsi rpibzle badř kx, “Gct ycmnetř-nğrde
leplz kx nżapulř nimu mz nżngi-batr-křbzle mz
profet Asaea nzryř-křde kx, ‘Leplz lcng nżamrlue-
txpwzlr ninge mz naodr. A’ trnzvz-nąbląlr
natąnge murde nąmq nr nabzđř yc-rlrup bange.

⁷ Nżangio-krđř ninge mane mz đřtwrąge, murde
nżřpilř da kcąg tżalvztr-nğrdř leplz nżvżpxmąng
bange. A’ trtingř.’ ” ✧

⁸ Rpi-mopwż Jiszsi kx, “Trvz-nąbląwamuu Lou
sc Gct, a’ křlang tqvz-nąblągamu nąmq kx nżyrlą
leplz.

⁹ Křlztř-angidramu nżřkatřpxągr lou angidř sc
Gct, murde navz-nąbląpwżmu nąmq křmu.

¹⁰ Kzdą me aleki-kżamule nide sele: Gct řpile
mz Lou kc tqkabzle mz Mosis kx, ‘Amrlue vż
trtem x lxem.’ ✧ x ‘Doa kx tramrlueleu trtede
x lxede, a’ pibątile nidř; takitřřpwzle nżřnibąągr.’
✧

✧ 7:7 Asaea 29:13 ✧ 7:10 Nzřlaszągr 20:12; Lou Kcpwż 5:16

✧ 7:10 Nzřlaszągr 21:17; Livae 20:9

11-12 A' rpi-alzu-ngnamu kx takitrde doa trnzamlue-krdeu trtede x lxede mz nzrlr-krbze trau scde badr mz nzokatr-krde nidr, nzmdu dzu r da kx naokatrle nidr yrlqpx-bekapele kx nangi blz kxtr sc Gct.

13 A' mz nzale-krmu da lc yrlqtxpxamu Lou sc Gct, murde navz-nqblqamu nzalvztr-krmu nqm̄q krmu. X vz zvz nzale-krmu da kxkqluting kx nzbatrpzlr mz leplz nzvz-nqblq-krdr nqm̄q kr melrmqm̄ung x nzrpwa'-ngrbzlr badr nzvz-nqblq-krdr natq Gct." *

Lepz Kcng Trnztakitrdr Nzprrngr Mz Nzangiongr

Matiu 15:10-20

14 Zbz Jiszs kqle-moule zbo ngr leplz kcng, sc tqrppebzle kx, "Lalztq-angidrmamu bange x yrlqamu da kc napibo bamu.

15 Da kcng tzyrlqtr mz nrkrdr̄tq leplz trnzbatrpwzlr trnztakitr-krdr nidr mz nzprrngr mz nzangiongr. Trtingr. A' ngi da kcng tzvzpxmqng mz leplz kx nzbatrpzlr trnztakitr-krdr nidr.

16 Doa kx yrplapx, na-abzle nztwz-krde drtwr ngr natq lc."

17 Zbz Jiszs badr ncblo nedeng sc tzrlaszpelr zbo ngr leplz kcng x tzdwatrpe-ngrdr kc ma. X sc tzveatipebzlr bade nike drtwr ngr nzalvztr-krde lc.

18 Sc tqrppebz Jiszs kx, "Rlr! ?Narmu tryrplatrkapz mz natq lc? Trngiu dakxnzng x mq̄ kx

* **7:13** 7:11-12 Blz kx myapxbz mz nzobqkr Gct ngi nzvz-nqblq-kaingr natqde, x nzkra-ngrbz blz bade kc ate. [Sam 4:5; 34:10-14; 50:15; 51:16-17; 73:24; 81:83; Hosia 6:6; Mak 12:33]

trnzycpqu kx nzbatrpzlr trnztakitr-krdru leplz mz nzprtrngr mz nzangiongr.

¹⁹ Murde vztr mz lzng kr leplz, x mz nibrde sc tqvzpxpe-mop mz nrkrdrdq." Natq Jiszs lc drtwr ngrde kx takitrde nzmungr dakxnzng amrlx.

²⁰ X sc tqrpipe-mopwzle kx, "A' da kx nzvzdzmqng mz nabz leplz, nidr lang tzbatrpzlr trnztakitr-krdru nidr mz nzprtrngr mz nzangiongr.

²¹⁻²² Murde drtwr kxtrka lcng nzvzdzmqng mz nabz leplz. X nzmailzlr nidr mz nzale-krdr alwx lcde seleng: nzkcmnzng, nzdobungr, nzglqpx-lzbqng, nzngqngungr, nzesabrtingr, nznribqng, drtwr kxmwa, nzmwimingr leplz kx trngiu krnalzdr, nzamqmiti-rbrngr mz nrkrdrdq, x kzdung kz da kxtrka.

²³ Da kxdrka'ngr lcng amrlx nzvzdzmqng mz nabz leplz x alwx lcng nzbatrpzlr trnztakitr-krdru leplz x trnztubq-krdru mz nzobqkr Gct."

*Olvz KxtrngiulrJiu A' Nzrlxngiti-krde Etu
Matiu 15:21-28*

²⁴ Zbz Jiszs badr ncblo nedeng nzrlaszlr Gzlili Provins, x sc tzvzkipelr mz nrlarnrlc kc Fonisiz mrkc Siriz Provins, mz taon kc etu Taea. Provins lc nyz leplz kxtrngiulrJiu. Mz drtwr Jiszs namcnrwxngr mrlc murde trpnzng kx naglxle nide. A' nrpa ngr nzkaputr-krbzle ani txpwz nztalvzpx-krde mrkc.

²⁵⁻²⁶ Kzdzq olvz lr Taea, kx xlrle kc nrpa, sc tqvzpem bade, murde inyxde kxtpowz mncpx-ngrm drka' kxtrka. Olvz lc trngiulrJiu, sc tqyrng-

zopebz bade mz nzyrnitr-krbzle nzmaszlrpx-krbzle drka' kc mz inyxde.

²⁷ Jiszs ycmnebz bade mz kzdq nzycmne-ebzpxngr kx, "Doa kxnztopwzng namu-kaing. Murde trmrlzu nzoti-krbzme dakxnzng nandr x kabzme mz kuli."

²⁸ Rpihz olvz kc kx, "Kxetu, kxmule-esz', a' nzrlr-ngrbz mz kuli nzngq-krdr dakxnzng kc tqtao mz nabz tebol."

²⁹ Jiszs rpihzle bade kx, "Nzayzlu-krme natqnge mrlzvxitx! Vzpe ma nyzm murde drka' kc rlaszpele inyxm."

³⁰ X mzli kc tqkrlz-ngrbzle ma nyzde, sc tqm-cpele inyxde nzaonepxpe-krde drtqde mz bet nyzde. Drka' kc rlaszpele nide. †

Jiszs Amrlzle Kc Ncblo Kx Nradrtqde Ngq X Nzycmne-krde Tropxu

³¹ Zbz Jiszs badr ncblo nedeng sc tzrlaszpe-moulr taon Taea. Sc tzo-ngalekipemlr nrlarnrlc nyzdr leplz kcng trngiulrJiu x nzkrzlbzlr taon Saedon, x nrlarnrlc kc mztea nzpnu, mz nyzlu-krdr Dxbu Gzlili.

³² Kzdung leplz nzvzmi-moplr kc bade kzdq ncblo kx nradrtqde ngq x nzycmne-krde tropxu.

† **7:30** Mz nzycmne-ebzpxngr lc, doa kxnztopwzng drtwr ngrde lr Jiu, x kuli drtwr ngrde kxtrngiulrJiu. Dakxnzng drtwr ngrde da kxnzmlrkti kcng tzvzpxmqng mz Gct. Suti drtwr Gct nzamrlz-krde leplz amrlx mz nzwzkr lr Jiu, leplz nedeng kc tqmcpxleng. Delc Jiszs tqvz-kai-ngrbzle mz lr Jiu. Be lc drtwr ngrde kx trmrlzu nzamrlz-krde kxtrngiulrJiu x lr Jiu kc ate. A' natq olvz kc aelwapx-ngrbzle kx lxngiti-angidrle Jiszs, x takitrde nzokatr-krde nide.

Nzrlxtibzlr bade nzyrlqo-krbzle mqde mz ncblo kc murde namrlz mou.

³³ Jiszs vzmitxpxle ncblo kc rlrū mrkc tzyrlwr-ngrdr zbo ngr leplz kcng. X yrlqtrpzle nratoki r mqde mz nradrtq ncblo kc, byatx x bxttr-kzpzle nalzpqde.

³⁴ X mz nzyckr drtwrde nide, krka'lz mz bongavz, x rpibzle kx, "Lvxp!" Natq lc nzrpibz lr Jiu kx, "Efata!"

³⁵ Mzli kcpwz nradrtqde kc tqxlrpe x nzymne-krde otxpx pnz kz.

³⁶ Pibz Jiszs mz leplz kcng bzkq nzpitiwnedr da lc. Kxmule-esz' rpwa'-zlwz-ngrbz Jiszs nzpinerkrdrle, a' sc nzyapwxtitx-zlwzlr.

³⁷ X mzli kc tzxlrpe-ngrdr leplz nrpa, nzkctipxlr x sc tzipelr kx, "Jiszs da amrlx kx aleleng mrlzvxi esz'ngr! Amrlzpeleng leplz kcng nradrtqdr tqngq x krkcng tqrbx nzymne-krdr."

8

Jiszs Apuleng Ncblo Siu-pwx (4,000)

Matiu 15:32-39

¹ Mzli trboiu mz nibr nyzylu-krmlr Dxbu Gzlili, kzdq zbo ngr leplz kxetu nzvz-mopqng mrkc tqmncngr Jiszs. X mz nibr kzdung zbq dakxnzng nadr kc tqyrkrpe. Jiszs kc tqkqlepele ncblo nedeng x tqrpipebzle badr kx,

² "Yctxpe mz drtwrge leplz lcng. Murde nzmncipemlr bagu mrka zbq tqpe x dakxnzng nadr yrkrtxpe.

³ Trmrlzu nzatwzlrtngr nidr mz nelzdr kxbr-tale, ma mztr tqtclvrne mz lrpzki, murde kzdung nidr nzvzkiplr rlrū."

⁴ Ncblo nedeng nzrpibzlr bade kx, “Trpnzngr me nzxpe-ngrgr dakxnzng kx natakitrde leplz lcng mrka.”

⁵ A' Jiszs veabz badr kx, “?Bret tqivr kx ycbz bamu?” Nzrpibzlr kx, “Rlimz.”

⁶ Zbz Jiszs rpibzle mz leplz kcng amrlx nawxbuong. Zbz otitxde dapu bret kcng rlimz, awitx-ngrbzle mz Gct, lopxititxdeng, x sc tqkatipebzle mz ncblo nedeng tzakipebzlr mz leplz kcng amrlx.

⁷ X yc-kzpz badr kcng nc kxtpwzting. Zbz awi-kz-ngrbzle nc kcng x rpibzle badr kx na-aki-kzpzlr mz zbo ngr leplz kcng.

⁸ Leplz kcng amrlx nzmung x nelzdr krlc. X nzataqtir mulide kcng tqyctxo x nznulvzongrdrlc topla kxetu rlimz.

⁹ Zbz sc tqatwzlrpengr Jiszs leplz kcng mz mztea nyzdrng mz nibr nzmupe-krdr amrlx ngrdr. Ycpwz pipz nzkrly-krbzle siu-pwx (4,000) mz ncblo txpwz kcng tzmung mz zbq lcma.

¹⁰ Mzli lcde, sc tzprtzipeng mz bot badr ncblo nedeng x sc tzalilvckiopelr mz nrlarde kc Dalmanuta. *

Nzrkrlzngr Rkx Ngr Nzwzkr Gct

Matiu 16:1-12; Luk 12:54-56

¹¹ Zbz kzdung Farzsi nzvzmng x sc tzalwzpeng badr Jiszs. Nzrlxtibzlr bade nzale-krde kzdq da kxmatq mz nzaelwapx-krde kx vzpx-angidrm mz Gct.

* **8:10** Trpnzngr kx rkrly me ycngr mrkc tzrpibz Dalmanuta, murde Mak esz'-krde kx yrle drtq mrlc. A' mc kz Matiu 15:39.

¹² A' Jiszs nabzde talvzotx murde nzphtpx-ngrdr nike aelwapxpe-ngrbz Gct badr. X rpibzle badr kx, "Trpengr nzaelwapx-krbo rkx kc tqrlx-tiamu."

¹³ Zbz Jiszs badr ncblo nedeng sc tzalilvck-iopelr mztea Betsaeda.

¹⁴⁻¹⁶ Mz nzalilvcobe-krdr dxbu, Jiszs rpibzle badr kx, "Rngidrtioamu yisti sc Farzsi x King Herot." Zbz sc tzymnetrpe-ngrdr, x mz nzxlr-krdr kc yisti, mz drtwrdr Jiszs kc tqycmne-ngrbzle lc murde trnzrtwzne-krdru bret, x bret esz'txu kx ycnebz badr mz bot.

¹⁷ Kx xlrbz Jiszs nike tzymnetr-ngrdr, sc tqrpibzle badr kx, "?Nike tqyc-zlwzngr mz drtwrmu trnzrtwzne-krmuu bret? ?Myx kxmule, trkrlzkalamu? ?Drtqmu sa nzrtwzngr nikeng aelwapx-ngrbz Gct bamu?"

¹⁸ Opxm kx trpnzngr mzpu x trpnzng nradrtqmu. Murde mrbrtr mz drtwrmu rkx kcng tqmctipeamu. ☆

¹⁹ ?Mzli kc tqlopixiti-ngrne bret kcng nzlvqn, tqapu-ngrne ncblo kcng siu-nzlvqn (5,000), topla tqlvr kx nulvzoamu muli dakxnzng kcng tqyctxo?" Nzrpibzlr kx, "Nzpnue-sz'-nrade-li (12)."

²⁰ Rpi-mopwz Jiszs kx, "Dela. ?X mzli kc tqlopixiti-ngrne bret kcng rlimz tqapu-ngrne ncblo kcng siu-pwx (4,000), topla tqlvr kx nulvzoamu muli dakxnzng kcng tqyctxo?" Nzrpibzlr kx, "Topla rlimz."

²¹ Jiszs rveabz badr kx, "?Myx kxmule, mz drtwrmu alvztr-ngrne nimu bret o nzalvztr-

☆ **8:18** Jeremaea 5:21; Esikel 12:2

rbrkr Farzsi?" †

Jiszs Amrlzle Ncblo Kx Mzte Kcba

²² Mzli kc tzkrlzpe-ngrbzlr mztea Betsaeda, kzdung leplz nzvzmimlr kc ncblo kx mzte kcba mz Jiszs x nzyrnititrpzlr bade nzmaetr-krbzle drtqde.

²³ Jiszs malebzle mqde, vzmitxpxle rlrū mz mztea kc. Zbz byatrpz mz mzte x yrlqtr-kzpzle mqde mz mzte. Jiszs rveabz bade kx, "¿Myx kxmule, rmcpeq da?"

²⁴ Mrlx kc obqlvxtxde nrlc x sc tqrppele kx, "Eu, mcpex leplz, a' tropx-angidrka nzmc-krnge nidr. Nzapunebelr nounc kxnzvneng."

²⁵ Zbz Jiszs yrlqtr-mopwzle mqde mz mzte. X mzli lc mzte kc tqopx ate x tqrmc-angidrpe.

²⁶ Jiszs rpibzle bade kx, "Vzpe, a' mz nzvz-krm bzkq tavaunetrq mz mztea mz nzvz-krm ma nyzm." ‡

*Pita Glxle Kx Jiszs Nide Kxnzmcpx
Matiu 16:13-20; Luk 9:18-21*

† **8:21** Jiszs rpile na-almaztr-ngrde nidr kx yisti kxpipz krizle nzaetunepxngr dapu bret nzkqlu-krdr, mz nqm̄ lcpwz nza-lvztr-rbrngr kxpipz nzkrizlr nzatrka-atwrnr-krdr nzmncngr. A' Jiszs nzmu tr-rlxpwzu bret badr, murde krizle nyrka-krbzle bret mz leplz kxnzkqlung. ‡ **8:26** Lr Jiu nznzkr drtwrdr le nqbya ngr nao ngi kzdq luekxpiz mz nqm̄ krdr. Krlc ngi kzdq mzli kx nzyrtxopwz mz Nzryrngrkxtr mzli kx Jiszs trangida-ngrdeu nzamrlz-krde leplz mzli kc ayrrngr tqale-ngrdele. A' mw̄x kx prt̄z-kzpz kzdung kz mzli. X mzli kx krka'-ngrgu leplz mz nzmrlz-krdr, bzkq aoti txpwz drtwrgu nzmrlz-krdr mzli lapwz. A' navz zvz nzkrka'-krgu nidr nakrlz-zpwxbzle mzli kx namrlz-ngrdr.

²⁷ Jiszs badr ncblo nedeng nzrlaszlr Gzlili Provins x sc tzvzdzpeng x nzvztrng mz nrlarnrlc kc tqycngr mztea Sisaria Filipae. Mzli kc tzvzne-ngrbzlr mz lrpzki, Jiszs rveabz badr kx, “?Myx kxmu nzglxkr leplz ninge?” §

²⁸ Nzrpibzlr kx, “Kzdung leplz nzrpilr kx nim Jon Kxawrkxtr yzlupe-mop mz nzbz-krde. X kzdung nzrpilr kx nim profet Elaeja yzluope-mop Heven. X kzdu-kzng leplz nzrpilr kx nim dq profet kxmyalz kc bqnc.” ☆

²⁹ Zbz rpibzle badr kx, “?A' nimu, myx kxmu nzglx-knamu ninge?” Rpibz Pita kx, “Nim Kxnmcpx!”

³⁰ A' Jiszs rngidrlvz-ngrbzle badr kx trkrlzkapzle mzli r nzyapwxtine-krbzlr mz leplz nznngini-krde Kxnmcpx ne Gct.

Jiszs Ycmnetr-ngrde Nzbz-krde X Kxnamu Nzrvz-nqblqngr Nide

Matiu 16:21-28; Luk 9:22-27

³¹ Zbz Jiszs alvztr-ngrde nidr da kx naprtzbz bade mz nznngini-krde Mrlx Leplz. Rpile kx drtqde sa na-aetqbz mz da kxkqluting. X kxnzetting r lr Jiu sa napxtxpx-ngrdr nide, krlcng lrtzlvz ngrdr, kxnzetu rdr pris, x kxnzalvztrng mz Lou sc Mosis. X sa nanibqlr nide. A' mz zbq kratq mz nibr nzbz-krde, sc tqlupe mou.

³² Nzpi-krbzle badr da lc opx angidr. A' katxpxm Pita mz kztedeng x vzmitxpxle rlr

§ **8:27** Mz nzmncr Jiszs mz nrlc nzkriz-krde nikeng tzaoti drtwrdr leplz, vzpxm mz Mqngrkxtr. A' trkrlzleu da amrlx.

☆ **8:28** 2 King 2:1-12; Malakai 4:5; Matiu 14:1-2; Luk 9:7-8; Nzaelwapxng 11:3-6

kxpiþz. X rpibzle bade kx, “Bzkq kxmu nzymne-krm lc.”

³³ A' Jiszs lxlvrþz x obqtxþz mz ncblo nedeng, sc tqpnanatipele Pita. Rpibzle kx, “Esopx Pita! Bzkq apume bange Setzn. Murde nzkrlz-krm vz-nqblqle drtwr leþlz, a' trngiu me pnz drtwr Gct.”

³⁴ Zbz Jiszs kqlele ncblo nedeng badr leþlz kcng amrlx, x rpibzle badr kx, “Doa kx navz-nqblq-angidrle ninge, narlrpx-lzbq mz nzaetq-ngrþz drtqde. X naesablqtile me pnz drtwrde esz'-krde, x bzkq axtþbzle nzo-zli-krde lrpzki rnge. ✧ *

³⁵ Murde doa kx otr-zvzngr drtwrde nzlu-krde, sa namale-lvile nzlungr kxboi. A' doa kx yrlqtxole nzlu-krde murde lxngitile ninge x Nrpakxmrlz, sa naprþr mz nzlungr kxboi.

³⁶ Mane nznginingr bcnyr mz nrlc ka x amrbtrþ-trle nzlu-krde mz nrlc kc navzm.

³⁷ Murde trpnzngr da mz nrlc ka kx takitrde nzxpeþx-krde nzlungr kxboi. ✧

³⁸ Leþlz ngr nrlc ka nidr kxdrka'-ngrng kcng trnzangiolru Gct. Krkcng tþpþþx-ngrdr ninge x natqngeng mz nzngini-krnge Mrlx Leþlz, sa napþþþx-kz-ngrne nidr mzli kc nayzlu-ngr-mopwc' mz nzvzmi-krmc enjrl kxnþrng mz zmatq ngr Trtenge.”

✧ **8:34** Luk 14:27 * **8:34** 8:33 Kxmule-esz' Pita þþþx-kaile kx Jiszs nide Kxnzmcpþ, a' trkrlz-atwrnr-ngrdeu nike drtwr ngrde. Mz nzmu-krde lc, na-aclvetio-kzku kxmu nzyokaetþþx-krqu natq Gct x da kx aelwapþ-ngrmle bagu. 8:34 Jiszs þi-angidrle kx, “Naglqle kros ngrde.” Kros drtwr ngrde nzaetqþng drtq mz nzbzng. ✧ **8:37** Sam 49:7-9

9

¹ Zbz rpibz Jiszs badr kx, "A' da angidrtx lc napibo bamu. Kzdung nimu sa nalubeng mzli kc Gct na-aelwapx-ngrde zmatq ngrde mz nzvectr-krmle leplz mz nzmnc-lz-krbzlr bade mz nznngini-krde King rdr." *

*Nrkrdrdq Jiszs Tekqtr-lzbq
Matiu 17:1-13; Luk 9:28-36*

²⁻³ Mz nibr zbz kcng esz'mz, Jiszs vzmile Pita, Jemes x Jon, x sc tzvzdzpeng mz kzdq newz kxetu mz nzmnc-krdr esz'-krdr. Mzli lcpwz, ncblo lcong nztqng nzobqbnzng nrkrdrdq Jiszs tekqtr-lzbqpe mz zluli x lrpz scde prkitxpxpe x aglqpz'pe, myaszpxle lrpz kxprki mz nrlc tulvzo.

⁴ Zbz nzmclr Mosis nidr mz Elaeja, profet kcng bqnc, nzymne-krdr badr Jiszs.

⁵⁻⁶ Mz nibrde sc tqrpipebz Pita mz Jiszs kx, "Kxakrlz, mrlztx angidr nzmnc-krdu mrka. Mwx nawztibzkr du matelq natq, nangi nyzm dq, nangi nyz dq Mosis x nangi nyz dq Elaeja." A' krlc tqycmne-ngrbz Pita lc, murde nidr badr kzt-edeng nzmwxlr-zlwzng x trkrlzleu da kx napile.

⁷ Zbz kzdq dcbz akqlvztxde nidr mz zmyo ngrde. X natq Gct vzpxm mz dcbz kc, rpibzle badr kx, "Krlc mrlxnge Kxnmrlzti. Lalztqbmude."

* **9:1** Kxnzetung mz Nzryrngrkxtr, nzrpilr kx natq lc ngidatipe mz kzdq mzli lcong tq: mz mzli r nzteqtr-lzbqkr nrkrdrdq Jiszs, mz mzli r nztulz-krmle mz nzbzngr; o mz mzli r nzvzo-krm Mqngrkxtr mz nibr nzvzdzkr Jiszs Heven. Murde mz mzli lcong tq, Jiszs vectrple leplz bade mz nzlzngiti-krdr nide.

⁸ Mz nibr natq lc, nzobq-mopwzng, Jiszs kc tqtutxpepwz mrkc esz'-krde. †

⁹ Mzli kc tzvzneobe-ngrmlr mz newz kc, rpibz Jiszs badr kx bzkq nzpinedr nike nzmclr nakrlz-zpwxzbzle nztulz-kr-mop Mrlx Leplz mz nzbz-krde.

¹⁰ Yc-lrpi mz nabzdr esz'-krdr, a' vz zvz nzveati-etr-krdrle kx nikeng tqpnz drtwr Jiszs mz nztulz-kr-mople mz nzbzng. ‡

¹¹ Zbz sc tzrpipebzlr mz Jiszs kx, “?Nike kxn-zalvztrng mz Lou sc Mosis tzrpi-ngrdr kx profet Elaeja nayzluo-kaip mrka mz nrlc x Kxnzmcpk kc tqvz-atem?” ✧

¹² Jiszs ayzlu-ngrbzle natqdr kx, “Kxnzalvztrng nztubq-angidrng mz nzrpi-krdr kx Elaeja navz-kaip mz nzoliqti-krde da amrlx. A' trnzaopxpwzu badr kx Nzryrngrkxtr rpi-kzle kx Mrlx Leplz na-aetqbz drtqde x naobqszo nide x na-atrkati nide.

¹³ A' napibo bamu kx ncblo kc tqngi Elaeja vzpem. A' leplz nzatrkatikzlr nide, da kc tzwai nzatrkatikrdr Elaeja kc bqnc, mz nzvz-nqblqngr

† **9:8** Natq Gct lc aelwapx-ngrde kx Jiszs x nzalvztrkrde myaszpxle ncblo kxnzetu lcngr li, kxmule-esz' Elaeja nide profet kxmyapxzbz x Mosis yrle Lou Kxtr. X aelwapx-kz-ngrde kx Jiszs nide Gct, x trngiu ncblo kxmatq txpwz. ‡ **9:10** Rblxbz badr nztwzkrdr drtwr kx Kxnzmcpk ne Gct nabz. ✧ **9:11** Malakai 4:5

Nzryrngrkxtr.” §

Rblxbz Mz Ncblo Neng Jiszs Nzrmaszlrpx-krdr Drka'

Matiu 17:14-21; Luk 9:37-43

¹⁴ Mzli kc Jiszs badr Pita, Jemes x Jon tzkrlzope-ngrmlr nou newz kc, sc tzmctipelr zbo ngr leplz kxetu tzyrlwr-ngalelvzlr ncblo nedeng kcng tzmnczbzng mrkc. X sc tztalwzti-lzbqng badr kxnalvztrng mz Lou sc Mosis.

¹⁵ Mzli kc leplz kcng tzmce-ngrdr Jiszs, nzkc-tipxlr x sc tzngrlrpebzng bade x tzalavzpelr nide.

¹⁶ Jiszs rveabz badr kx, “?Nike tqtalwzti-lzbq-ngrnamu?”

¹⁷ Kzdg ncblo rpibzle kx, “Kxakrlz, vzmimc mrlxnge mrka mz nzamrlz-krbzme nide, murde drka' kc tqmncpxm bade tr-rlr-ngrpwzleu bade nzymne-krde.

¹⁸ X mzli kznikeng drka' lc dwasz-ngrde nide, sc tqprtilzpe nimz x tqrtctxope-ngrde mz drtc', vz vz nqbya ngr naode tqwxbutxtrpebz, madqlvztxde nqngide, x sc tqululwxkz'pe. Rlx tibo

§ 9:13 Trnzaopxpwzu mz lr Jiu kx Nzryrngrkxtr rpile kx Kxnmcp x na-aetqbz drtqde x naobqszo nide, na-atrkati nide, x nanibq nide. [Sam 22:1-18; 69:8, 11, 20-21; 118:22a; Asaea 53:1-12.] Murde nzlxngitilr natq Gct kx rpile kx Kxnmcp x nangi king kc etu na-aovxiole enqmi rdrng amrlx x na-aclve-alole leplz amrlx. A' trnzlxngitilru natq kzbleng. Jon Kxawrkxtr ngi ncblo kc tqngi Elaeja, mz nzale-krde nzwzng kcpwz, mz nznrgisc-krde zmatq kcpwz, x mz nzmnc-krde kz lzke. X da kc tqwai Kwin Jesebel rpile nanibqle Elaeja, Kwin Herodizs kxrngi-batr-kzpz nznribqng Jon. Mz nzm-krde lc, nzmncr Elaeja ngi rkx ngr da kx naprtzbz mz Jon. [1 King 19:1-18; 21:23-24; Malakai 4:5-6; Matiu 17:11-13]

mz ncblo nemqng nzmaszlrpx-krbzlrle, a' rblx-tile nidr.”

¹⁹ Jiszs rpibzle kx, “?Nike nawai-mopwc' bamu? Nzmc-krbo bamu mzli boipe! A' trkr-lzkalamu nzrlxngitingr x narmu kc tqmqngibe. Vzmimamu doa la bange.”

²⁰ Zbz sc tzvzmipebzlr bade. A' mzli kc drka' kc tqmce-ngrbzle Jiszs, sc tqprtizpe nimz tqnrncpe x sc tqrtcope-ngrde mz drtc'. Sc tqtaligxpe x nqbya ngr naode kc tqwxbutrpebz.

²¹ Jiszs veabz mz trte doa kc kx, “?Myx mzli kx dwa-ngrbz zyagox lc bade?” Rpibzle kx, “Abzo pnz mzli kc tqtopwzbe-ngrde.

²² Vz zvz nzngi-batr-krbz drka' lc nztalz-krde mz nyr x nztao-krde mz nabzde kxlr, murde rpile nanibqle nide. Nayc mz drtwrm nigr x okatrp nigr, nzmu kx tqkrlzq nzale-ngrbz da bade.”

²³ Rpibz Jiszs bade kx, “?Nike tqrpi-ngrme kx nzmu krlzx? Trpnzng da kx rblxbz mz doa kxnzlxngitilr Gct.”

²⁴ A' trte doa kc ani txpwz nzrpi-krbzle kx, “Eu, lxngiti-angidrx. A' okatr-kzp ninge mz nzngrgokr nzrlxngiti-krnge.”

²⁵ Mzli kc Jiszs tqmc-ngrde leplz kxnzkqlung tzngrlr-ngrmlr bade mz nzmc-krdr nike tqalele, sc tqpnanatipele drka' kc mz nzrpi-krbzle kx, “Drka' ngr nzangqngr nradrtq x nzanabukr leplz, rngidrlvz-ngrbo bam prszpx doa la x bzkq dwatr-mopwzme bade!”

²⁶ Zbz drka' kc sc tqnepe, x sc tqrtcope-ngrde doa kc mz drtc'. Zbz sc tqprszpxpele nide. Doa kc sc tqyrbqtxpe mrkc mz drtc' trycngrlrpeu x

apupele kxbzpe. Kxnmzmc leplz kxnmzklung le, sc tzipipelr kx, "Doa la bzpe."

²⁷ A' mz nzkrlzkr Jiszs kx doa kc mrlztx-angidrpe, rtrngztiobzle mqde x sc tqokatrpele nztulz-mou-krmle.

²⁸ Zbz mzli kc Jiszs badr ncblo nedeng tzmncpxpe-ngrmlr mz kzdq ma, nzveabzng bade kx, "?Nike tqrbxti-ngrde nigr nzmazslrpxngr drka' kc?"

²⁹ Rpibz Jiszs kx, "A' drka' kxmule la nzmazslrpxpwz mz nzkarka'ngr vzmi nzaxtxngr dakxznng." *

*Nzwrde Krali Kx Ycmnetrngr Jiszs Nzbz-krde
Matiu 17:22-23; Luk 9:43-45*

³⁰ Jiszs badr ncblo nedeng nzrlaszlr nrlarnrlc kc tqycngr mztea Sisaria Filipae x sc tzvzkitrpele Gzlili Provins. Jiszs trsutiu drtwrde nzkrlztikr leplz me mnc-ngrde.

³¹ Murde rpile namnc-tpwzng esz'-krdr badr ncblo nedeng mz nzalvztr-krde nidr. Pibzle badr kx, "Ninge Mrlx Leplz sa na-aprcbz mz zmatq ngr kxnmzwati drtwrdr ninge. Nanibqlr ninge, a' mz zbq kratq mz nibr nzbz-krnge, ninge kc tqtulzpe-mopwc'."

³² A' ncblo nedeng trnzklzlru drtwr ngr nzrpi-krde kx Kxnmzcpx sa nabz. A' naodr mya nzveati-krbzlr drtwr ngrde. ☆

* **9:29** Mz kzdung nzryrngr keng pnz trnzyrou natq lcng 'vzmi nzaxtxngr dakxznng.' Nakrlzku kx kzdung drka' nzxplr-krdr nzmyaszpxlr kzdung kz drka'. Mzli kc drka' trprszpx-ngrdeu ncblo mz drtq Jiszs, nakarka'ku nakrlz-zpwxzbzle mzli kx prszpx-ngrdele. X kzdung mzli nakarka'ku navzmi nzaxtx-ngrbz dakxznng.

☆ **9:32** Mak 8:31-33; 9:11-12

*Doa Kx Myalz-zlwzbz Mz Nzobqkr Gct
Matiu 18:1-5; Luk 9:46-48*

³³ Mz nibr nyzylu-kr-mop Jiszs badr ncblo nedeng mztea Kzpnizm, sc tzvztrpeng mz ma kc tzmnc-ngrdr. Zbz Jiszs rveabz badr kx, “? Nikeng tqycmnetr-ngrnamu mzli kc tqvz-ngrmgu mz lrpzki?”

³⁴ A' naodr mya nzayzlu-krbzlr natqde, murde tztalwzti-lzbq-ngrdr neke kx myatxpxbz mz nzobq-krde.

³⁵ X sc tqawxbupele aposol kcng, tqrpipebzle badr kx, “Mrlx kx nangi doa kxmyalz, na-avzozlbq x nawztrpz mz kztedeng amrlx.”

³⁶ Zbz vzmibz Jiszs kc doa kxtpowz, atubzle mz mzlirdr. X lolvztrple doa kc bade x rpibzle badr kx,

³⁷ “Mrlx kx vz-nqblqle ninge mz nzabrtzlvz-krde doa kxtpowz mz drtqnge, abrtzlvz-kzle ninge. X krkc tqabrtzlvzle ninge, trabrtzlvzleu ninge esz'-krnge, a' abrtzlvz-kzle Trte kc tqatwzlr-ngrmle ninge.” ✧

*Mrlx Kx Prtr Mz Nrlarde Nyz Jiszs
Luk 9:49-50*

³⁸ Zbz Jon rpibzle bade kx, “Kxakrlz, mckr kc ncblo kx rmaszlrpxngr drka' mz drtqm. A' pibzkr bade kx naesakipe, murde trprtrpuu bagu.”

³⁹ A' rpibz Jiszs kx, “Bzkq rpwa'-ngrbzmu bade! Mrlx kx alele da kxmatq mz drtqnge, rblxbz bade nzpibqti-krde ninge.

⁴⁰ Murde mrlx kx tr-rpwa'-ngrmleu bagu nzale-krqu nzwz-krqu, tukile mz nrlarde nyzgu.

✧ 9:37 Matiu 10:40; Luk 10:16; Jon 12:44

⁴¹ Da angidrtx lc napibo bamu. Mrlx kx rkabz mōmu lue mz nznngini-krmu doa nengeng, sa nakabz Gct bade da kxmrlz mz nzabrtzlvz-krde nide.

*Bzkq Atrkatiq Nzrlxngitkr Kzdu-kzng Lepz
Matiu 5:29-30; 18:6-9; Luk 17:1-2*

⁴² “Aclvetio-lzbq murde ma tqatrkatik nzrlxn-gitkr doa neng Gct. Murde Gct sa na-ayrplapx-zlwzle ncblo kx ataole mz alwx doa kxpobe mz nzrlxngitingr. Nzayrplapxngr nide namyaszlze mrlx kx nzpetrpz rplz kxetu mz drtwrde x nzrt-congr prla me boongr. Mwx mrlz nznribqngr nide mz nrlc ka mzli kc tratrkatika-ngrde nzn-lxngitkr doa ne Gct, myaszpxle nzayrplapx-alokr Gct nide mz alwx lc kalr.

⁴³⁻⁴⁸ Mz nzmu-krde lcde, aclvetio-lzbq kz murde ma tqatrkatilzbqq. Mz mzli r nzatalzngr dwatx ani. Mz nzatalzngr kx batrpzle nztaozvz-krm mz alwx, katxpx-lzbqm bade. Nzvztr-krm Heven kalr myaszpxle nzmnc-nrwx-krm mz nrlc ka. X nzaetq-krm drtqm mz nzmncngr kxtubq mz nrlc ka, myaszpx-zlwzle nzprtr-krm mz Hxl kalr; *mrkc nzayrplapxkr Gct kxnzaleng alwx tresakiu apule be kc trbzu, x nzetqkr drtqdr tryrkrpxpwzu apule nyr kx ngctx alo.* ☆

⁴⁹ Kxmule-esz', a' mz nrlc ka nzkxpu-krmung nzapulr nyr mz nzalqngi-krdr nzrlxngiti-krmu.

⁵⁰ Nzcxpungr lcng mrlz. A' rblx nzlolvz-amqngi-krmu nzrlxngiti-krmu nzmū napxtxpx-ngrnamu nzatubqtingr kc navzpxm mz nzcxpungr lcng. Rlr-ngrbzmu nzcxpungr

☆ **9:43-48** Asaea 66:24

lcng nzatubqti-krdr nimu murde namnc-zpwx-mouamu badr kztemung.” †

10

Jiszs Alvztr-ngrde Nzyrlzngr X Nzaxtxngr Krnalz

Matiu 19:1-12; Luk 16:18

¹ Zbz Jiszs badr ncblo nedeng nzrlaszlr mztea Kzpnizm mrkc Gzlili Provins x nzvztrng Judiz Provins mz nrlar LueJodzn kc tqprkilzm nepi. X kzdq zbo ngr leplz nzvz-mopqng bade mrlcde, x Jiszs sc tqalvztrpele nidr, da kc tqwai-zvzle.

² Kzdung Farzsi nzvzmqng mz Jiszs mz nzatalz-krdr nide mz nzale-krde kzdung da kxvz-rbr. Nzveatibzlr bade kx, “?Nzpnzkr drtwrm le, Lou sc Gct rlrpx-ngrde ncblo nzaxtx-krde olvz rde?”

³ Jiszs rvea-mopwz badr kx, “?Myx kxmule nike pi Mosis mz nzaxtxngr?”

⁴ Nzrpibzlr kx, “Mosis rlrpx-ngrde. Murde rpile kx nzmu *ncblo nayrbzle dq letz mz olvz rde, napibzle kx nzaxtx-lzbqpeng ncdr x sc tqatwzlr-ate-ngrde nide.*” ✨

⁵ Rpibz Jiszs kx, “Mosis yr-ngrde natq lc murde leplz nzdrka'-ngrng x nardr mqngi.

⁶ A' Gct aelwaxp-ngrde me pnz drtwrde mzli kc tqwz-ngrde nrlc. Murde Nzryrngrkxtr rpimle bagu kx mzli lc ayrrngr, ‘*Gct wz-ngrde ncblo esz' x olvz esz' mz nzmnc-tr-lxblr-krdr.*’ ✨

† **9:50** 9:49-50 Rblx nzpi-angidrngr drtwr ngr ngalrde lcng. Murde trnzkrlyu nike drtwr Jiszs mz nzymne-ebzpxngr lc. Vz-nqblqkr drtwr kxes' mz nzteqtr-ngrdeng. ✨ **10:4** Lou Kcpwz 24:1-4 ✨ **10:6** Nou 1:27; 5:2

⁷ 'Delc mzli kc tzetupe-ngrdr; nayrlzng. X nzamatq-lzbq-krdr namyaszpxle nzamatq-krdr kxnginidrng. X ncblo namnctr-amqngipebz mz olvz rde.

⁸ Murde doa lcng li nznginipedr nrkrdrdq x leplz kxesz'.' ✧ X napibo bamu kx trnzlipeung, a' nznginipedr leplz kxesz'.

⁹ Mz nzmukrde lcde, trpnzngr leplz kx takitrde nzakipx-krde krkcng tqaxvctrpeng Gct mz nzyrlzngr."

¹⁰ Mz nibrde, mzli kc tzmncnepe-ngrdr esz'-krdr brma badr ncblo nedeng, nzveati-mopwzlr bade nike drtwr ngrde.

¹¹ Rpibzle badr kx, "Mzli kc ncblo nzaki-lzbq-ngrdr mz olvz rde x yrlzti-moule kc olvz kzble, olvz krali lc trngiu olvz rde angidr; murde mz nzobqkr Gct sa tqyrlztibele olvz rde kc aynrngr. Mz nzmwimi-krde olvz krali lc, ayzprtxde nzesalz-krbzle kc mz olvz rde kc aynrngr mz nzyrlzngr mz mz Gct.

¹² X kxmu-kzle lc mz olvz kx axtxde ncblo ngrde x yrlzti-moule kc ncblo kzble."

Doa Kx Nzlxngitilr Gct Mz Nzngini-krde King Rdr

Matiu 19:13-30; Luk 18:15-30

¹³ Kzdzq zbzq kzdung leplz nzvzmimlr doa kxnz-topwzng mz Jiszs mz nzmaetr-krbzle nrkrdrdqdr x nzamrlz-krde nidr. A' ncblo nedeng nzlclvzlr leplz lcng.

¹⁴ A' mzli kc tqmc-ngrbz Jiszs, drtwrde ngyatx. Sc tqrpipebzle badr kx, "Bzkq rpwa'-ngrbzmu mz

✧ **10:8** Nou 2:24; 1 Korint 6:16; Efiszs 5:31

doa lang tztopwzng nzvz-krmlr bange. Murde leplz kxnmulr lcnq nzlxngitilr Gct mz nznngini-krde King rdr. *

¹⁵ X trpnzngr nzmncz-krbzmu mz Gct mz nznngini-krde King rmu nzm kx trapuwamuu doa lcnq.”

¹⁶ Zbz sc tqbrlctipele doa kxnztopwz kcnq mz mqde, yrlqo-ngrbzle mqde badr, x sc tqamrlztipele nidr.

¹⁷ Zbz mzli kc Jiszs badr ncblo nedeng narkalzpe-ngrmlr, kzdq ncblo ngrlrm mz Jiszs, atuobz zpr bade, x rveabz bade, rpibzle kx, “Kxakrlz, krlzx kx nim ncblo kxmrlz. ?Nike na-alex mz nztwz-krnge nzlungr kxboi?”

¹⁸ Rpibz Jiszs bade kx, “?Memule tqrpi-ngrme bange mrlzx? Murde trpnzngr kxmrlz, a' ngi txpwz Gct esz'-krde.

¹⁹ Krlzq natq kcnq tqkapx Gct. Krlcde seleng: *'Amrlue vzv trtem x lxem. X bzkq kx narnibq. Bzkq kx narmwimi doa kxtrngiu kernalzde. Bzkq kx napna da. Bzkq kx narpokiati leplz. Bzkq kx naryrlqpx da kx nakabz mz leplz.'* X kzdung kz da mou kxnmulr lcnq.” ☆

²⁰ A' rpibz ncblo kc kx, “Kxakrlz, abzo pnz mzli kc tqngini-ngrne obla vz-nqblq-angidrx natq lcnq amrlx.”

²¹ Jiszs obqtxbz mz ncblo kc mz nzmrlzti-krde nide. Zbz rpibzle bade kx, “Mrbrpxbep da esz' kx na-aleq. Amwa mclrm amrlx x kabz trau rde

* **10:14** Kzdung mzli takitrde nzngyatikr drtwrgu leplz kcnq tzvz-rbrng mz nqm q kr Gct, x nzlclvz-krbzkuleng badr. ☆ **10:19** Nzrlaszng 20:12-16; Lou Kcpwz 5:16-20

mz leplz kx trpnznggr scdr. Nzmu na-aleq da lc, nznrgiba-krm namyalz mou mrkc Heven. Vzm x vz-nqblqm ninge.” †

²² Mzli kc ncblo kc tqxlr-ngrbzle natq Jiszs, drtqde blotx pnz x sc tqvztxpe, drtwrde vztz zlwz. Murde nznrgiba-krde etu x trsutiu drtwrde nzalvetx-krdeleng mz nzvz-nqblq-krde Jiszs.

²³ Jiszs obqlvztxde nrlc, zbz rpibzle mz ncblo nedeng kx, “Rblxtx-atwrnr-ngrbz mz leplz kx nznrgiscng nzmncz-krbzlr mz Gct, murde trnzkrzlru kx nzmnc-xglelr nide mz da amrlx!”

²⁴ Nzpwrkilvc-ngrdr natqdeng. A' Jiszs rpi-mopwzle kx, “Doa nengeng, rblxtx-atwrnr-ngrbz mz leplz nzmncz-krbzlr mz Gct.

²⁵ Kamel trkrlzleu nzdwatr-krde mrkc tqmr-plxnggr nidil. X nznrbxkr kxnznrgiscng nzmncz-krbzlr mz Gct myaszpxle da lc.”

²⁶ Ncblo nedeng nzpwrkilvc-zlwz-ngrdr natqde x nznrpibzlr bade kx, “E kx tqmule lcde, trpengr kx narlapx!”

²⁷ Jiszs mzte aprtxbzle badr x rpibzle kx, “Rblxbz mz ncblo, a' tr-rblxpwzu mz Gct. Murde trpnznggr da kx rblxbz bade.”

²⁸ Zbz rpibz Pita bade kx, “Rlaszpekr dztugrng amrlx mz nzvz-nqblq-krgr nim.”

²⁹ Rpibz Jiszs kx, “Napi-angidrbo bamu. Mrlx kx rlaszpxle ma nyzde, o mzledeng, o inwedeng, o lxede, o trtede, o doa kxnztopwz nedeng, o drtc' nyzdeng mz nzvz-nqblq-krde ninge x nzlepx-krde Nrpakxmrlz,

† **10:21** Jiszs krlzle kx nznrgibakr mrlx lc rpwa'-ngrbzle bade nzvz-nqblq-angidr-krde nide, murde dztudeng nzapubzlr bade mqnggr da kx nzlz kx angiolenng.

30 Gct sa naxpe-moule nide nzwrde nangi trtqki lxblr (100) mz nikeng rlaszpxle. Mz nrlc ka sa natwz-moule du ma nyzde, mzledeng, inwedeng, lxedeng, doa kxnztopwz nedeng x drtc' nyzdeng, vzmi nzatrkatl-zlwzkr leplz nide murde vz-nqblqle ninge. X mz nrlc kc navzm, sa natwz-kzle nzlungr kxboi.

31 A' nadcpz mz drtwrmu kx kzdung leplz kxnzetzung mz nrlc ka, sa nangi leplz txneng mz nrlc kc navzm. X kzdung leplz txneng mz nrlc ka, sa nanginidr kxnzetzung mz nrlc kc navzm."

*Nzwrde Kratq Kx Ycmnetrngr Jlszs Nzbx-krde
Matu 20:17-19; Luk 18:31-34*

32 Mzli kc tzvz-ngrdr mz lrpzki mz nzvzkilz-krdr Jerusalem, Jlszs rtwayzbz mz leplz amrlx kcng tzvz-nqblqlr nide. X ncblo nedeng nzmwxlr-zlwzng murde nzkrzlzr kx kxnzetu r lr Jiu nzrpilr nanibqlr nide. Zbz katxpxmle nidr, vzmitxpxleng rlru kxpipz x sc tqpipe-mopwzle badr nikeng naprtzbz bade.

33 Rpibzle badr kx, "Ninge Mrlx Lepz. X mzli kc nakrlztr-ngrbzku Jerusalem, sa nakaobz ninge mz mq kxnzetu r pris x kxnzalvztrng mz Lou sc Mosis. Zbz navzmibzlr ninge mz Kansrl x drtwrdr sa naesz'ti kx nabzx. Zbz nakao-mopwzlr ninge mz doa lr gzpman ngr Rom kxtrngiulrJiu mz nznibqngr ninge.

34 X lr Rom lcng naxtrnga-ngrdr ninge, naby-atilr ninge, naviplalr ninge x nanibqlr ninge. A' mz zbq kratq ninge kc tqlupe-moux."

*Doa Kx Namyalz Mz Nzobqkr Gct Nawz-
nrbalqtrpz Mz Leplz Amrlx*

Matiu 20:20-28

³⁵ Zbz Jemes x Jon, mrlx Sebedi kcng nzling, nzvzbzng mz Jiszs x nzymneng badr. Nzrpibzlr kx, “Kxakrlz, nayc mz drtwrm nigr x kam bagr nike suti drtwrgr.”

³⁶ Jiszs rveabz badr kx, “?Nike suti drtwrmu na-alebo bamu?”

³⁷ Nzrpibzlr kx, “Mzli kc na-amrluengr nim mz nzngini-krm king, rlr-ngrm bagr nzwxbukr kzdq nigr mz nrlarm kxrtc, x kzdq nigr mz nrlarm kxmc, mz nzngini-krgr kxnzeturung kxnzmyapxbzng.”

³⁸ A' rpibz Jiszs badr kx, “Trkrlz-angidrwapuu nike tqrlxtiamu! ?Krlzamu nzprtrngr mz nzetqkr drtq kc naprtlzle ninge? ?X narlrpx-lzbq-ngnamu mz da knike naprtzbz bamu, da kc nawaix mzli lc navztrp?”

³⁹ Nzayzlu-ngrbzlr natqde mz nzrpi-krbzlr kx, “Eu, krlzkr nzalengr da lc!” Zbz rpibz Jiszs badr kx, “Da zpwxtx, drtqmu la naetq kz, da kc nawai nzetqkr drtqngc.

⁴⁰ A' trpnzng scnge zmatq mz nzka-krbo me matq lcng. Murde Trtengc kx rmcpxpwz krkcng nawxbuong mz tron lcng.” ‡

⁴¹ Mzli kc tzlxl-ngrbz kztedrng da kc tzrlxtlir, drtwrdr kc tqqlctrpebz mz Jemes x Jon.

⁴² Zbz Jiszs sc tqkqlepele nidr amrlx ngrdr, x rpibzle badr kx, “Krlzamu kx king mz nrlc

‡ **10:40** Jemes kc tznibqpe mz nzvz-nqblq-krde Jiszs. X Jon nzaetqti-kzpz drtqde mz nzvz-nqblq-krdele.

ka nzturtr-ngrbzlr mz leplz nzalengr da mz nzmncz-krbzlr badr.

⁴³ A' bzkq mz nimu. Murde doa kx rpile namyapxbz mz nimu mz nzaclve-krde leplz nengeng, nawztrpz bamu.

⁴⁴ X doa kx nangi kxetu kxmyalz, na-avzo-lzbq x nawz-nrbalqtrpz mz leplz amrlx.

⁴⁵ Ninge Mrlx Leplz. X kxmule-esz' ninge kxetu rmu, a' vz-ngrmc mz nrlc mz nzwztr-krbo mz leplz, a' trngiu leplz kx nawztrpqng bange. X vz-ngrmc nzrlrpx-krbo nzlu-krnge mz nzxpepx-krbo leplz kxznkqlung mz zmatq ngr nzbzngr."

Jiszs Amrlzle Kzdq Ncblo Kx Mzte Kcba

Matiu 20:29-34; Luk 18:35-43

⁴⁶ Mz nzvz-krdr kc Jerusalem, nzvztrng mz mztea Jeriko. X mzli kc tzrlaszpe-mou-ngrdr Jeriko, nzyrkr-nqblq zbo ngr leplz kxetu. X mz nrlar lrpzki lc tzo-zlilr, wxbu zvz elr kc ncblo kx mzte kcba, drtqde Batimezs, mrlx Timezs, mz nzrlx-krbzle trau mz leplz.

⁴⁷ Mzli kc tqxlrpe-ngrde kx Jiszs kc Naszret sc tqvz mz lrpzki, sc tqnepxpe mz nzrpi-krde kx, "Jiszs, Mrlx Devet, naye mz drtwrm ninge!"

⁴⁸ Leplz kcng nzlclvzlr nide x nzrpibzlr namnc-lrpi. A' sc natqde tqaetunelz zlwz, mz nzrpi-krde kx, "Mrlx Devet, naye mz drtwrm ninge!"

⁴⁹ Jiszs kc tqtupe, tqrpipebzle mz leplz kx, "Kqlebzmu, navzm mrka." Sc tzkqlepelr ncblo kc mzte tqkcba x tzrpipebzlr bade kx, "Tulzm x drtwrm naelalzm, murde nide la tqkqlemle nim!"

⁵⁰ Zbz Batimezs aotxole lrpz ngr zbao, tutxlz-anim x sc tqvzpebz mz Jiszs.

⁵¹ Jiszs rpibzle bade kx, “?Nike suti drtwrm na-alebo bam?” Rpibzle kx, “Kxetu, naobq-moux.”

⁵² Zbz rpibz Jiszs bade kx, “Vzpe. Murde nzlxngiti-krm ninge dela tqamrlz-angidrpele nim.” X mzli kcpwz mzte obqtxpx pnz. X sc tqvz-nqblqpe-kzle Jiszs mz lrpzki.

11

Sade Kx Nzprlxlvztingr Nabx Nc Paam Mz Lrpzki R Jiszs Mz Nzvztr-krde Jerusalem

Matiu 21:1-11; Luk 19:28-40; Jon 12:12-19

¹ Jiszs badr ncblo nedeng nzkrzlbzlr mztea kcng li Betpeji x Betzni mrkc mz Newz ngr Nc Olivi. Mrlc esotrpebz Jerusalem. Sc tqrpipebzle mz kzdung ncblo nede nzling kx,

² “Vznamu mz mztea lcomr tzmcpz. Mzli kc navztr-ngrbzmu, sa namcamu kzdq nei dcngki kx nzatolvangr kx trnzvonekangr. Yokaepxamu x vzmimamu.

³ Nzmu kx tzipibz kzdu leplz, nike tqvzmi-ngrnamu dcngki la, rpibzmu kx, ‘Suti drtwr Kxetu.’ X mzli lcpwz sa na-atwzlr-ngr-mople mrka.” *

⁴ Ncblo kcng nzli nzvzng. Sc tzmcpelr dcngki kc nztu-krde mz lrpzki, nzpetr mz kzdq nrlar naonrx ngr ma.

⁵ Mzli kc tzyokaepx-ngrmlr nqvi lrde, kzdu leplz kx nztung mrlcde sc tizrveapebzng kx, “? Memule tqyokaepx-ngrnamule la?”

* **11:3** Kzdung leplz mz drtwrdr nzymnekr ncblo lcng yrkrpx mrkc tqyrkrpxngr ngalrde lc, mz nzrpi-krdr kx, ‘Suti drtwr kxetu. X mzli lcpwz sa na-atwzlr-ngr-mople mrka.’

⁶ Sc tzpipebzlr natq Jiszs keng tqpibzle badr, x sc tzlrpe-ngrbzlr nzvzmi-krdrle.

⁷ Nzvzmimlr dcngki kc mz Jiszs, nzprlxobzlr nzkq scdr mz nibr dcngki kc x Jiszs sc tqwxbuopem elr.

⁸ Leplz nzkqlu nzprlxtiolr nzkq ngr zbao scdr mz lrpzki mrkc navokipx Jiszs. X kzdung nzrplameitipxmng nabx nc paam, nzprlxlvzti-kzlr lrpzki. †

⁹ Leplz kxkqlu keng tzrtwayzng x krkcng tzvzbzng mz nibr Jiszs, sc tzkabo-katomipelr kx, "Hosana! *Glqpxkr King Kxnzmcpx kc tqvzm mz drtq Yawe.* ☆

¹⁰ Nim King kc tqmcpx Gct, tqvzpxm mz nqvi lr melrmqgr Devet! Gct, ngrlvzkr nim kc tqmyalz-esz'ngr!"

¹¹ Jiszs votr Jerusalem, zbz sc tqvztrpe Mangrnzangiongr Yawe. Kx obqlvztile da amrlx elr, sc tzyzlupe-moung mztea Betzni murde nrlc milzpqpengr.

Nounc Kx Trpnzngr Nrade

Matiu 21:12-27; Luk 19:45-48; 20:1-8

¹² Nrlc kx ngrlxobzle mz nourla x sc tzrlaszpelr Betzni. Jiszs nelzde brtale.

¹³ Kx nzvzbzlr kc mz lrpzki, mcle kc nc fiki kxyrlvi. Mz drtwrde sc tqdo kz, a' kx vztrpzle trpnzngr nrade kx mclzbzle, murde trngiu mzli r nzpakr nc fiki.

† **11:8** Krlc kxmu nzarmyalz-krdr king. X mz drtwrdr Jiszs votr Jerusalem murde na-aclevele Israel mz nzngini-krde Kxnzmcpx kc tqngi King. ☆ **11:9** Sam 118:26

14 Sc tqrpipelinebz Jiszs mz nc fiki kc kx, “Trpnzng r doo kx namu mou nram.” X ncblo nedeng nzxlrzbzlr nzpi-krdele. ‡

15 Kx nzkaputr-mopwzlr kc Jerusalem, Jiszs vztr mou Mangr-nzangiongr Yawe. X sc tqmaszlrpxpe-ngrde leplz kcng tzxpeting x tzamwating dalr nzrkangr blz. X alzngrubzle tebol nyzdr lr Jiu kcng tztekqtrpzlr trau r mrkzbleng mz trau r Mangr-nzangiongr. X alzngr-kzpzle da kx nzwxbulvzo leplz kcng tzamwang nran kx nangi blz.

16 X rpwa'-ngrbzle mz leplz kxznkqlung mz nzrprwi-krmlr mz makoa ngr Mangr-nzangiongr mz nzvz-krdr mz kzdq nrlarde ngr mzteadau.

17 Sc tqalvztrpeleng, rpibzle kx, “Nzyro mz Nzryrngrkxtr rpi Gct kx, *‘Ma nyznge nangi ma ngr nzkrka’kr leplz ngr mrkcng kqlu mz nrlc.’* ✧ A' apusr-ngrnamule *me nzamwangr da kc tqangqnguti-lzbq-ngrnamu!*” ✧ §

18 Kx nzxlr kxznzetu rdr pris x kxznzalvztrng mz Lou sc Mosis da kc tqale Jiszs, sc tzyrlqpelr drtwr ngr nznribqng r nide. Murde nzdobutilr nide mz nzkctipxkr leplz amrlx nzalvztr-krde x nzabrtzlvzlr nide.

‡ **11:14** Mz Nzryrngrkxtr nc fiki ngi nzymne-ebzpxng r lr Israel. Mz nqm q lcpwz kx nc fiki lc yrivi a' trpnzng r nrade, lr Israel nzarmyalzlr Gct mz nzymne-krdr, a' trngiu mz nabzdr. Trpnzng r nradr kxmrlz mz nzmnc-krdr. X mz nqm q lcpwz tqlcbq Jiszs nounc lc, Gct sa nalcbq-kzle lr Israel kalr.

✧ **11:17** Asaea 56:7 ✧ **11:17** Jeremaea 7:11 § **11:17** Da kc tqale Jiszs Mangr-nzangiongr aelwapx-ngrde kx Gct sa na-qltile Mangr-nzangiongr murde rpile leplz na-armyalz-angidrlr nide o naodatitxde mz nzapu-krdr nc fiki kx trpnzng r nrade.

19 X mz milzpq lcng, Jiszs badr ncblo nedeng sc tzrlaszpe-moulr Jerusalem.

20 Nrlc ngrlxobz mz nourla, Jiszs badr ncblo nedeng nzkrly-moplr nc fiki kc tqłcbqle. X nzmcpelr kx nzglrnedz-krmle kc mz dzbrde, krlztxlzle wq.

21 Pita dcpx mz drtwrde nike pitrpz Jiszs mz nounc kc mz zby kc kai, sc tqrpipebzle kx, "Kxarklz, mc ena, nc fiki kc tqłcbqq, leu rde glrtipe!"

22 Rpibz Jiszs badr kx, "Nabrti drtwrmu Gct.

23 Da angidr lc napibo bamu. Mzli kznike rlx-ngrbzmu da mz Gct, bzkq drtwrmu li. A' drtwrmu nabr kx sa na-ayzlu-ngrbzle natqmu, x delc natwz-ngrnamu nike rlxtiamu. Apule mrlx kc tqpibzle mz newz kc kx, 'Brkalzm x tao prla mz zmatq ngr Gct.' X Gct sa narlr-ngrbzle bade nike rlxtile.

24 Mz nzmu-krde lcde, da kznike kx rlxtibzmu mz Gct, sa nakabzle bamu, nzmu nalxngitiamu kx sa natwzamu da lcde.

25 A' mzli kc tqkrka'-ngrnamu, naipq-kaiamu leplz kx ngyati drtwrmu, x Trtemu kc Heven sa naipq-kzle nimu x nakabzle nike rlxtiamu.

26 A' nzmu trnaipqwamuu leplz, Trtemu kc Heven tripq-kzleu nimu mz alwx ngrmung." *

* **11:26** 11:12-22 Kxnxlxngiti-angidrlr Gct nzapulr nounc kxmrlz kx do zvz x nrade kqlu. 11:23 Mc kz natq kxtpowz mz Matiu 21:21-22. 11:24 Nakrlzku kx Nzryrngrkxtr pi-kzle kx narlxbzku da mz Gct navz-nqblqle me pnz drtwrde. 11:26 Ngalrde lc trycu mz nzryrngr kxkqlu mz nzryrngr kcng pnz, a' drtwr ngrde yc kz mz Matiu 6:15 x 18:35.

²⁷ Jiszs badr ncblo nedeng nzvz-moung Jerusalem. Kx nzvznedr kc Mangr-nzangiongr Yawe, kxnzetu rdr pris, kxnzalvztrng mz Lou sc Mosis x lrtzlvzng, nzvzmqng mz nzvea-krbzlr bade.

²⁸ Nzrpibzlr kx, “?Neke rkabz bam zmatq mz nzale-krm da lcnq tqaleq?”

²⁹ Rpihz Jiszs badr kx, “Sa napibo me twzkimc zmatq kc tqale-ngrne da, nzm n-ayzlu-kaipamu nzvea-krbo bamu.

³⁰ ?Pimamu bange, zmatq ngr nzawrkxtrkr Jon kaom Gct o kabz ncblo?”

³¹ Sc tztalwzpeng mz nidr esz'-krdr, tzrpipehr kx, “Nzmu narpiku kx, ‘Zmatq kx kaom Gct,’ sa narpimle kx, ‘?E memule trlxngiti-ngrwamuu natqde?’

³² A' nzm narpiku kx, ‘Zmatq kx kabz ncblo,’ namwxlrniku leplz kxnzkqlung ma tznibqlr nigu, murde nzlxngitilr kx Jon nide profet.”

³³ Zbz sc tzrpipebzlr mz Jiszs kx, “Trkrlzkru.” Rpihz Jiszs badr kx, “X ninge kz trpengr nzpi-krbo me twzkimc zmatq kc tqwz-ngrne.” †

12

*Nzycmne-ebzpxngr Kxnzrbilqng Nrlanc
Matu 21:33-46; Luk 20:9-19*

¹ Zbz sc tqyapwxtipebz Jiszs nzycmne-ebzpxngr lc. Rpihzle mz leplz kcng tzmncng Mangr-nzangiongr kx, “*Kzdaq ncblo petile kc*

† **11:33** Jon yapwxtipxle kx Jiszs nide Kxnzmcp, mz nzrpi-krde kx nide Nei Sip ne Gct. Lr Jiu lcnq nzaelwapx-ngrdr mou kx nidr nounc kx trpnzng nradr mz nzpxtpx-krdr profet ne Gct.

nrlanc ngr grep. Lvztrle bz ngrde, oliqtile kc da kx narwzngr waen, x wz-ngrde kz kc me na-aukzngr mz nrlanc kc. ✧ Zbz sc tqrlrpe-ngrbzle mz ncblo kx narbilqng, kx naxpebzlr bade kzdung nra grep mz nrlanc lc. Zbz sc tqrlaszpele mrnyzde, vzpe rlrur mrkzble.

² Zbz mzli kc tqbrpengr grep, sc tqatwzlrpe-ngrbzle kc kxanzawz nede kx nayzlumibzle du nra grep kx nangi mqde.

³ Ncblo kc tqatwzlr-ngrbzle, kx krlzlezle kc ncblo kcng tzbilqng nrlanc, sc tzlolvzpelr nztztxdr x sc tzayzlu-nrbalqpelr.

⁴ Zbz Kxetu kc atwzlr-ngr-mopwzle kc kxanzawz nede badr. A' nzdwatibz ncblo kcng tzbilqng, nztakrtibzlr narde x nzamyatibzlr drtqde.

⁵ Zbz atwzlr-mou-ngrbzle kc kxanzawz, krlc nzotibzlr nznibqlr. Mz nqmq lcpwz, kxanzawz kxkqlu kx atwzlr-ngrbzle badr, nztztilr kcng x nznibqtilr kcng.

⁶ "Ncblo kc mncbepz bade doa esz'txu kx na-atwzlr-mou-ngrbzle badr. Krlc mrlxde kx mrlzti-zlwzle. Sc tqatwzlrpe-ngrbzle, murde mz drtwrde rpile kx, 'Ncblo kcng na-amrluebzlr mrlxnge x sa nakabzlr du bade nra grep kx nangi dalr nzbilqngr.'

⁷ A' kx nzmc ncblo kcng nide, sc tzipi-etripelr kx, 'Mrlx kxetu kc tqrnginyz nrlanc ka nide ka. Nanibqpeku nide, x da nyz trtede sa nangi nyzpegu.'

⁸ Nzlolvzlr nide, nznibqlr x nrkrdrtdqde nzrtctxpx-ngrdr mz nibr bz ngr nrlanc kc.

✧ **12:1** Asea 5:1-7; Sam 80:8-17

9 “X krlzpeamu da kx na-alebz ncblo kc tqrnginyz nrlanc! Sa navzm nanibqtile ncblo lang. X nrlanc kc sa nakabzle mz ncblo kzbleng.”
*

10-11 Jiszs rpi-mopwzle kx, “Zpwxtx! Krlz-angidramu Nzryrngrkxtr lc tqrpile kx, ‘Rplz kc etu tzpxtxpx-ngrdr ncblo kcng tzrwz-ngrng ma, nzaelwapxngr kx nide nou rplz kc tqmyatxpx-zlwzbz. Da lc Yawe kxrwzng. X abrtztx-zlwz-ngrgu.’ ” ☆

12 Zbz kxnzrmailzng ngr lr Jiu nzklztrpebzlr kx nzyapwxkr Jiszs lc tutrpz badr, x nzrpilr nalolvzpe-ngrdr nide. A' nzmwxlrtlir zbo ngr leplz ma drtwrdr tzngya. Zbz sc tzrlaszpelr nide.

*Nzrveatingr Nzxpengr Takes
Matu 22:15-22; Luk 20:20-26*

13 Mzli kc Jiszs tqmncbe-ngrde Mangr-nzangiongr, kxnzrmailz ngr lr Jiu nzatwzlr-ngrbzlr bade kzdung Farzsi x kzdung leplz ngr dzbede kc mz Herot. Nzrpilr naesabrtilr Jiszs mz nzymcnengr murde nalolvzlr nide.

14 Nzvzbzng nzrpibzlr kx, “Kxakrlz, krlzkr kx nike piq x alvztr-ngrn tubq zvz. X krlz-kzkr kx tu-amqngi-zvzq mz nzalvztr-krbzme nqm q kr Gct mz leplz, kxmule-esz' trna-abrtzlvzu kxnzetung. Mz nzmukrde lcde, pim ena bagr. ?Tubq mz Lou sc Mosis nzxpe-krbzku takes mz King r Rom o trtingr?

* **12:9** Mz be lc nrlanc ngr grep drtwr ngrde lr Israel. [Asea 5:7] Mrlx Kxetu drtwr ngrde Jiszs, kc tqrkabz Gct zmatq mz nznngini-krde Mrlxde. Ncblo kzbleng drtwr ngrde kxtrngiulrJiu.

☆ **12:10-11** Sam 118:22-23

15 ?Naxpeku o bzkq?" A' mcplxtrpebz Jiszs drtwrdr mz nzatalz-krdr nide. Murde mz nzrpi-krbzle 'Eu,' lr Jiu lcng nangyati drtwrdr nide mz nzokatr-krde enqmi rdr. X mz nzrpi-krbzle 'Trtingr,' ncblo ne Herot nalolvzlr nide mz nzxpqbrlr-krde lou sc gzpman ngr Rom. Delc tqrpi-ngrbzle kx, "?Memule tqrpi-ngrnamu natalz-ngrnamu ninge? Kamamu dq ena srlrni namcx."

16 Nzkbazlr kc x sc tqveapebz kx, "?Mqngr nar nelc tqmnztr mz srlrni lc, x drtq nelc tzyrtr elr?" Nzrpibzlr kx, "King r Rom."

17 Zbz Jiszs rpibzle kx, "Mz nzmu-krde lc, kabzmu mz king da kx takitrde king x kabzmu mz Gct da kx takitrde Gct." X ncblo kcng nzktitx-pxlr natqde, murde trprtz-pnzuz mz trtxki scdr.

*Nzrveatingr Nztulz-ngrm Mz Nzbzngr
Matiu 22:23-33; Luk 20:27-40*

18 Kzdung Sadiusi nzvzmqng mz Jiszs Mangr-nzangiongr. Nidr kzdq dzbe lr Jiu kx trnzlxn-gitilru nztulz-ngr-mop mz nzbzngr. Nzveatibzlr da kx na-atrkati-ngrbzlr nzalvztr-krde mz nztulz-ngr-mop mz nzbzngr.

19 Nzrpibzlr kx, "Kxakrlz, Mosis yrpixle kzdq lou kx nangi scgu. Rpile *nzmu ncblo kx bszle olvz rde x trpnzngr nedr doa, mzlede nayrlzti-alzule olvz kc. Murde nzrngine-krdr doa na-apule kx ngi doa ne mzlede kc tqbzpe. X doa lc nateqtrle nzmrbrpx-krbz nqvi lr ncblo kc x natwzle dztudeng.* ☆

☆ 12:19 Nou 38:8; Lou Kcpwz 25:5-10; Rut 4:5-10

²⁰ Nzmu narpingr kx kzdung mzle-lzbq nzr-limzng. Mzledr kc etu yrlz. Zbz mzli trboiu sc tqbzpe, trpnzng nede doa.

²¹ Zbz mzledr krali yrlzti-alzule olvz kc, x bz kz trpnzng nede doa. X wai-kzle mzledr kratq.

²² Vz, vz, olvz kc nzyrlzti mzle-lzbq kcng nzrlimz, x trpnzng nede doa. X mz nibrde olvz kc sc tqbzpe kz.

²³ Alvztr-ngrn kx leplz tulz-mop mz nzbzng. ?Kx tqmule lcde, neke nartwz olvz kc mzli kc natulzng mou leplz amrlx? Murde mzle-lzbq kcng rlimz nzyrlztilr nide. ?Myx kxmule, Gct batrpzle mz olvz lc nzxpqbrlr-krde natqde mz nzyrlzti-krde ncblo kcng rlimz mz mzli kxesz'?"

²⁴ Jiszsz ayzlu-ngrbzle natqdr kx, "Nzao-krmu drtwrmu vz-rbrtx atwrnrngr. Murde tryrplatitru narmu zmatq ngr Gct x drtwr ngr Nzryrngrkxtr.

²⁵ Mzli kc Gct na-alu-ngr-mople leplz mz nzbzng, sa na-apupelr enjrl kcng tzmncng Heven. Trnzyrlzpeung, x trpnzng nzyrlz-mou-krdr kalr.

²⁶ X Mosis aelwapx-ngrde kx krkcng tzbzpeng sa na-atulzmqng mz nzlungr. Murde krlz-angidramu natq Mosis mz be ngr nounc kc tqmrbz tqwou. Mzli lc Gct tqrpi-ngrbzle mz Mosis kx, 'Ninge Gct ngr Ebraam, Aesak x Jekop.'

✧

²⁷ Kxmule-esz' ncblo lcng tq nzbz-pnzng, a' trpileu kx nide Gct ngrdr mzli kc pnz. Murde nibede Gct ngrdr mz nzlu-krdr Heven mzli ka. Delc mrkc tqpnzki drtwrmu le vz-rbrtx atwrnrngr."

*Lou Kxmyapxbz**Matiu 22:34-40; Luk 10:25-28*

²⁸ Mzli kc dzbe Sadiusi tztalwzti-lzbq-ngrdr badr Jiszs, kzdq kxalvztr mz Loukxtr rpibzle mz Jiszs kx, “?Lou kznike myaszpxle lou amrlx?”

²⁹ Ayzlu-ngrbz Jiszs natqde kx, “Lou kx myapxbz nide sele, ‘Lxngitiamu, nimu lr Israel. Murde Yawe nide Gct rgu. X Yawe nide Gct kc esz'txu.

³⁰ Doa kx esz' mz nimu namrlztiq Yawe, Gct rmu mz nabzm atwrnrngr; x mz nzwikr nelzm atwrnrngr; x mz drtwrm atwrnrngr; x mz zmatq ngrm atwrnrngr.’ ✧

³¹ “Lou krali nide sele. ‘Mrlzti kztemqng da kc tqwaiq nzmrlzti-lzbq-krm.’ ✧ Trpnz-moungr lou kx nzmyaszpxlr lou lcng li.”

³² Kxalvztr mz lou kc rpibzle mz Jiszs kx, “Eu, da zpwxtx la tqpiq. Yawe nide Gct kc esz'txu x trpnzngr mou gct kzble. ✧

³³ X namrlztiq nide mz nabzm atwrnrngr; x mz drtwrm atwrnrngr; x mz nzxplr-krm atwrnrngr. X namrlzti kztemqng da kc tqwai nzmrlzti-lzbq-krm. ✧ Da lcng li nzmyaszpxlr nzrka-ngrbz da mz Gct x mz nzangc-ngrbz blz bade.”

³⁴ Kx xlrbz Jiszs nzymne-angidr-krde, sc tqr-pipebzle bade kx, “Opxm kx yce pipz nzmncz-krbzme mz Gct mz nzngini-krde King rm.” Mz nibrde leplz amrlx nzmwxlrxng nzvea-mou-ngrbz natq, murde ma tqamyatx-mopwzle drtqdr.

✧ **12:30** Lou Kcpwz 6:4-5 ✧ **12:31** Livae 19:18; Luk 10:27; Rom 13:9; Galesia 5:14; Jemes 2:8 ✧ **12:32** Lou Kcpwz 4:35; 6:4; Asaea 45:21 ✧ **12:33** Lou Kcpwz 6:5; Livae 19:18

*Nzrveatingr KxnzmcpX Ne Gct
Matiu 22:41-46; Luk 20:41-44*

³⁵ Mzli kc tqalvztrpengr Jiszs Mangr-nzangiongr, rpibzle mz leplz kcng kx, "Kxnzalvztrng mz Lou sc Mosis nzpilr kx Mevalu kc TqmcpX Gct navzpxm mz nqvi lr melrmqde Devet.

³⁶ Murde Mqngrkxtr batrpzle mz Devet nzymnetr-krde KxnzmcpX mz nzrpi-krde kx, 'Yawe rpibzle mz King kc tqngi kxetu rnge kx, **Wxbu mrlc tqmatq-esz'ngr mz nrlarnge kxrtc, navz nakrlz-zpwxbzle mzli kc nangi-batr-ngrbo mz enqmi rmqng nzmetx-krbzlr bam.**' ☆

³⁷ Mz Sam lc Devet rpile kx KxnzmcpX ngi kx-etu rde. ?A' myx kx namu KxnzmcpX nznginikr doa mz nqvi lrde kc mzte trnzmcKa, x mzli kcpwz ngi kz kxetu rde?" Zbo ngr leplz kcng nzabrtz-ngrdr nzlaltq-krbzlr bade. †

*Bzkq Apuamu Kxnzalvztrng Mz Lou Sc Mosis
Matiu 23:1-36; Luk 20:45-47*

³⁸ Mzli kc tqalvztrng Jiszs leplz, rpibzle badr kx, "Bzkq apuamu kxnzalvztrng mz Lou sc Mosis. Murde mrlzbx badr nzKq-krdr nzKq kxboi mz nzvzne-krdr, x nzamatqkr leplz nidr mz nzrpi-ngrbz badr kx, 'Nim la trte,' mz nzvzne-krdr me nzamwangr da.

☆ **12:36** Sam 110:1 † **12:37** Jiszs na-aelwxpx-ngrbzle badr kx KxnzmcpX trngi-txpwzu ncblo, a' myaszlzle ncblo murde Gct armyalzle nide. A' trpnzngr nidr kx yrplatitr narde natqde.

³⁹ X mrlz-kzpz badr nzwxbu-zvz-krdr me matq mz mangr-nzkrka'ngr x mz mzli r nzmulvzngr, murde nzglqpx-lzbqng.

⁴⁰ X mz zmatq ngr nzngini-krdr kxnzrmailzng, nzangqngutitrlr olvz kxnzbzszng mz nztwz-pnati-krdr dztudrng amrlx. A' mzli kcpwz nz-aboitiir nzkrka'-krdr mz nzyrlq-kapq-krdr alwx ngrdr. Mz nzmukrde lcde, leplz kxnzmulr lcng nzayrplapxng nidr kalr mz Hxl namyatpx-esz'ngr."

Nzrkangr Angidr

Luk 21:1-4

⁴¹ Mzli lcng tqalvztrngr Jiszs, wxbu aepztr mrkc Mangr-nzangiongr tzryrlqongr trau. Tqobqlvz-ngrde leplz amrlx nzrkatr-krdr trau. Leplz kxkqlu kxnzrngiscng nzryrlqong blzmr trau.

⁴² Zbz kzdq olvz kxtr-rngiscu x bszpe ncblo ngrde vztrpz yrlqole srlrni kxtpwzne li.

⁴³ Jiszs kqlele ncblo nedeng, rpibzle badr kx, "Napibo bamu, mz nzobqkr Gct olvz lc tqabzope, srlrni kc topwz tqkapxle myaszpxle blzmr trau keng tzkapxlr kxnzrngiscng.

⁴⁴ Murde kxmule-esz' kxnzrngiscng nzkapxlr kqlu a' kxpipzne la ye mz nzrngisc-krdr. A' olvz lc tr-rngiscu katxpxepele da keng amrlx namnc-glele."

13

*Rka Ngr Nzodatingr Mangr-nzangiongr
Matu 24:1-2; Luk 21:5-6*

¹ Mzli kc narkalzpe-ngrm Jiszs Mangr-nzangiongr Yawe, kzdq ncblo nede rpibzle bade kx, “Kxakrlz, mc ena kxmu nzlrnziongr nzwznggr Mangr-nzangiongr ka mz rplz lcngr etuti, x mzte nzluli-krde lxngipx-esz'ngr.”

² Rpibz Jiszs bade kx, “Mangr-nzangiongr lc tqpime mzte tqluli trnatu-alou. X trpnznggr rplz ngrde kx nablio me yc-ngrde. Murde sa naodati enqmi rmung kalr.”

Rkx Ngr Vea X Nzxpunggr Kxkqlu

Matiu 24:3-14; Luk 21:7-19

³ Kx nzkrzlbzlr kc Newz ngr Nc Olivi, Jiszs sc tqwxbupe elr, mrlcde nzmcpx Mangr-nzangiongr Yawe. Zbz Pita, Jemes, Jon x Adru sc tzvz-lrpipebzng mrkc tqwxbu-ngrde.

⁴ Nzrpibzlr kx, “Pim ena bagr mzli kc naodatingr Mangr-nzangiongr, x rkx kznikeng namc nakrlztingr mzli lcde.”

⁵ Rpibz Jiszs badr kx, “Aclvetio-lzbqamu mz da lcngr. Bzkq rlr-ngrbzmu mz leplz nzpokiati-krdr nimu mz da kznikeng naprtz.

⁶ Ncblo nakqlung sa navzmqng mz drtqngge, narpibzlr mz leplz kx, ‘Ninge Kxnmcpx.’ X leplz nakqlung kalr nalxngitilr nidr mz nzpokia-krdr.

☆

⁷ “X mou, bzkq nelzmu tzprlzm mz nzxlr-krmu nrpa ngr nzotangr mz vea kx esotrpq x nrpa ngr vea kx ycm rlr. Da kxnmulr lcngr naprtzti-kaing, a' trngiu drtwr ngr nzykrpxpe-krbz mz nrlc.

⁸ Murde mrkcng kqlu mz nrlc sa napnz-lzbqng. Nengq kxetuting sa navzmqng, x dzbi kxetuting

sa navz-kzpqng. A' da lcng naprtzting nzapulr nztangqgx-zlwzkr olvz kxyr, mzli kc tqvz-ebir-ngrm nimz ngr doa kxtpowz, x sc tqrmika ate.

⁹ “Aclvetio-angidramu, murde nimu lang tzlxn-gitilr ninge sa nalolvz kai kxnzetung nimu. Sa navzmir nimu mz kot x naiklapxmlr nimu mz nabz mangr-nzkrka'ngr. X navzmibzlr nimu mz kxnzetu mrkzbleng x mz king kxtrngiulrJiu mz nzayrplapx-krdr nimu. X mzli nyzmu lcpe kz mz nzyapwxtipx-krbzmu Nrpa rnge badr.

¹⁰ Murde Nrpakxmrlz lc nale-kaipz mz neidu amrlx mz nrlc, x Mzli Kxmatq kc na-ayzlu-ngrbz Gct da mz leplz kc ate.

¹¹ Mzli lc nalolvz-ngrmu mz nzvzmi-krdr nimu mz kot, bzkq da kx nakxne drtqmu mz da kx napiamu. Murde natq kcng napiamu trngiu nrpa kx aoti drtwrmu, a' ngi nrpa kx nakatrpz Mqngrkxtr mz nabzmu.

¹² “Mzli lcde, leplz sa nakabzlr mzledrng kcng tzvz-nqblqlr ninge mz enqmi rdr mz nznibq-krdrheng. X trte doa kz sa nawaisr-ngrde kz doa nedeng mz nznibqngr nidr. X doa na-atrkati-kzlr trtedr x lxedr x naka-kzpzlr mz enqmi rdrng mz nznibq-krdrheng.

¹³ Leplz kxnzkqlung sa napxtpx-ngrdr nimu, murde nimu leplz nengeng. A' nimu kcng tztu-amqngi-zvzng mz nzrlxngiti-krmu krlzbzle mz nzbz-krmu, sa na-arlapx Gct nimu.

Rkx Ngr Nzodatingr Jerusalem

Matu 24:15-21; Luk 21:20-24

¹⁴ Rpi-mopwz Jiszs kx, “Kxdrka'ngr kxmyapxbz kc tqtrka-esz'ngr sa navzm, mz nzatutr-krde

da kx yro Daniel mz buk scde. ✧ X nimu kcng tzrlwblr da lc nakrlz-angidramu drtwr ngrde. Murde Kxdrka'ngr lc sa natuom Mrkc Tqtr Mangr-nzangiongr, x trtakitrdeu nide nztuokrmle elr. Mzli lc nimu kcng tzmncng Judiz nnglrlzamu mz newz, mz nzmnc-kapq-knamu nzodangr kc tqycpe pipz nzkaputr-krmle.

¹⁵ Nzmu kx tqmncome mz nibr ma nyzm, bzkq asa q nzvzo-krmle x bzkq otrpeq dztum ma nyzm. A' ngrlrx pnz.

¹⁶ X nzmu kx tqwzq mz nrlanc, bzkq vzpeq ma nyzm mz nzoti-krm lrpzm, x sc tqngrlr-ateq.

¹⁷ "Agrmqng olvz kcng tzyrng x krkcng tzayqng itoto, murde rblxtile nidr nzngrlrlz-ani-krdr mz newz mz nzmnc-kapq-krdr.

¹⁸ Krka'-ngrbzmu mz Gct murde da lcng ma tzkaputrppng mz mzli r zbao, mzli kc nrlc tqbao-zlwz-ngrde.

¹⁹ Murde ztrka ngr nzxpungr lcng sa namyaszpxlr ztrka amrlx abzo mz mzli kc ayrnrngr tqwzng Gct nrlc krlzmle mzli ka. X trpnz-moungr nzwrde kxnaxmule lc kx naprtz kalr.

²⁰ Gct aotipe drtwrde nzamrbcnetr-krmle mzli lc, murde leplz ma tzyrkrtxtrng. X amrbcnetrple mzli lc mz nzokatr-krde leplz kcng tqmcpxpeleng.

²¹ Mzli lcde, nzmu kx tzrpibz leplz bamu kx, 'Obqki lcmnr, Kxnzmcpx kc tqmnc mrkc!' o 'Obqkim ka, nide se tqmnc kibzle ka!' bzkq lxngitiamu nidr.

✧ **13:14** Daniel 8:13; 9:27; 11:31; 12:11; 2 Tesalonika 2:3-4; Nzaelwapxng 13:14-15

²² Murde Mevalu kxnzpokiang x profet kxnzavztr-rbrng sa navzmqng. X na-aleting rkx x da kx nakctipxng mz nzesabrti-krdr leplz kcng tqmcpxpeng Gct, nzmu nakrlzlr nzyatr-krbzlr.

²³ Aclvetio-angidramu, murde napi-kaipo da lcng bamu x mzli rdr kc tqvz-atem.”

Rkx Ngr Nzvz-krm Mrlx Leplz

Matiu 24:29-31; Luk 21:25-28

²⁴⁻²⁵ Rpi-mopwz Jiszs kx, “Mz nibr mzli r nzcxpungr lcng, Gct sa na-aycngrlrtile dalr bongavz kcng tzmatqng amrlx. Nepi nawx-nzlongr x temz trnapnxu. X vri sa natatio-lxblrmqng mz bongavz. ✧

²⁶ “Ninge Mrlx Leplz. X mzli lc leplz amrlx mz nrlc tulvzo sa namclr ninge mz nzvz-krmc mz nabz dcbz mz zmatq kxetu x zluli. ✧

²⁷ X sa na-atwzlrpx-ngrne enjrl nengeng mz nrlc tulvzo, mz nzvzmi-krmlr leplz neng Gct kcng tqmcpxpeleng.”

Rkx Ngr Nc Fiki

Matiu 24:32-35; Luk 21:29-33

²⁸ Zbz rpi-mopwz Jiszs kx, “Mwx natwzamu drtwr ngr nzplcokr leu r nc fiki. Mrka Israel mzli kc namc-ngrnamu nrla nc fiki tzpooti-ngrdr x nzyrlqzbzlr leu rdr kxmrna, sc tqkrlzpeamu kx mzli r nrpr ngr nranc sa tqesopem.

✧ **13:24-25** Asaea 13:9-10; 24:21-23; 34:4; Esikel 32:7-8; Joel 2:10-11, 31; 3:15; Emos 8:9; Aposol 2:19-21; Nzaelwapxng 6:12-13

✧ **13:26** Daniel 7:13; Nzaelwapxng 1:7; 19:11-16

²⁹ Mz nqmq lcpwz, mzli kc namc-ngrnamu kx da lcng tqpibo bamu sc tqkaputrpepqng, sc tqkrlzpeamu kx mzli esotrpem mz nzvz-krmc.

³⁰ Nakrlz-angidramu kx da lcng amrlx nangidati-kaing, x leplz kcng tzmncng mz nrlc sc tzyrkrtr-ateng.

³¹ Kxmule-esz' bongavz x nrlc sa nayrkrpxng kalr, a' natqngeng trtxpnzng nzyrkrpx-krdr murde sa nangidating amrlx."

Naoliqti-zvzku Nyzylu-krm Jiszs

Matiu 24:23-28, 36-41; Luk 17:26-30, 34-36

³² Rpi-mopwz Jiszs kx, "Trpnzng kxrkrlz zbq x nabz nepi kc nayzlu-ngrmc. Trnzkrzlru enjrl ngr Heven amrlx x trkrlz-kzwxu, a' krlz txpwz Trtenge esz'-krde.

³³ Mz nzmukrde lcde, oliq-zvzamu murde trkrlzwamuu mzli rde.

³⁴ Kxnamu narkalz-ngrmc x ninge kc tqvzpemc, na-apule ncblo kc tqrkalm ma nyzde tqvz mz narnrlc. X rkabz nzwzng mzxkxawz nedeng amrlx. X rpibzle mz ncblo kc tqaclvele naonrx, na-aukz zvz mzli kx yzlu-ngrmle.

³⁵ "Mz nzmukrde lcde, oliq-zvzamu, murde trkrlzwamuu mzli kc nakaputr-ngrmc, ma tqngi milzpq o aurnrlc o mz natq kio kc kai o mz nourla.

³⁶ Trmrlzu trnzoliqti-krmuu nyzylu-krmc, x tqrmctipex nzpwrkilvc-krmu nyzylu-krmc.

³⁷ Mz nzmukrde lcde, natqngc lcng tqpibo bamu, pi-kzpo mz leplz amrlx, kx naoliqti-zvzamu nyzylu-krmc!"

14

*Kxnzetu R Lr Jiu Nzrpilr Nanibqlr Jiszs
Matiu 26:1-5; Luk 22:1-2; Jon 11:45-57*

¹ Ycbep lang z bq li x z bq kxtr kc t zrpibz Nzamyangr sc tqkaputrpem. Z bq lc tqyzutrnrgr nzmulvzngr kxtr, mzli kc tzmuxt-ngrpwzlr bret kc trpnzngr yisti ngrde. Z bq ngrde rlimz. Kxnzetu rdr pris x kxnzalvztrng mz Lou sc Mosis nzrpilr nalolvz-kapqlr Jiszs x nanibqlr, bzkq nzkrizti leplz kxkqlu.

² A' nzrpilr kx, "Bzkq lolvzku nide mz nabz z bq kcng tqetung, murde ma tqrkatr pzku mz leplz kxkqlu nzotabl rngr."

*Nar Jiszs Nzaelu Tolo Betzni
Matiu 26:6-13; Jon 12:1-8*

³ Jiszs mnc mztea Betzni mz ma nyz kzdq ncblo drtqde Saemon. Mrlx lc amrlz Jiszs mzli kc mz lepz kx dwatibzle nide. Mzli kc tqmungr Jiszs ma lcde, dwatrpz kc olvz. Twz bzle kc botol ngr tolo kx narnabr ngrde lqlwx x mnrte mrlz zlwz. Lvxlzle botol kc x sc tqaelupebzle nar Jiszs mz nzarmyalz-krde nide.

⁴ Kz dung leplz kcng tzmncng mrkc drtwrdr nya, sc t z rpi-et rpe l r kx, "? Nike olvz lc tqayrkrtitx-ngrde tolo lc narnabr ngrde tq lqlwx?"

⁵ Takitrde nzamwatxngr tolo la mz narnabr kx tq lqlwx. Narnabr kx rsakrl rmingr nzxpengr ncblo mz yiz kxes z'. X nakabz trau rde mz kxtrnzr ngiscung." Sc t z pibqtipe l r olvz kc.

⁶ A' rpibz Jiszs badr kx, "Bzkq ycmnebzmu bade. ? Memule tqrpi-ngrnamu narpwa'-ngrbzm da lc tqalele? Da kxmrlz-esz'ngr lc tqalemle bange.

⁷ Doa kx trnzrngiscung mnc-zvzamu badr, x krlzamu nzokatrngr nidr mzli kznike pnz ngr drtwrmu le. A' ninge trnamnc-zvzpc'u bamu.

⁸ Da lc tqale olvz lc, takitrde nide nzale-krmlele bange. Aelule ninge tolo mzli ka mz nzoliqti-krbzle nrkrdrqtngge mzli kc nabz-ngrne x nzyrtzmqngr namz ngrnge kc ate.

⁹ Napi-angidrbo bamu, drlve keng nzyapwx-tipxngr Nrpakxmrlz lc mrka mz nrlc, da kxmrlz lc tqalem olvz lc bange sa napipx kz, mz nzrdc-tipxngr drtwr nide mz nrlc tulvzo."

*Judzs Ryrlq Drtwr Mz Nzamwa-krde Jiszs
Matiu 26:14-16; Luk 22:3-6*

¹⁰ Judzs Iskariot nide kzdq ncblo neng Jiszs kcng nzpnu-esz'-nrade-li (12). Vzbz mz kxnzetu rdr pris mz nzamwa-krbzle Jiszs badr.

¹¹ Kxnzxlrlr da lc, nzabrtztxng x nzrpibzlr naxpebzlr Jiszs bade. Zbz Judzs sc tqrtangrtipele mzli kxmrlz kx na-aprc-ngrbzle Jiszs badr.

*Jiszs X Ncblo Nedeng Nzmulvzlr Nzamyangr
Matiu 26:17-25; Luk 22:7-14, 21-23; Jon 13:18-*

30

¹² Mz zbq kc kai ngr Nzmulvznggr Bret kx Trpnznggr Yisti Ngrde, nei sip kx nangq mz Nzamyangr sc tznibqpe. X mzli kc tqtaopengr nepi sc tzmulvz-atelr Nzamyangr. Ncblo nedeng nzveabzng bade kx, "Myx me naoliqti-ngrbzkr dakxnzng ngr Nzamyangr?"

13 Jiszs atwzlr-ngrde kzdu nidr nzling, rpibzle badr kx, “Vztramu mzteadau Jerusalem, x sa narmctiamu kzdq ncblo kx rglqne da kx lrti lue. Vz-nqblqamu nide.

14 X kx tqkrlzbzmu la, ma kc nadwakitrle, rpibzmu mz ncblo kc tqrnginyz ma kc kx, ‘?Kx-akrlz rpilz nakrlzle myx me namnc-ngrdr badr ncblo nedeng mz nzmulvz-krdr Nzamyangr?’

15 Sa navzmilzle nimu wq mz nelvq rde kxetu mrlcde nzamrlzpqpe-ngrde nigu. Mrlcde dekc naoliqti-ngrnamu dakxnzng nagu.”

16 Ncblo nede kcng tzvztrng Jerusalem, x da amrlx kcng tqpibz Jiszs badr sc tqngi-datipeng. Zbz sc tzoliqtipelr Nzamyangr.

17 Kx krlzbzle kc milzpq, Jiszs badr aposol kcng nzpnu-esz'-nrade-li (12) sc tzvzpem ma kcma.

18 X mzli kc tzmulzpe-ngrdr mz tebol, rpibz Jiszs kx, “Napi-angidrbo bamu kx kzdq nimu esz' sa na-amwabzle ninge mz enqmi rngeng. Kzdq nimu kang tqmu-lxblrku mzli ka.” ☆

19 Drtwrdr vztx pnz, x sc tzycmne-esz'-lxblrpebzng bade, tqtulzm kc nidr tqrpibzle kx, “?Trnipwc'u la tqpiq kx?”

20 Ayzlu-ngrbz Jiszs natqdr kx, “Kzdq nimu kang ncblo nengeng, kzdq nimu kc naleole bret nade mz dis lc tqwxbutrp bange.

21 Ninge Mrlx Leplz nabzx navz-nqblqle Nzryrngrkxtr. A' agrmplz ncblo la na-amwale ninge. Murde takitrde bzkq mzte nzmc pnz, murde nzayrplapxngr lc nide kalr namyatxpx-esz'ngr.”

☆ 14:18 Sam 41:9

Jiszs Ayzuole Nzmungrkxtr

Matiu 26:26-30; Luk 22:14-20; 1 Korint 11:23-25

²² Mzli kc tzmube-ngrdr, Jiszs kalzmle bret. Awitx-ngrbzle mz Gct, lopxile, kabzle badr x rpibzle kx, “Twzamu murde krlc ncvr drtqngc.”

²³ Zbz glqlzmle kap. Awitx-ngrbzle mz Gct, kabzle badr x nzrmnqong amrlx ngrdr elr.

²⁴ Rpibzle badr kx, “Krlc mepyr rnge kc tqyrlep-xngrde leplz kxkqlu, mz Nzesz'tikr Drtwr Gct badr leplz.

²⁵ Nakrlz-angidramu kx trpengr nzrmnq-moukrnge waen, navz nakrlzbzle mzli kc narmnq-ngrne waen kxmrna mz nrlc kc na-acive Gct kalr.”

²⁶ Mz nibrde nzngrtx-ngrdr kc Sam ngr ngr-glqpxngr, x sc tzrlaszpelr mzteadau, tzvzdzpeng mz Newz ngr Nc Olivi. *

Plzpx-kaipez Jiszs Nzrpikr Pita Trkrlzleu Nide

Matiu 26:31-35; Luk 22:31-34; Jon 13:36-38

²⁷ Zbz rpibz Jiszs badr kx, “Koma mz nrlickxbq nimu amrlx ngrmu sa nadwaszamu ninge, mz nzatutrngr Nzryrngrkxtr mz nzrpi-krde kx,

* **14:26** 14:24-25 *Nzesz'tikr Drtwr* lc rpile kx Jiszs tekqtrle nigu mz nzayrplapxngr mz alwx ngrgung x Gct trpengr nznibq-krde nigu mz alwx lncg. Murde mz nzvz-nqblq-krde *Nzesz'tikr Drtwr* lc, Gct anulvzlzpebzle alwx ngrgung mz Jiszs, x kamle bagu nztubq-krde. Murde mzli kx obq-ngrmle bagu, namc-tpwzle kx apuku Jiszs mz nztr-krde. 14:26 Mz nzvz-nqblq-krde nqm q kr lr Jiu, mz nzmungr mz Nzamyangr, nzngr-ngrdr Sam 113—118. Kzdzung Sam nzngr-kai-ngrde, x sc tzmua-ateng. X nzngr-ngrdr Sam kzbleng mz nibr nzmungr lc. Mz nzvzdz-krdr mz newz lc, mwz trtakitru nabz nepi kxesz'.

'Ninge Yawe, x sa nanibqx kxachve sip, x sip nedeng sa na-akiting nrlc.' ☆

28 A' mz nibr nzatulz-moungr ninge mz nzbzng, sa nartwayz-kaipo Gzlili x navz-kzpzmu mz nzrmcti-lzbq-krgru elr."

29 A' Pita rpibzle kx, "Trtxpnzngr nzdwasz-krnge nim, kxmule-esz' kztenge lcng nzdwang amrlx!"

30 Jiszs rpibzle mz Pita kx, "Napi-angidrbo bam, koma mz nrlckxbq, nzwrde natq nzrpi-krm trkrlzww ninge x kio nzky'a'-krde nzwrde krli kc ate."

31 A' Pita natqde xplr-zlwzbz mz Jiszs nzrpi-krbzle bade kx, "Trtxpnzngr nzrpi-krnge kx trkrlzwxu nim! Kxmule-esz' nzabzminge nim!" X nzpi-kzpzlr kztede kcng amrlx.

Jiszs Krka' Esz'-krde Getsemzni

Matiu 26:36-46; Luk 22:39-46

32 Mz nzvzo-kr-moplr nzkrzlbzlr kzdq nrlc drtqde Getsemzni. Jiszs rpibzle badr kx, "Wxbupwzmu mrka mzli kc nakrka'-ngrne."

33 Vzmile Pita, Jemes x Jon. Mzli lc nabz Jiszs talvzope x mrlepupe-ngrde nzvzkr drtwrde.

34 Sc tqrpibzle badr rtqlrdr kx, "Nzvzkr drtwrge etutx-zlwzpe x rpile nanibqle ninge. Mncpwzmu mrka x aukzpwzmu."

35 Vzspxle nidr kxpipz x sc tqrtco-lzbqpengr mz drtc' mz nzkrka'-krde. Krka'-ngrde kx nzmu kx tqrlrpxngr Gct le e bzkq drtqde nzaetq x nzabz.

☆ 14:27 Sekaraea 13:7

³⁶ Rpile kx, “Abba! Trte! Rngiscm zmatq ngr nzalengr da amrlx. Trsutiu drtwrnge nzrlrpx-lzbq-krnge mz nzetqkr drtqnge x nzbzngr. A' bzkq vz-nqblqq me pnz drtwrnge, a' nangi zvv me pnz drtwrm.”

³⁷ Mz nibr nzkrka'-krde, yzlum mz ncblo kcng nztqng, a' sa tzmwing. Sc tqrpiopebzle mz Pita kx, “Saemon! ?Nike tqmwilvzq? ?Rblx-zlwzbz bam nzobq-krm mz nabz nepi kxes'?”

³⁸ Aukzpwz x krka' murde natu-amqngiq mz nzatalzngr. Murde kxmule-esz' suti drtwrm nzalengr da kxtubq, a' nzxplr-krm esz'-krm traktirdeu.”

³⁹ Zbz Jiszs vz mou mz nzkrka'-krde, x pi-moule natqde kcng pwz.

⁴⁰ Kx yzlu-mople kc badr, mcle kx nzmwipemoung rtqlrdr, murde mztr one mwi zlwz. X trnzkrzlru da kx napibzlr bade.

⁴¹ X kx yzlu-mople kc mz nzwrde kratq mz nzyrkrpx-krbz nzkrka'-krde, sc tzmwibeng. Sc tqrpipebzle kx, “Elr! Nimu ka tqmwibeamu. Mrlzpe ena. Mzli kc tqpi-pnzbo bamu sc tqkaputrpep. Obqbzmu, ninge Mrlx Lepz se n aprcpebz mz zmatq ngr ncblo kx nzaleng alwx.

⁴² Tulzamu, navzbzku narmcti-lzbqku badr. Obqbzmu, ncblo kc tqamwale ninge sa tqvzpem.”

Jiszs Nzlolvz Getsemzni

Matiu 26:47-56; Luk 22:47-53; Jon 18:3-12

⁴³ Mzli kc Jiszs tqycmnebe-ngrde, Judzs sc tqkaputrpebz. Judzs lc nide kzdq ncblo nedeng kcng nzpnu-esz'-nrade-li (12), x vz-nqblqm zbo

ngr ncblo. Nzatzwlrpx-ngrmqng kxnzetu rdr pris x kxnzlvztrng mz Lou sc Mosis x lrtzlvzng. Nzrmaleng dalr nzotangr, bz x toki r vea.

⁴⁴ Judzs rka-kaipz badr rkx mz nzrpi-krbzle kx, “Krkc naticngix kcma, nide kc nalolvzamu x vzmiamu.”

⁴⁵ Zbz Judzs vzm mz Jiszs. Rpibzle kx, “Kx-akrlz!” x sc tqtcngipebzle mqde.

⁴⁶ Zbz sc tzlolvzpelr Jiszs.

⁴⁷ A' kzdq ncblo nede kx tu mrlcde yrlqzbzle toki r vea scde x lakitxpxbzle kzdq nradrtq kxnzawz-nrbalq ne Nardr Pris.

⁴⁸ Rpibz Jiszs badr kx, “?Memule tqrtwz-ngrmamu bz x toki r vea mz nzlolvz-krmu ninge? ?Opxm kx ninge kx rmailz ncblo mz nznzlvzongr zmatq ngr gzpman?”

⁴⁹ Mz zbq kang kqlu alvztr-zvz-ngrne Mangr-nzangiongr. ?Memule trlolvz-ngrwamuu ninge elr? A' kxmusr-ngrnamule lc mz nzangida-krde Nzryrngrkxtr.” ☆

⁵⁰ Zbz ncblo nedeng amrlx sc tzdwaszpelr nide.

⁵¹ Mzli lcde kzdq obla vz-nqblqne-kzle Jiszs mz nrlckxbq kcpwz, pxi txpwz lrpz. X nzrpilr nalolvz-kzlr nide.

⁵² A' nzmale-lvitxdr nide x dwaszle lrpz scde, x sc tqvope ycblq. †

*Jiszs Nzvzmibz Mz Kansrl Nyz Lr Jiu
Matiu 26:57-68; Luk 22:54-55, 63-71; Jon 18:13-14, 19-24*

☆ **14:49** Asaea 53:7-12 † **14:52** Mwx obla kc nide Jon Mak kc tqyrle buk lc.

53 Jiszs nzvzmilr mz ma nyz kx ngi Nardr Pris, mrkc tzyrlwrpx-lxblr-ngrdr kxnzetu rdr pris, lrtzlvzng, x kxnzalvztrng mz Lou sc Mosis.

54 Pita kc tqma-nqblqnebzle nidr. X dwatr-kzpz mz makoa ngr ma kc, sc tzwxbu-lxblrpeng badr pulis ngr Mangr-nzangiongr mz nzmulq-krde nyr.

55 Kxnzetu rdr pris x Kansrl nzrtangrng kzdq da kx vz-rbrti Jiszs, murde nzrpilr nanibqlr nide, a' trpnzng da kxnzrmctilr.

56 Murde leplz nzklung nzpokiatitrlr Jiszs, a' nzryapwx-krdr tresz'tiu.

57 Zbz kzdu leplz nztulzmqng, sc tzpokiapekzng.

58 Nzrpilr kx, "Xlrkr nzrpikr Jiszs kx, 'Sa nawxtxobo Mangr-nzangiongr lc tzwzti ncblo, x nayctitxde zbq nali, x zbq kratq sa nawzti-mopwc' dq kxmna kx trnzkrizu ncblo nzwzng.' "

59 A' natq kcng tzpiti-lxblrlr tresz'ti-kzu.

60 Zbz Nardr Pris tutxlzm mz mzlirdr, sc tqveapebz mz Jiszs, rpibzle kx, "?Myx kxmule, trpnzng natq kx na-ayzlu-ngrbzme natq ncblo lcngr?"

61 A' Jiszs anabu txpwz. ✧ Zbz Nardr Pris vea-mopwz bade, rpibzle kx, "?Ngini-angidrm Kxnzmcpw? ?Nim Mrlx Gct kc tqglqlzkr?"

62 Ayzlu-ngrbz Jiszs natqde kx, "Eu, ninge mrlxde. X sa namcamu ninge, Mrlx Leplz, nzwxbu-krnge me matq esz'ngr mz nrlar Gct kxrtc. X ninge la nayzlu-mopwc' kalr mz nabz

dcbz ngr bongavz.” ☆

⁶³ Zbz Nardr Pris sc tqpesali-zlwzpele nzkq scde, tqrpipebzle mz Kansrl kx, “Trpengr nzrtangr-krgr ncblo kx narpim bagu da kx vz-rbrti mrlx lc!

⁶⁴ Murde sa tqxlrpebzmu natq kx pivxi-ngrde Gct. ?Nike aotitrpz drtwrmu mz mrlx lc?” Rpibz Kansrl kx vz-rbrtx zlwz x takitxtrpwzle nzbz-krde. ☆

⁶⁵ Zbz kzdung ncblo kcng mz Kansrl sc tzby-atipelr Jiszs. X nzpe-kilvzbzlr mzte lrpz x sc tztzpelr mz mqdr, tzipipebzlr kx, “Mz nznngini-krm kc profet, pim ena bagr krkc tqtzle nim.” X Jiszs nzvzmi-kzlr pulis ngr Mangr-nzangiongr x nztz-kzlr. ‡

Pita Rpile Trkrlzleu Jiszs

Matiu 26:69-75; Luk 22:56-62; Jon 18:15-18, 25-27

⁶⁶ Mzli kc Pita tqmnclz-ngrmle mz nabxbz ngr ma kc, kzdq olvz kwz mz ma nyz Nardr Pris vzm mrkc tqwxbu-ngrde.

⁶⁷ Kx mcle kc Pita nzmulq-krde nyr, sc tqobqlvzpele, x tqrpipebzle bade kx, “Nim dq kz kx mnctrpz mz Jiszs kc Naszret.”

☆ **14:62** Sam 110:1; Daniel 7:13 ☆ **14:64** Livae 24:16 ‡ **14:65** 14:63-64 Ncblo kcng mz Kansrl trnzlxngitilru Jiszs nznngini-krde Kxnmcp x o Mrlx Gct. Nardr Pris pesalile lrpzde mz nzvz-nqblq-krde nqmq kr lr Jiu. Kxmule-esz', a' mz Livae 21:10 Gct pipxle kx bzkq pesali Nardr Pris lrpz scde. 14:65 Mz nzpe-kilvz-krbzlr mzte, kxnzetu r lr Jiu nzvz-nqblqr Asaea 11:3, mz nzirpi-krde kx, “Kxnmcp trna-aolvzleu leplz mz nzvz-nqblq-krde da kx mcle mz mzte.” A' nzxtrnga-ngrdr nide, murde trnzlxngitilru nide x mz drtwrdr rblxbz bade nzpipx-krde neke tzle nide.

⁶⁸ A' Pita pokiatrixbz, rpibzle kx, "Trkrlzwxu da la tqycmnetr-ngrn." Zbz tulzm x sc tqtutrpe mz naonrx, x kio kc tqkya'pe.

⁶⁹ Kx mc mou olvz kc Pita, sc tqrpipiebzle badr leplz kxnztung mrkc kx, "Mrlx lc nide dq kz ncblo ne Jiszs."

⁷⁰ Zbz Pita pokia mou, rpile kx trngiu da zpwx kc tqpi olvz kc. Zbz mzli trboiu kzdung leplz kx nztung mrkc nzrpi-kzpzlr mz Pita kx, "Krlztx-angidrkr kx nim kzdq nidr, murde mz nzymne-krm otxpx kx nim lr Gzlili."

⁷¹ Zbz rpibz Pita kx, "Naesalzbo bamu kx nangi bongavz, da zpwx lc tqpibo bamu. Trkrlzwxu ncblo la tqpimamu bange. Nzmu kx tqpokiabo na-ayrplapx zvz Gct ninge."

⁷² X mzli kcpwz kio kc tqkya'pe mz nzwrde krali. X sc tqdcpxpe mz drtwr Pita nzrpi-krbz Jiszs bade kx, "Napibo bam, nzrpi-krm trkrlzwwq ninge nzwrde natq, x natq kio krali kc ate." Zbz Pita sc tqyrnitxpe, bztitxde nzyrningr.

15

Jiszs Nzvzmibz Mz Paelzt

Matiu 27:1-2, 11-14; Luk 23:1-5; Jon 18:28-38

¹ Mzli kc mz nourla kc topwz, kxnzetu rdr pris, lrtzlvzng, kxnzalvztrng mz Lou sc Mosis, x leplz amrlx mz Kansrl nyzdr lr Jiu nzymne-lxblrng x sc tzryrlqpeng drtwr. Nzpetxbzlr mq Jiszs x sc tzvzmipelr tzaprcpebzlr mz mq Pcntizs Paelzt, lr Rom kc tqaclvele Judiz Provins.

² Paelzt veabz mz Jiszs kx, “?Myx kxmule, nim king r lr Jiu?” Ayzlu-ngrbz Jiszs natqde kx, “Sa tqplzpxpeq kx ninge.” *

³ Kxnzetu rdr pris nzrpibzlr kx Jiszs alele da kqlu kxtrkating.

⁴ Zbz Paelzt sc tqveape-mopwz bade, rpibzle kx, “?Memule trayzlu-ngrpwe'u natqnge? ? Trxlrwq da kcnq kqlu tzrpilr kx oti-rbrbzme?”

⁵ A' Jiszs sc tqvz zvz trnzycmne-krdeu. Sc tqkctitpxpe Paelzt nznabu-krde. ✧

Paelzt Rlrpx-ngrde Nzbzkr Jiszs

Matiu 27:15-26; Luk 23:13-25; Jon 18:39—19:16

⁶ Mz Nzamyangr amrlx, Paelzt aprpxmle kzdq doa lr Jiu kx mnc mz presin kx nzrlxtitprz lr Jerusalem.

⁷ Mzli lc kzdq ncblo kxayo drtqde Barabas mnc mz presin. Murde nidr badr kztedeng nznibqlr kcnq ncblo ngr vea ne Rom mz nzota-krdr badr mz nzmaszlrpx-krdr nzaclvekr lr Rom nidr.

* **15:2** 15:1 Lr Jiu, trpnzng r scdr zmatq mz nznibq-krdr leplz, a' doa lr gzpman ngr Rom txpwz kcnq tzaclvelr nrlarnrlc nyzdr kxrngisc zmatq lc. [Jon 18:31] Kxnzrmailz ngr lr Jiu suti drtwrdr Jiszs nabz, a' da kx alele trtakitrdeu nznibqngr nide mz lou sc lr Rom. Paelzt mnc zvz mz taon Sisaria. A' kzdung mzli vz Jerusalem, myapxbz mzli kcnq tqkaputr-ngrm zbq kxetu scdr lr Jiu, mz nzrpwa'-krbzle badr nzotangr. 15:2 Mz drtwr lr Jiu, natq “King r lr Jiu” nangi drtq kx nalvr-ngrbz mz Kxnzmcpx. Nzrpilr kx Paelzt lxngitile kx Jiszs avzole zmatq ngr King kxetu mrkc Rom mz nzngini-krde kz king. ✧ **15:5** Asaea 53:7

⁸ Zbz mz Nzamyangr kc, lr Jerusalem nzrlxtitr-pzlr mz Paelzt kzdq ncblo mz nzvz-nqblq-krde nqm̄q krde.

⁹ X rpibzle kx, “?Narlr-ngrbo bamu King rmu, King r lr Jiu?”

¹⁰ Krlc tqkxmu nzymne-krbz Paelzt lc murde krlzle kx Jiszsz nzaprcbz kxnzetu rdr pris bade mz nzdobulvz-krdr nzsuti-zlwzkr drtwr leplz nide.

¹¹ A' kxnzetu rdr pris nzapqtrpzlr drtwr zbo ngr leplz kcng kx narlxti-alzubzlr mz Paelzt Barabas.

¹² Zbz Paelzt vea-mopwz badr kx, “?Nike nawaisr-ngrne ncblo lc tqrpamu King r lr Jiu?”

¹³ A' sc tznemipebzlr, tzrpibzlr kx, “Natqlvztr mz kros!”

¹⁴ Rpi-mopwz Paelzt kx, “?A' memule? ?Da kxtrka kznike alele?” A' sc tznemi-katobzlr kx, “Natqlvztr mz kros!”

¹⁵ Paelzt suti drtwrde nzaelalz-krmle drtwr zbo ngr leplz kcng, x sc tqaprp̄xpebzle Barabas badr. A' rpibzle mz ncblo ngr vea nedeng naiklaln Jiszsz x natqlvztrlr nide mz kros.

Jiszsz Nztqlvztr Mz Kros

Matiu 27:27-44; Luk 23:26-43; Jon 19:2-3, 17-27

¹⁶ Kzdung ncblo ngr vea nzvzmitrpele Jiszsz mz makoa ngr ma kxetu nyz Paelzt, x sc tzkqlepele ncblo ngr vea kztedrng amrlx.

¹⁷ Nzotilr kc nzkq kxrp̄ol sc king, sc tzakqpe-ngrdr Jiszsz. X nzngrelelr kc nqvi nzku ngi kraon scde, nzalaobzlr mz narde.

¹⁸ Sc tzxtrngalvztrpele x tzm̄rgepe-ngrdr nide kx, “Nim la, King r lr Jiu! Nzmnc-krm naboi.”

19 Nztakrtibzlr narde mz dapunc x nzbyatilir nide. Zbz sc tizrweopebzng zpr bade mz nzapusr-krdr nide king.

20 Mz nibrde sc tzavopxpebzlr nzkg kc prpol x nzavoo-mopwzlr nzkg scde. X sc tzvzmipxpelr mz nzrtqlvztrngr nide mz kros.

21 Nzvzng, x sc tzmctipelr kc ncblo drtqde Saemon. Nide dalr taon kxetu Saerin, mrkc Afrika. X mrlxdeng drtqdr Aleksada x Rufzs. Tqvz-atem x navztrpe Jerusalem. A' ncblo ngr vea kcng sc tzrtulrtrpe-ngrbzlr bade nzglq-krbzle kros ngr Jiszs, murde drtqde mewetx-zlwzpe.

22 Ncblo ngr vea kcng nzvzmilr Jiszs mz kzdq newz drtqde *Glgata*, drtwr ngrde *Bekrlz*, murde nzobq-krde apule beklr.

23 Nzkabzlr bade kc waen kx ycmi luekxpiz nzrpibz mrr, a' trmnq-pnzleu. ✨ †

24 Zbz sc tztqlvztrpelr nide mz kros. X nctq lrpz scdeng nzayrleti ncblo ngr vea kcng daes, mz nzkrz-krde doa kx narngisc. ✨

25 Nztqlvztrlr Jiszs mz kros mz nabznepi kc tqrpwxmz mz nourla.

26 X mz nzaelwapxngr da kc tqbzng Jiszs, nzyr kcng natq x nzatu mrkc tztqlvztr-ngrdr nide mz kros. Rpile kx, "KING R LR JIU."

✨ 15:23 Sam 69:21 † 15:23 15:22 Mz natq lr Rom, *Bekrlz* nzrpibz *Kalvzri*. 15:23 Mrr kala ngrde bla. Nzwzngz mz lue lr benounc kxlala nzrpibz *mrr*: Nzaleti mz da kxkqlu x ngi kz tolo x medesin. Mrlc nzyrlqmi waen, ngi dalr nzaesakingr zvzetq. Jiszs trmnq-pnzleu murde mz nzvz-nqblq-krde me pnz drtwr Gct Trte, natwzle zvzetq atwrnrngr x naxngitrle mz nzxpepx-krde alwx ngr leplz amrlx. ✨ 15:24 Sam 22:18

27 X nztqlvztr kz mz kros kzbleng ncblo nzling kxnzpnang da taplxsr nrlar Jiszs.

28 Mz nzmukrde lcde, natq profet Asaea sc tqngidatipe, mz nzrpi-krde kx, *“Mz nzaotikr drtwr leplz, ni-kzde ncblo kx xpqbrlr-zvz-ngrde lou.”* ☆

29 Mzli kc tqdoo-ngrm Jiszs mz kros, kzdung leplz kx nzvzkiplr mrlcde nzrpitilzbzng natq kxtrka bade. Nzaycngirlzbzlr nardr, nzrpilzbzlr kx, *“Kx tqrpiq kx matq-esz'ngrn mz nzawxo-krm Mangr-nzangiongr x wzti-mowq mz zbq kxtqtu,*

30 *e vzom mz kros la mz nzarlapx-lzbq-krm!”* ☆

31 Mz nzmukrde lcdepwz, kxnzetu rdr pris x kxnzalvztrng mz Lou sc Mosis nzxtrnga-kz-ngrdr Jiszs mz mzliplr, nzrpilr kx, *“Krlzle nzarlapx-krde kzdu-kzng leplz, a' trkrlzleu nzarlapx-lzbq-krde.*

32 Nzmu kxtqngini-angidrde King Kxnzmcpn ngr Israel, navzopem mz kros mzli ka x sc tqlxngitipeku nide.” X ncblo kcng nzling tzdo-kzng mz kros, nzrpiti-kzpzng natq kxtrka mz Jiszs. ‡

☆ **15:28** Asaea 53:12 ☆ **15:30** Sam 22:7; 109:25 ‡ **15:32** 15:28 Ngalrde lc tryclzpuu mz kzdung nzryrngr kcng pnz ngr buk lc. Kxmule-esz' Jiszs trpnzng alwx ngrde, a' mz nzayrplapxkr Gct lc nide mz nzapu-krde kx alwx ngrde ycbz, tekqtrle nigu mz nzxpepx-krde nigu mz alwx ngrgung, mz nzipq-krde nigu. [2 Korint 5:21] 15:32 Jiszs krlzle nzarlapx-lzbq-krde. A' suti drtwrde nzarlapx-krde leplz mz alwx ngrdrng, mz nztekqtr-krde nidr mz nzayrplapxkr Gct nide. Dekc trarlapx-lzbq-ngru Jiszs. Nagqlz-ngrgu Gct nzrlrpx-lzbq-krde mz nzbz-krde nigu.

*Nzbzkr Jiszs**Matiu 27:45-56; Luk 23:44-49; Jon 19:28-30*

³³ Mzli kc tqtavauo-ngrm nepi, nzlo akqlvztx-pnzle nrlc atwrnrngr, krlzbzle nabznepi kc tqtq.

³⁴ X mzli lcpwz, Jiszs sc tqetumipe natqde, nzrpi-krde kx, “*Eloi! Eloi! ?Lama sabaktani?*” Drtwr ngrde kx, “*Gct! Gct o! ?Memule tqvzszpe-ngrn ninge?*” ☆

³⁵ Kzdung leplz mrkc nzxlr-rbrbzlr natq Jiszs, x sc tzrpiplr kx, “*?Xlrbzmu? Kqlepele Profet Elaeja kc bqnc mz nzokatr-krde nide!*”

³⁶ Kzdg nidr otilc kc kzdg da, petrle mz nounc, leole mz waen kxr kx, x sc tqglalzpebzle mz nao Jiszs. ☆ Sc tqrpipebzle kx, “*Na-aenzliku ena, namcku nzvz-krm Elaeja mz nzglqo-krmle nide mz kros.*”

³⁷ Zbz Jiszs netxpx-kato mou x sc tqbzpe. §

³⁸ X mzli lcpwz lotqbr kc tqdo Mrkc Tqtr Mangr-nzangiongr nzpسالikiomle wq tatxo mz noude, ncte li.

³⁹ Kzdg kxetu r dzbe ncblo ngr vea ne Rom kx trtqki-esz' (100) tulzbx mz nou kros. Kx mcle kxmu nzbzkr Jiszs, sc tqrpipele kx, “*Da zpwxtx, ncblo ka nide Mrlx Gct.*”

☆ **15:34** Sam 22:1; Asaea 59:2 ☆ **15:36** Sam 69:21 § **15:37** 15:34 Nzetqkr drtq kc tqprtilzpele Jiszs mz Mak 15 nzplzpx kai mz Sam 22 x Sam 69. Alwx ngrgung dekcng tzbatrpnzng nzvzszkr Gct Jiszs. 15:35 Mz natq Erameik *Eloi* apu-kzpwzle nzrpinger drtq *Elaeja*. Mc kz 2 King 2:11. 15:37 Mz nzbz-ani-krde, Jiszs aelwapx-ngrde kx trnginideu ncblo txne, a' nide ncblo kxmatq. Murde leplz kx nztqlvztr mz kros luti-zvzle zbq kqllu, yangrngatx, drtwrde mrbr x sc tqbzpe. A' Jiszs trwaileu.

⁴⁰ Kzdung olvz nzmnc-kzng mrlcde, sc tz-tumqng rlr, x nzmclr da keng tzwaisrngr Jiszs. Olvz lcdeng seng, Mxri kc Makdala, Salome, x Mxri lxedede Jemes kc tqtopwz x Joses.

⁴¹ Olvz lcng nzvz-nqblqne-zvzlr Jiszs x nzoka-trlr nide mzli kc tqmnc-ngrde Gzlili Provins. Olvz nzqqlu kx nzmncng mrlcde kx nzvzkimlr Gzlili x nzvzdzng badr Jiszs Jerusalem. *

Jiszs Nzyrtzmq

Matiu 27:57-61; Luk 23:50-56; Jon 19:38-42

⁴²⁻⁴³ Zbqkranzlvqn ngi zbq ngr nzoliqtikr lr Jiu mz Sabat. Sabat yzutr mzli kc tqtaopengr nepi. Josip kc Arimatia trmwxlru, vzbz mz Paelzt x sc tqrlxtipebze nrkrdrdq Jiszs mz nzyrtzmq-krdele. Josip lc nide kzdq kxetu mz Kansrl nyzdr lr Jiu. X tqobqtiple mzli kc Kxnmcp x ne Gct nangini-ngrde King r lr Jiu. †

* **15:41** Kxmule-esz' ncblo neng Jiszs nzdwaszlr nide, a' ngi txpwz Jon, x olvz lcng tzbtri drtwrdr nide vz-krlztx-zpwxbzle mz kros. Salome trnzkrz-zpwxu, a' mw x nide olvz r Sebedi, lxe Jemes x Jon. [Matiu 27:56] Kxmule-esz' mzleng Jiszs drtqdr Jemes, Joses, Jud, x Saemon, [Mak 6:3] a' Mxri kc tqngi lxedede Jemes kc tqtopwz x Joses, opxm kx trngiu lxedede Jiszs. Mwx Mxri lc ngi olvz r Alfizs Klopzs. [Luk 6:15; Jon 19:25] Jemes lc nzrpibz Jemes kc topwz mz nzablepx-ngrbz nide mz Jemes mzle Jon kc tqvz-nqblq-kzle Jiszs. Mz Luk 8:2 mcku Mxri kc Makdala. Kzdq kz Mxri ngi Mxri, lxedede Jiszs, x kzdq Mxri ile Mata, mzlwedr Lasarus. Mz Aposol 12:12 mcku Mxri, lxe Jon Mak. X mz Rom 16:16 mcku kzdq mou Mxri kx lxngitile Jiszs mrkc Rom. † **15:42-43** Zbq ngr nzoliqngr Zbqkranzlvqn amrlx x Sabat ngi Satqde amrlx. Mz nqm q kr lr Jiu zbq yzutr mzli kc tqtaongr nepi mz nabznepi kc tqesz'mz. X nzyrlqlr kzdung kz zbq kxtr nzrpi-kzpz Sabat. Mc kz Lou Kcpwz 21:22-23 x Jon 19:31, 38.

44 Paelzt kctipxle nzxlr-krde kx Jiszs bz-anipe. Kqlele kxetu r ncblo ngr vea kc tqaclvele Jiszs, sc tqveatipebzle kx Jiszs bz-zpwxpe.

45 Mz nibr nzrlwa-krbz ncblo nede, Paelzt sc tqrlrpe-ngrbzle namz ngr Jiszs mz Josip.

46 Zbz Josip xpele kc lrpz kxprki. Kaomle namz ngr Jiszs mz kros, x sc tqbxtipele lrpz kc, mz nzvz-nqblq-krde nqm q kr lr Jiu x sc tqqltr-anipele mz gq lr kxbz kx nzekqtitr mz butqbr. Mrlz, sc tqalqlitrpebzle kc rplz kxetu kx nzapqbrtr-ngrbzle naonrx ngr butqbr kc. ✧

47 Mxri kc Makdala x Mxri lxede Joses nzmclr butqbr kc tqayrbqpx-ngrm Josip namz ngr Jiszs.

16

Jiszs Tulz-mop Mz Nzbzngr

Matiu 28:1-10; Luk 24:1-12; Jon 20:1-10

1 Mz nibr Sabat mzli kc mz nina, Mxri kc Makdala, Mxri lxede Jemes, x Salome nzvzng sc tzzpepeng da kx na-aelu-ngrdr namz ngr Jiszs. *

2 Zbz mz nourla kc topwz mz Sade, olvz kcng nztqng sc tzvzpeng mz butqbr kc.

3 Mzli kc tzvz-ngrdr mz lrpzki, sc tzpi-etrepelr kx, “?Neke naokatrle nigu mz nzalqlipxngr rplz kc? Murde etu zlwz x mrlepu.”

✧ **15:46** Asaea 59:9, 12; Jon 19:39-42 * **16:1** Mz nzvz-nqblq-krde Lou scdr lr Jiu trpnzngr doa kx naxpe da x narglqne da mz Sabat. Sade yzutr mz milzpq ngr Sabat mz nabznepi kc tqesz'mz. Olvz kcng nztqng nzxpeng da lc mzli lcde. Mz nzbzkr Jiszs kc, trpnzngr nidr kx aoti drtwrde kx sa nalu mou, da kc tqwai nzpi-pnz-krbzlele. Mc Mak 8:31, 9:31, 10:34 x 14:28.

⁴ A' kx nzkrzlbzlr butqbr kc, nzmcpelr rplz kc nzalqlipxpe.

⁵ Nzdwatrpzng mz butqbr kc, nzpwrkilvc-ngrdr kzdq enjrl kx apule obla, x kq lrpz kxprki wxbu mz nrlarde kxrtc ngr gq kc.

⁶ A' rpibzle kx, "Bzkq mwxlamu. Krlzpebo kx rtangrtiamu Jiszs kc Naszret tztqlvztr mz kros. Mc-zpwxamu mrkc tzayrbq-ngrdr namz ngrde. Tryrbqpeu mrka, murde tulzpe mou.

⁷ A' yzluamu x pibzmu mz ncblo nedeng badr Pita kx, 'Jiszs sa tqrtwayzpe kai Gzlili, x navz-kzpzmu mz nzmcti-lzbq-krmu badr elr, da kc tqwai nzpi-pnz-krbzlele bamu.' " ✨

⁸ Olvz kcng nzvzpxmqng mz butqbr kc, nzrnrci-lzbqng mz zmwxl x sc tznglrpeng. Mzli lcde trpnzng doa kx nzpine badr le, nike nzmctr mz butqbr kc. †

Kzdq Me Yrkrkipx Nrpakxmrlz Lc ‡

✨ **16:7** Mak 14:28 † **16:8** 16:7 Mwx Enjrl lc tqpibzle drtq Pita lc, murde nabzde talvzo-ngrde nzpokia-krde kx trkrzleu Jiszs. X mz nzxl-krde drtqde apqtrpzle drtwrde, x krlzle kx Jiszs sc tqmrlztiibe drtwrde nide. 16:8 Nrpakxmrlz kx yr Mak yrkrpx mz ngalrde kc rtqmqz mz nzryrngr li kx nzyr pnz kai. A' kzdung kz nzryrngr kx nzyrlqtrpzlr ngalrde 8b mz nzrpi-krde kx, 8b "Zbz olvz kcng nzyapwxtibzlr kxpipznezpuz mz Pita badr kztedeng da kcng tqpibz obla kc. X mz nibrde Jiszs sc tqatwzlrpxpe-ngrde ncblo nedeng mz nzle-krbzlr Nrpa lc tqtr x tqyctx alo mz leplz. Krlc nrpa ngr nzarlaxkr Gct leplz mz nzayrplax-alongr mz alwx ngrdrng. Delape." ‡ **16:8** Nzryrngr kxkqlu nzyeng mz ngaldr 9-20. X mz drtwr kxnzetung mz makxtr takitrd nzaolvzng ngaldr lcng mz nznngini-krdr natq Gct, kxmule-esz' mz drtwr kzdung leplz tryru Mak.

*Jiszs AdcpX-lzbqBz Mz Mxri Kc Makdala
Matiu 28:9-10; Jon 20:11-18*

⁹ Mz nibr nztulz-krm Jiszs mz nourla mz Sade, adcpX-lzbqBz mz Mxri kc Makdala, kc tqmaszlrpx-ngrBz Jiszs bade drka' rlimz. ✧

¹⁰ Vz x sc tqpipebzle mz ncblo nedeng kcng drtwrdr tzvzbeng x tzyrning.

¹¹ Kx nzxlrBzlr nzrpi-krbZle kx Jiszs lupe mou x mcle nide, trnzlxngitipwzlru natqde. §

*Jiszs AdcpX-lzbqBz Mz Leplz Nedeng Nzling
Luk 24:13-35*

¹² Mz nibrde, mz zBq kcpwz, Jiszs adcpX-lzbq-kzpz mz leplz nedeng nzling kx nzrkalmqng Jerusalem. Mzli kc tqadcpX-lzbq-ngrBz Jiszs badr, nzobq-krde blepxngr x trnzglxlr nide mzli kc kai.

¹³ A' kx nzglxlr kc nide, sc tzyzlupe-moung Jerusalem, x tzrlwape-ngrBzlr mz kztedrng amrlx, a' trnzlxngiti-kzlru natqdr.

Jiszs AdcpX-lzbqBz Mz Ncblo Nedeng

*Matiu 28:16-20; Luk 24:36-49; Jon 20:19-23;
Aposol 1:2-3, 6-8*

¹⁴ Mz nibrde Jiszs adcpX-lzbq-kzpz mz ncblo kcng nzpnu-esz'-nrade-esz' (11) mz nzmukrdr. X ycmnetxbz badr, murde trnzbr-kru drtwrdr, x nzmqngikr nardr, x trnzlxngiti-krdr leplz kcng tzmclr nide mz nibr nztulz-krmle mz nzbz-krde.

✧ **16:9** Luk 8:2 § **16:11** Rblx nzrlxngitingr nide murde lr jiu mz nzaotikr drtwrdr nzymnekr olvz ngi da kxmane. X mz drtwrdr leplz nzlu-moungr mz nzbzngr nzwrdde naesz', mz Mzli Kxmatq kc na-ayzlu-ngrBz Gct da mz leplz.

¹⁵ Zbz sc tqrpipelinez Jiszs badr kx, “Vzpxamu mz nrlc tulvzo x lebzmu Nrpakxmrlz mz leplz amrlx.

¹⁶ X krkcng nzrlxngiting x nzwrkxtrng sa narlapx Gct nidr. A' krkcng trnzrlxngitiung trtx-pnzng nrlapx-krdr.

¹⁷ Kxnzlxngitilr ninge sa nartwzng zmatq mz nzale-krdr rrx lcde seng: mz drtqng sa narmaszlrpx-ngrng drka', x naycmneng mz natq lr mrkzbleng mz zmatq ngr Mqngkrxtr.

¹⁸ X kxmule-esz' nzrmaleng ningidoe kxr-makx x nzrmnqng lue kxrlq, a' trtxpnzng nznibq-krdr nidr. X mzli kc tzmaletr-ngrbzlr drtq kxnzyagoxng, zyagox ngrdr nayrkrpxbz x namrlz-moung.” *

Jiszs Yzlulz Mou Heven

Luk 24:50-53; Aposol 1:9-11

¹⁹ Mz nibr nzymne-krbz Kxetu Jiszs badr, sc tqavzdpe Gct Heven. X wxbutxom me matq mz nrlar Gct kxrtc. ☆

²⁰ Zbz ncblo nedeng sc tzvzpxpeng mz nrlc tulvzo mz nzrlepzng Nrpakxmrlz. X Jiszs okatr-zvzle nidr mz nzale-krdr da kxnzktipxng mz nzaelwapxng kx nzalvztr-krdr da zpwx. Eu. Delape.

* **16:18** Jiszs tr-rkapwzu natq ngr nzmale-krdr ningidoe kxr-makx x nzrmnqng lue kxrlq. A' ycmnetr-ngrde nzatrkatigr kxnzrlxngiting mz nztulrtr-ngrbz badr da kxtrka kx na-alelr, nangdr o namnqlr. X ycmnetr kz mzli kx trnzkrzlzru da kx nzalelr. Mc Aposol 28:3-6. Mwx ningidoe drtwr ngrde Setzn. Mc kz Sam 91:13. ☆ **16:19** Sam 110:1; Mak 12:36

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 28 Dec 2024 from source files dated 31 Aug 2023

fb2b7f06-e254-5fb7-b59d-ee21d5d7a93f